

ሉቃስ ጸፊዳ ኑ ጎዳ ዩሱስ ኪርስቶስ ሚሺራች ቃላ ጊደ ቆፋ

ሉቃስ ሚሺራች ቃላይ ዩሱስ ዳሮ ዋዴፔ ካሴ ያና ጌቲቲ ናቤታን ኢስራኤል ኣሳሰ ዮቲቲ ኡቲን ኢስራኤል ኣሳይ ናጊ ኡቲዳ ኪርስቶስ፡ «ኣሰ ኡባ ኣሺዛዴ» ጊዲዳይሳ ቆንጨሳናሳ፡ ሉቃስ ዩሱሳ፡ «ማንቆታሰ ሚሺራች ቃላ ሳባካናሰ» ባ ኣዋፔ ከቲቲዳዴ ጊዲዳይሳኔ ሚሺራች ቃላዚካ ኣሳሰ ዲዛ ዱማ ዱማ ሜቶሰ ኦጌ ቤሲዛይሳ ዮቲሰ፡ ሉቃስ ሚሺራች ቃላዛ ጊደን ሃራፔካ ዩሱሳ ሂዶታ ጊሻሰ ዮቲዛ ኮይሮ ሽምፖፓኒኔ ወርሴላ ሽምፖፓን ሎኤሊ ዮቲዳይ ሂዶታ ጊሻሳ፡ ዩሱሲ ፑዴ ሳሎ ቢዳፔ ጉዬ ኣማኖይ ዋኒ ናምኣንሶ ዲጨዳኮ ሃዋሬታ ማጻፋን ሃይሳ ጸፊዳይ ሄ ማጻፋዛን ዮቲዴሰ፡

ከታንቻቲ ዩዲዳ ዩሳ ጊሻሰ ዩሱሲ ዩሉቲን ሜሄ ሄሚዛይቲ ኢዛ ቤኢዳይሳ፡ ዩሱሲ ቡሮ ጉላን ዲሺን ጸሳ ኬሌ ቢዳይሳ ኣሳሰ ሚሻ ጊዲዳ ሄ ሳማሪያ ኣዴዛ ኦሶን ቆዩ ቤቲዳ ናዛ ታሪኬይ ሄይቲ ወሪካ ሉቃስ ሚሺራች ማጻፋን ጸላላ ቤቲቲሰ፡ ኢዛ ሚሺራች ቃላዛን ጋጸፔ ጋጸ ጋካናሰ ኣዳፌ ዮቲዳይ ዋሳ ጊሻሰ፡ ጸሎ ኣያና ጊሻሰ፡ ማጫሳታሰ ዩሱሳ ኦሶ ጊደን ኢሰታሰ ኢሜቲዳ ጊሻኔ ጸሲ ናጋራ ኣቶ ጊዳይሳ ዮቲሰ ጉሳ፡

ሃ ማጻፋይ ኦይኪዳ ኩሜላ ቆፋ

ጌሎሶ 1:1-4

ጸማቂዛ ዮሃኒሳ ዩሉቴሊኔ ዩሱሳ ዩሉቴላ 1:5—2:52

ጸማቂዛ ዮሃኒሳ ኦሶ 3:1-20

ዩሱሳ ጸማቂቴሊኔ ፓጤቴላ 3:21—4:13

ዩሱሲ ባ ኦሶ ኮይሮ ጋሊላን ዶሚዴሰ 4:14—9:50

ጋሊላፔ ዩሩሳላሚ ቡሰ 9:51—19:27

ዩሩሳላሚኒኔ ሄ ሄራን ወርሴላ ሳሚንታን ዩሱሳ ጋኪዳ ሜቶ

19:28—23:56

ጎዳ ዴንላ ቆንጨሊኔ ፑዴ ሳሎ ቡሰ 24:1-53

1 ቦንቾ ቶፊሎሳ! ኑ ኣቻን ሃኒዳ ዮኦታ ጊሻሰ ዳሮ ኣሳቲ ባሰ ሃኒዳ ማላ ጸፊዳ፡፡

² ሄ ታሪኬዚካ ኮይሮፔ ዳንሴዲ ባ አይፌራ ቤኢዳ ማርካቲኔ ጸሓ ቃላ የተዳይቲ ኑስ አሉዳይሳ።

³ ታኒካ ታ ባጋራ ጸጸፔ ዳንሳዳ ኬሃ ናጌታዳኔ ፓጫ ጸላዳ ታሪኬዛ ወርሳ ሲንሐ ጸፊታናስ ቤሲዛይሳ ሲንሳሳዳ ካሊዲ ጸፊታናስ ቤሲዛይሳ ካሌላዳ ናጌታዳ ኔስ ጸፋና ማላ ታስ ሎኦ ጊዲ ቤተዳስ።

⁴ ሃይሳ ኡባ ታ ኦሊዛይ ኔ ታማርዳይሲ ቱማ ጊዲዳይሳ ኔና ኤሮ ጉሳሳ።

ጸማቂዛ የሃኒሲ ዬሌታናይሳ ኪታንቻ ጋብሬሌይ ካሴቲዲ የተዳ ቃላ

⁵⁻⁶ ሄርዶሲ የሁዳ ቢታን ካዎቲዳ ዎዴ አቢያ ጌቲቲዛ ቄሴታ ሃላቃዛ ባጋፊ ቄሴቲላ ኦሶ ታራይ ኢዛ ጋኪዳ ዛካራሳ ጌቲቲዛ ኢሲ ቄሴይ ዳስ። ኢዛ ማቼያካ ኤልሳቤጸ ጌቲታወስ፤ ኢዛካ አሮኔ ባጋ አሳ። ናምኦቲካ ጎዳ አዛዞኔ ኢዛ ዎጋ ዎሶይ ባይንዳ ናጊዲ ዲዛይታኔ ጸሓ ሲንሳን ጸሎ አሳ።

⁷ ጊዶ አቲን ኤልሳቤጸ ና ዬሎንታ ማይኔ ጊዲዳ ጊሻስ ኢስታስ ናይ ባ፤ ናምኦቲካ ዎዴይ ቢዳ አሳ።

⁸ ዛካራሲ ጸሓ ሲንሳን ቄሴቲላ ኦሶ ታራይ ኢዛ ጋኪን ኢዚ ኦሊሺን

⁹ ቄሴታስ ዲዛ ዎጋ ማላ ጸሓ ኬላን ጌሊዲ ኤጻኔ ጨዋሳና ማላ ኤጻይ ኢዛ ጋኪዳስ።

¹⁰ ኤጻኔይ ጨዋቲሺን አሳይ ወሪካ ካሬን ዲዲ ዎሴስ።

¹¹ ጎዳ ኪታንቻይ ኤጻኔይ ጨዋቲዛ ሶፔ ኡሻቻ ባጋራ ኤቂዲ ዛካራሳስ ቤተዳስ።

¹² ዛካራሲካ ኢዛ ቤኢዲ ኬሂ ዳጋሚዲ ባቢዳስ።

¹³ ኪታንቻይ ዛካራሳስ፡ «ባቦፋ! ኔ ዎሳይ ሴቲቲዳስ፤ ኔ ማቼያ ኤልሳቤጸ ኔስ አቱማ ና ዬላና፤ ኢዛ ሱንሳካ ኔ የሃኒሳ ጋዳ ሱንሳና።

¹⁴ ኢዛ ዬሌታን ኔኒ ዳሮ ኡፋዬታና፤ ዳሮ አሳይካ ኡፋዬታና።

¹⁵ ጎዳ ሲንሳን ኢዚ ጌታ ጊዳና። ዎይኔፔ ኦሴቲዳ ጫጄ ጊዲንካ ሃራ ማሶሲዛ ኡሹ ጊዲንካ ኢዚ ኡዬና፤ ኢዚ ቡሮ ባ አዬይ ቃንሳን ዲሼ ጸሎ አያናን ኩማና።

¹⁶ ኢስራኤሌ አሳፔ ዳሮታ ኢስታ ጸሓኮ ዛራና።

¹⁷ አዎታ ዎዚና ኢስታ ናይታኮ፡ አዛዜቶንታይታካ ጌዴ ጸሎታ ጨንጫቲላኮ ዛራና ማላኔ ጎዳስ ቤሲዛ ዳሬ ጊጊሳና ማላ ኤላሳ አያናኔኔ ኢዛ ዎልቃን ጎዳፔ ሲንሳራ ኢዚ ባና» ጊዳስ።

18 ዛካራሲ ኪታንቻዛስ፡ «ታኒ ጨማ፤ ታ ማቼያካ ጨማዱስ፤ ታኒ ሃይሳ አዛን ኤራኔ?» ጌዲ ኦይቺደስ።

19 ኪታንቻዚካ ዛሪዲ፡ «ታኒ ጸሳ ሲንፋን ኤቂዛ ጋብሬሌ። ታኒካ ሃ ሚሺራችዛ ኔስ ጋላናስ ኪቲታዳ ያዲስ።

20 ሄኮ ኔኒ ባ ዋዴን ፖሌታና ታ ቃላ አማኖንታ ኢጲዳ ጊሻስ ኔ ዶናይ ዱዳና፤ ኔኒካ ሃሳያና ዳንዳያካ» ጌዴስ።

21 ሄ ዋዴ ዳሬይ ዛካራሲ፡ «ጸሳ ኬላፌ ኬዘንታ አዛስ ጋምኢዳኮ» ጌዲ ሞዴቲሼ ናጌዴስ።

22 ኢዚ ጸሳ ኬላፌ ኬዚዲ አሳ ሃሳይሳናስ ዳንዳይቤና፤ ማላቲ ማላቲ ቤሶፔ አቲን ሃሳያናስ ዳንዳዮንታ አጊን አሳይ ኢዚ ጸሳ ኬላን ጸሳፌ ኦራላ ሚሽ ቤኢዳይሳ ኤሪዴስ።

23 ዛካራሲካ ባ አሶ ታራይ ፖሌቲዳፔ ጉዬ ባሶ ሲሚዴስ።

24 ሄሳፌ ጉዬ ኢዛ ማቼያ ኤልሳቤጸ ና ቃንፋታዱስ፤ ኢቻሻንሶ አጊናይ ጋካናስ አሲ ባና ቤኦንታ ማላ ቆቲታዱስ።

25 ኢዛካ፡ «ጎዳይ ባ ማሮታን ታ ለቄቲዳይሳ አሳ ጌዶፌ ዲጋናስ ሃ ዋዴዛን ሃይሳ ታስ ኦሴዴስ» ጋዱስ።

ዬሱሲ ዩሌታናይሳ ጋብሬሌይ ካሴቲ ዮቲዴስ

26 ኤልሳቤጸ ቃንፋቲዳ ኡሱፑንፋ አጊናን፡ ጸሲ ባ ኪታንቻ ጋብሬሌ፡ ጋሊላ ቢታን ዲዛ ናዚሬቲ ጌቲቲዛ ካታማ ዬዲዴስ።

27 ኢዚካ ካዋ ዳዊቲ ዜሬሐ ጌዲዳ ዮሴፌ ጌቲቲዛ አሳስ ጊጋ ኡቲዳ ማራሞ ጌቲቲዛ ጌላኦይኮ ኪቲቲዴስ።

28 ዪዲኔ ኢዛ ዲዛሶ ጌሊዲ፡ «ሃኔ ጸሲ ኔና አንጂዳሬ ሳሮ! ጎዳይ ኔናራ ዴስ ኔኒካ አንጄቲዳሮ» ጌዴስ።

29 ማራማ ኪታንቻ ሃሳያን ኬሃ ዳጋማዳ፡ «ሃይሲ አይ ጊዛ ሳሮካ?» ጋዳ ዮኦዛ ኬሃ ቆፓዱስ።

30 ኪታንቻይካ ማራሞ፡ «ጸሲ ኔናን ኡፋዬቲዛ ጊሻስ ባቦፋ!

31 ኔኒ ቃንፋታና፤ አቲማ ናካ ዬላና፤ ሱንፋካ ዬሱሳ ጋዳ ሱንፋና።

32 ኢዚካ ጌታ ጌዳና፤ ኡባፌ ቦላ ጌዲዳ ጸሳ ና ጌቲታና፤ ጎዳ ጸሲ ኢዛ አዋ ዳዊቲ ካዎቴላ ኢዛስ ኢማና።

33 ኢዚ ኢሰራኤሌ ናይታ ቦላን ሜርናስ ካዎታና፤ ኢዛ ካዎቴላስካ ዉርሴላ ዶና» ጌዴስ።

34 ማራማካ ኪታንቻስ፡ «ታኒ አዴ ጌላቤኬ ሺን ሃይሲ ዋኒ ሃናኔ?» ጋዳ ኦይቻዱስ።

35 ከታንቻይካ ማራሚስ፡ «ጸሎ እያናይ ኔ ቦላ ዋቋና፤ ኡባፌ ቦላ ጸሳ ዋልቃይ ኔ ቦላ ኩዋሳና፤ ሄሳ ገሻስ ዩሌታና ናዚ ጌሻ ጸሳ ና ጌቲታና።

36 እሲ ዩሉኩ፤ ኢዛ ማይኔ ገዲ ሃሳይዛ ኔ ዳቦያ ኤልሳቤጸ ጨማቲላን ኣቲማ ና ቃንላታዳ ዩላናስ ኡሱፑንሶ ኣገና ኦይካዱስ።

37 ጸሳስ ሃኖንታ ሚሺ ዴና» ገዴስ።

38 ማራማካ ዛራዳ፡ «ሄኮ ታኒ ጸሳ ኣይሌ ዲኪና፤ ኔ ገዳ ማላ ታስ ሃኖ» ገን ከታንቻይ ኢዚፔ ሻኬቲዲ ቢዴስ። ማራማ ኤልሳቤጸ ቤያና ባዱስ።

39 ማራማካ ሄ ዋዴ ማታራ ኤሶታ ዴንዳዳ ፑዴ ጌዜ ዴሬን ዲዛ ኢሲ ዩሁዳ ካታማ ባዱስ።

40 ዛካራሳ ኬፍ ጌላዳ ኤልሳቤጸ ሳርታዱስ።

41 ኤልሳቤጸ ማራሚ ሳርካ ሲዩዳ ማላ ቃንላን ዲዛ ናዚ ኢዚ ቃንላን ጉፒዴስ፡ ኤልሳቤጸንካ ጸሎ እያናይ ኩሚዴስ።

42 ኢዛካ ባ ቃላ ቶቁ ሂስታዳ፡ «ማጫሳ ኡባፌ ኔ ኣንጃቲዳር፤ ኔ ቃንላን ዲዛ ናዚካ ኣንጃቲዳይሳ።

43 ታ ጎዳ ኣያ ታኮ ያዳ ታና ኦይቻናስ ታኒ ኦኔ?

44 ኔ ሳርካ ቃላ ታ ሲዩዳ ማላ ታ ኡሎ ገደን ዲዛ ናይ ኡፋይሳን ጉፒዴስ።

45 ፖሌታና ገዲ ጎዳይ ኢዚስ ዮቲዳይሳ ኣማኒዳራ ኢዛ ኣንጃቲዳር» ጋዱስ።

ማራሚ ጋላታ ዋሳ

46-49 ማራማካ፡ «ኢዚ ባ ኣይሌይ

ካወሻቲላ

ዴሊዳ ገሻስ

ታ ሼምፒያ ጎዳ ቶቁ

ኦላዳ ቦንቻወስ።

ታ ኣያናይካ ታና ኣሺዛ

ታ ጸሳን ኡፋይታወስ።

ዋልቃማ ጎዳይ ታስ

ገታ ሚሼ ኦሊዳ ገሻስ

ሃቺፌ ሲንላን ኣሲ ዉሪ ታና

ኣንጃቲዳር ጋና።

ኢዛ ሱንላይካ ጌሻ።

50 ኢዛ ማርይ ኢዛስ ባቢዛይታስ

- ና ና ጋካናስ ዳና።
 51 ባ ዋልቃን ዳሮ ሚኖ
 ኦሶ ኦሊዴስ፤
 ባ ዋዚና ቆፋን
 ኦቶሪቲዛይታ ላሊዴስ።
 52 ካዎታ ካዎቴላፌ ዋሊዴስ፤
 ኦቭኬታ ቃሴ
 ጾቄ ጾቄ ሂስቲዴስ።
 53 ጋፊዳይታ ሎኦ ሚሻን ካልሲዴስ፤
 ዲሬታ ጊዲኮ
 ሜላ ኩሼ ዬዲዴስ።
 54-55 ካሴ ኦ ኣዋታስ
 ኦብራሃሜሲኔ ኢዛ
 ቆሞታስ ጊዳ ሂዶታ ቃላ
 ናጋናስ ባ ማሬቴላ
 ዩሺ ቆፒዲ
 ባ ኣይሌ ኢስራኤሌ
 ማዲዴስ» ጋዲስ።
 56 ማራማካ ኤልሳቤጺ ኣቻን ሄሹ ኣገና ሲሬ ጋሞኣዳ ባሶ
 ሲማዲስ።
 ጸማቂዛ ዮሃኒሳ ዬሌቴሳ
 57 ኤልሳቤጺስ ዬሎ ጋላሳይ ጋኪን ኣቱማ ና ዬላዲስ።
 58 ኢዚ ጉታቲኔ ዳቦቲካ ጎዳይ ኢዚስ ጊታ ማሬቴሳ ኦሊዳይሳ
 ሲዬዲ ኢዚራ ኢሲፌ ኡፋዬቲዳ።
 59 ዬሌቲዳ ኦስፑንላ ጋላስ ቃጸራስ ዬዳ። ኢዛ ኣዋ ሱንላን
 ዛካራሳ ጊዲ ሱንላና ኮዬዳ።
 60 ጊዶ ኣቲን ኣዬያ፡ «ሃኔና፤ ኢዛ ሱንላ ዮሃኒሳ ጌቴቶ»
 ጋዲስ።
 61 ኢስቲካ ኢዚስ፡ «ኔ ዳቦታፔ ዮሃኒሳ ጌቴቲዲ ጸይጌቲዳ
 ኣሲ ኦኒካ ባ» ጊዳ።
 62 ኣዋይ ዛካራሲ ናዛ ኦና ጊዲ ሱንላና ኮዬዳኮ ማላታን
 ኦይቺዳ።
 63 ዛካራሲካ ጸፊዛ ሚሽ ኢዛስ ኢማና ማላ ኦይቺ ኤኪዲ
 ሱንላይ፡ «ዮሃኒሳ» ጊ ጸፊን ኣሳይ ዉሪካ ማላሌቲዴስ።
 64 ሄራካ ዛካራሳ ዶናይ ፖጌቲዲ ኢንጸርሲ ቢርሼቲን ጸሳ
 ጋላታ ኦይኪዴስ።

65 እዛ ጉታቲ ወሪ ዳሮ ባቢዳ። ሃይሲ ወሪካ ጾቃ ጌዜ ቢታን የሁዳ ዴራን፤ ኡባሶን ሃሳዬቲዳሰ።

66 ሃይሳካ ሲዱዳ አሲ ወሪካ፤ «ሃ ጉላ ናይ ኣይ ሃናኔሻ?» ጊዲ ሃናዛ ወርሲካ ባ ዎዚናን ኦይኪዳሰ፤ ጎዳ ኩሼይ ቱማፔ ኢዛራ ኢሲፌ ዳሰ።

ዛካራሲ ዮቲዳ ቲንቢቲ

67 ናዛ ኣዎይ ዛካራሲ ጸሎ ኣያናን ኩሚዲ ቲንቢቲ ሃሳይሼ፤

68 «ዱዲ ባ ኣሳ ኣሺዳ ጊሻሰ ኢሰራኤል ጸሲ ጋላቲቶ።

69-70 ቤኒ ዎዴ ባ ጌሻ ናቤታ ዶናን ሃሳዬቲዳይሳ ማላ ባ ኣይሌ ዳዊቲ ኩላን ኣሺዛ ዎልቃ ኑሰ ዴንሊዳሰ።

71 ኢዚ ኑና ኑ ሞርኬታፔኔ ኑና ኢዲዛይታ ኩሼፔ ኣሼሰ።

72 ሃይሳ ኢዚ ኦሊዳይ ኑ ኣዎታሰ ባ ማሮቲል ቤሳናሳ፤ ባ ጌሻ ጫቆዛ ዩሺ ቆፓናሳ።

73-75 ካሴ ኑ ኣዎ ኣብራሃሚሰ ጫቂዳይሳ ቆፓና ማላኔ ኑ ሞርኬታ ኩሼፔ ኢዚ ኑና ኬሲን ኑኒ ኢዛሰ ባቦይ ባይንዳ ኦላናሲኔ ኑ ዲዛ ዎዴ ኡባን ባ ሲንላን ኑና ጌሻቲላኒኔ ጸሎቲላን ኤሳናሳ።

76 ጎዳ ኦጌ ጊጊሳናሰ ኔ ኢዛፔ ሲንላራ ቢዛ ጊሻሰ ታ ናዞ ኔኒ ዎጋ ጸሳ ናቤ ጌቲታና።

77 አሳይ ባ ናጋራፔ

ማሬቲዳ ገሻሰ

ዳሬሰ አቶቴላ ኤራቴላ

ኔ ኢማና ማላ፥

78 ኑ ጸሳ ሎኦ ማሮቴላፌ

ዴንዲዳይሳን ሳሎፔ ኑስ

ኦርሼይ ኬዚዳሰ።

79 ሄሲካ ቋማን ዲዛይታሲኔ

ሃይቆ ኩዋ ጊዶን ዲዛይታሲካ

ፖኢሳና ማላኔ

ኑ ቶሆታካ ሳሮቴላ

ኦጌ ካሌፋናሳ» ጊዳሰ።

80 ጉላ ናዚካ ዲጪዳሰ፤ ኢያናንካ ሚኒዳሰ፤ ኢሰራኤሌ አሳሰ
ቆንጩን ቤታና ጋካናሰ ባዞ ቢታን ዴኢዳሰ።

2

ዩሱሳ ዩሌቴላ

(ማቶ 1:18-25)

1 ሄ ዋዴ ቢታ ቦላን ዲዛ አሲ ወሪካ ታይቤቲዲ ጸፊታና
ማላ ኦሮሜ ካዋ አወገሰጸሳፔ አዋጃይ ኬዚዳሰ።

2 ሄሲካ ቄሬኔዋሳ ጌቴቲዛይሲ ሶሪያ ዳሬ ሃሪዛ ዋዴ ሃኒዳ
ኮይሮ ዳሬ ታይቦ።

3 ሄሳ ገሻሰ አሲ ወሪ ጸፊታናሰ ባ ዳሬ ዳሬ ቢዳሰ።

4 ዮሴፌይካ አሾ ዳቦቴላን ዳዊቴ ባጋፌ ጊዲዳ ገሻሰ ጋለላ
አወራጃ ጊዶን ዲዛ ናዚሬቴ ካታማፔ ዩሁዳ አወራጃ ቤቴሊሄሜ
ጌቴቲዛ ዳዊቴ ካታማፔ ዩዳሰ።

5 ኢዚ ጸፊታና ቢሺን ኢዛሰ ጊጌታ ዳሼ ዩላና ማቲዳ
ማራሚራ ቢዳሰ።

6 ኢሰቲካ ሄን ዲሺን ኢዚሰ ዩሎ ዋዴይ ጋኪዳሰ።

7 ኢዛካ ኮይሮ አቱማ ና ዩሊዳይሳፌ ጉዬ ኢማላ አቂዛ
ኬላን አቂዛሶይ ባይንዳ ገሻሰ ናዛ ጫርቃራ ጸጸዳ ሚዛ ሲንላን
ኢሺሳዲሰ።

ሜሄ ሄሚዛይታኔ ኪታንቻታ

8 ቤቴሊሄሜ አቻን ዶርሰ ሄሚዛ አሳቲ ዶርሳ ናጊሼ ኦማርሳራ
ካሬን አቂዛይቲ ዳቴሰ።

9 ጎዳ ከታንቻይካ ኢስታኮ ዩዴስ፤ ጎዳ ቦንቾ ፖኦይካ ኢስታ ላንቄን ዩዩ ኣቋናስ ፖኢዴስ። ኢስቲካ ኬሂ ዳጋሚዳ ጊሻስ።

10 ከታንቻይ ኢስታ፡ «ባቦፍቴ! ታኒ ኣሳ ኡባስ ጊዲዛ ጌታ ኡፋይሳ ሚሺራች ኤካ ያዲስ።

11 ሃቶ ካዎ ዳዊቴ ካታማ ቤቴሊሄሜን ሼምፖ ቋሌይ ዩሌቲዴስ። ኢዚካ ጎዳ ኪርስቶሳ ጌቴቴስ።

12 ጫርቃራ ጸጾቲ ኢቺዳ ጋጪኖ ና ዴማንዴታ፤ ሄሲካ ኢንቴስ ማላታ ጊዶ» ጊዴስ።

13 ኢዛራካ ሃራ ዳሮ ሳሎ ከታንቻቲ ቤቲዳ። ጸሳ ጋላቲሼ፡

14 «ቦላ ሳሎን ጸሳስ

ቦንቾይ ጊዶ፤

ሳሮቴሊካ ቢታ ቦላን

ኢዚ ደሲዛ

ኣሳ ኡባስ ጊዶ» ጊዳ።

15 ከታንቻቲ ኢስታፌ ሻኬቲዲ ሳሎ ሲሚን ዶርሳ ሄሚዛይቲ ባ ጊዶን ኢሶይ ኢሳ፡ «ኣኔ ሃ ዪቴ ጎዳይ ኑስ ቆንጨሲዳይሳኔ ሃኒዳይሳ ቤቴሊሄሜ ካታማ ቢዲ ቤዮስ» ጊዳ።

16 ኢስቲካ ኤሌሊ ቢዲ ማራሚራ፡ ዮሴፌራኔ ሚዛ ሲንፋን ኢቺዳ ናዛ ዴሚዳ።

17 ቤኢዳፔ ጉዬ ጎዳ ከታንቻይ ናዛ ጊሻስ ኢስታስ ዮቲዳይሳ ኡባ ዛሪ ዮቲዳ።

18 ሄሚዛይቲ ዮቲዳይሳ ሲዪዳ ኣሳይ ወሪ ኬሂ ማላሌቲዴስ።

19 ጊዶ ኣቲን ማራማ ዮኦዛ ወርሳ ባ ዎዚናን ዎላ ዴንፋ ቆፓሼ ጋምኣዲስ።

20 ሄሚዛይቲካ ሃኒዳይሲ ወሪካ ከታንቻይ ኢስታስ ዮቲዳ ማላ ጊዲዲ ቤቲዳ ጊሻስ ሲዪዳይሳሲኔ ቤኢዳይሳስ ኡባስ ጸሳ ጋላቲሼኔ ቦንቺሼ ሲሚዳ።

ጋጪኖ ና ዩሱሳ ጸሳ ኬል ኤፊዳ

21 ናዚ ዩሌቲን ኦስፑንፋ ጋላሳን ቃጸሬቲዛ ዎዴይ ጋከን ኣዬያ ኢዛ ቃንፋታናፔ ካሴ ከታንቻይ ጊዳ ማላ ዩሱሳ ጌቴቲዲ ሱሚዴስ።

22-23 ሙሴ ዎጋ ማላ ኢስቲ ጌይዛ ዎዴይ ወሪን ዮሴፌይኔ ማራማ ጉፋ ናዛ ዩሱሳ ጎዳ ጸሳ ሲንፌ ሺሻናስ ኤኪዲ ዩሩሳላሚ ኬዚዳ። ሄሲካ ጎዳ ዎጋን ኮይሮ ዩሌቲዛ ኣቲማ ናይ ወሪ ጎዳስ ዲማ ጊዳና ጌቴቲዲ ጸፊቲዳይሳ ፖላናሲኔ

24 ቃሴካ ጎዳ ዋጋን ናምኡ ሃራጵታኔ ዋይኮ ናምኡ ሃራጵ ጨዋታ ጌቴቲዳይሳ ማላ ያርሾ ሽሻናሳ።

25 ሄ ዋዴ ዬሩሳላሜ ካታማን ጸሎኔ ጸሳ ባቢዛ ኢሲ ሲሞና ጌቴቲዛ ኣሲ ዴሰ፤ ኢዚካ ኢሰራኤል ናይታ ኣቶቴላ ናጊዛ ኣሳኔ ጸሎ ኣያናይ ኢዛ ቦላ ሽምፒዳ ኣሳ።

26 ቃሴካ ከርሰቶሳ ቤኦንታ ዲሼ ሃይቆንታ ማላ ጸሎ ኣያናይ ኢዛሰ ቆንጨዴሰ።

27 ኢዚካ ሄ ዋዴ ጸሎ ኣያናይ ካሌሊን ጸሳ ኬፍ ላሻ ጋል ጌሊዴሰ። ናዛ ኣዩይራኔ ኣዋራ ሙሴ ዋጋን ቤሲዛይሳ ፖላናሰ ጉላ ናዛ ዬሱሳ ኤኪዲ ጌሊዳ ዋዴ፤

28 ሲሞኒ ናዛ ኤኪ ኢዲሚዲ ጸሳ ጋላቲሼ፤

29-31 «ጎዶ! ኔ ጫቂዳ ቃላ ማላ

ሃኢ ታኒ ኔ ኣይሌይ

ኔ ኣሽዛይሳ

ታ ኣይፌራ ቤኢዳ ጊሻሰ

ሂኣ ታና ሳርን ኤካ፤

ኣሳ ኡባ ሲንላን

ኔ ጊግሲዳ ኣቶቴላ

ሃኢ ታኒ ታ ኣይፌራ ቤያዲሰ።

32 ሃይሲካ ኡባ ዴሬሰ

ጌሜቲዳይሳ ቆንጨሲዛ ፖኦ፤

ኔ ዴሬ ኢሰራኤሌሲካ

ቦንቾ» ጊዴሰ።

33 ኢዛ ኣዋይኔ ኣያ ኢዛ ጊሻሰ ሃሳዬቲዳ ዮኦዛን ማላሌቲዳ።

34 ሲሞኒካ ኢሰታ ኣንጂዴሰ፤ ማራሞካ፤ «ዳሮ ኣሳ ዋዚና ቆፋይ ቆንጫና ማላ ሃይሲ ኢሰራኤሌን ዲዛ ዳሮታሰ ጳዮሲኔ ኣቶቴላሳ፤ ኢዛ ኢጲዛይታሰ ቃሴ ማላታ ጊዳና ማላ ዶሬቲዴሰ።

35 ቃሴካ ዳሮታ ዋዚና ቆፋይ ቆንጫና ማላ ናዛ ሚሻይ ቃራ ማሻ ማላ ኔ ዋዚና ጳልቃና» ጊዴሰ።

36 ቃሴካ ኣሴሬ ባጋፌ ፋኑኤሌ ና ሃና ጌቴቲዛ ጨሚዳ ናቤይ ዳዉሰ፤ ኢዛካ ባ ኮይሮ ኣዚናራ ላፑን ላይሳ ኩሜል ዳኣዲሰ።

37 ላይሳይ ኢዚሰ ኦሰፑን ታማኔ ኦይዱ ላይሳ ጊዳና ጋካናሰ ኦማርሲኔ ጋላሰ ጸማሼኔ ዋሳሼ ጸሳ ኬላፌ ሻኬቶንታ ኣምኤቴላን ጋምኣዲሰ።

38 ሄ ዋዴካ ሽቃዳ ጸሳ ጋላታዲሰ፤ ዬሩሳላሜ ዋዜቴል ናጊሼ ዲዛይታሰ ኡባሰ ጉላ ናዛ ጊሻሰ ዮታዲሰ።

ናዚሬት ሲሞ

39 የሰፊፊፊ ማራማራ ጎዳ ዋጋን አዛዘቱዳይሳ ፖሊዲ ጋለላ አወራጃን ዲዛ ባሶ ናዚሬት ካታማ ሲሚዳ።

40 ጉላ ናዚካ ዲጪዲ ሚኒ ሚኒ ቢዳስ፤ አጼ ኤራቴላን ኩሚዳስ፤ ጸሓኒ ከያቴሊካ ኢዛ ቦላ ዳስ።

41 ኢዛ አዋይኔ ኢዛ አያ ላይላን ላይላን ፓዚጋ ቦንቻናስ ዩሩሳላሜ ቤቴስ።

42 ናዛስ ላይላይ ታማኔ ናሞኡ ላይላ ኩሚዳ ዋዴ ካሴ ሎሴ ጊዲዳይሳ ማላ ፓዚጋ ቦንቻና ኬዚዳ።

43 ፓዚጋ ባኣሌዛ ቦንቹዲ ባሶ ሲሚሺን ዩሱሲ ዩሩሳላሜን አቲዳስ። ዩሊዳይቲካ ኢዚ አቲዳይሳ ኤሪቤቴና።

44 ባናሪ ኢሲፊ ቢዛ ኦጌ አሳራ ዳስ ጊሼ ኢሲ ጋላሳ ኦጌ ቢዳ። ጊዶ አቲን ኢዚ ኢስታራ ባይንዳይሳ ኤሪዲ ባ ዳቦታ አቻኒኔ ላጌታ አቻን ዲዛኮ ጊዲ ኮዪዳ።

45 ኮዪ ኮዪዲ ቤቶንታ ኢጸን ዩሩሳላሜ ሲሚዳ።

46 ሄዡ ጋላሳፊ ጉዬ ጸሓ ኬላን ታማርሲዛይታ ጊዶን ኡቲዲ ሲዪሼ፣ አሳታ ኦይቹሼኔ ኢስታ ኦይሻ ዛሪሼ ጸሓ ኬላን ዲሺን ዴሚዳ።

47 ሲዪዳይቲ ወሪ ዩሱሳ አኬካኒኔ ኢዛ ዛርዛን ዳር ማላሌቲዳ።

48 የሰፊፊይኔ ማራማ ኢዛ ቤኢዳ ዋዴ ማላሌቲዳ። ማራማካ፣ «ታ ናዘ አይስ ሃይሳ ማላ ኦላዲ? ኔ አዋይኔ ታኒ ኔና ኮዪሼ ኬሂ ሜቶቲቲዳስ» ጋዲስ።

49 ኢዚካ ዛሪዲ፣ «ታና አይስ ኮዪዴቲ? ታኒ ታ አዋ ኬላን ዳናስ ቤሲዛይሳ ኤሪቤኬቲ?» ጊዳስ።

50 ጊዶ አቲን ኢስታስ ኢዚ ዮቲዳይሲ ጌሊቤና።

51 ሄሳፊ ጉዬ ኢስታራ ኢሲፊ ናዚሬት ዋዲዲ ኢስታስ አዛዘቲሼ ዳኢዳስ። ኢዛ አያ ማራማካ ሄ ሃኒዳ ሚሻ ኡባ ባ ዋዚናን ናጋሼ ጋሞኣዲስ።

52 ዩሱሲ አጼ ኤራቴላን፣ ጌሳኒኔ ሳባን ጸሓ ሲንላኒኔ አሳ ሲንላን ዲጪዳስ።

3

ጸማቂዛ ዮሃኒስ ቲሚርቲ

(ማቶ 3:1-12፤ ማር 1:1-8፤ ዮሃ 1:19-28)

1 ጸቢራዶሴ ጌቴቲዛ ቁሳሬይ ካዎቲዳ ታማኔ ኢቻሻንሶ ላይላን ጳጳሳ ጸላጳሳ ጌቴቲዛይሲ ዩሁዳ ቢታ ሃሪዛ ዎዴ ሄርዶሴ ጋሊላ ቢታ ሃሪዛ ዎዴ፥ ኢዛ እሻይ ፒሊጶሲ፥ ኢጶሪያሳኔ ጸራኮንዶሴ ቢታ ሃሪዛ ዎዴ ሊሳኖሲካ ኣብሎኔ ቢታ ሃሪዛ ዎዴ፥

2 ሃናይኔ ቃያፋይ ቄሴታ ሃላቃ ጊዲዳ ዎዴ ጸሳ ቃላይ ባዞ ቢታን ዲዛ ዛካራሳ ና ዮሃንሳኮ ዪዴሰ።

3 ዮሃንሲ ዮርዳኖሴ ሻፋ ኣቻን ዲዛ ዴሬታ፥ «ኢንቴ ናጋራ ኣቶ ጋናሰ ናጋራፔ ሲሚዲ ጸማቂቲቲ» ጊዲ ዮቲዴሰ፤

4 ሄሲካ ቃሴ ናሴ ኢሳያሲ፥

«ባዞን ሂዝጊዲ ዋሲዛ

ኣሳ ኮሺንቲ፥

ኅሳሰ ኦጌ ገግሲቲ፤

ባሲዲካ ሎኤሊቲ።

5 ሾባ ቢታይ ዉሪ ኩማና፤

ዙማቲኔ ዙሞቡላቲ ዉሪ

ዘቂ ጋና፤

ጌላ ኦጌይ ሲቲ ጋና፤

ሞሬቲዳ ኦጌይ ሎኦ ጊዳና።

6 ኣሳ ዜሬላ ኡባ ኣሺዛ

ጸሳ ዎልቃ ቤያና

ጊዲ ባዞን ዋሲዛ

ኣሳ ቃላ ጌሪሰ»

ጊዲ ባ ማጸፋን ጸፊዳ ማላ።

7 ዮሃንሲካ ኢዛ ኩሼን ጸማቂታና ዪዛ ኣሳሰ፥ «ኢንቴኖ ሃ ሾሻ ናይቶ! ያና ዲዛ ጸሳ ሃንቆሬ ሃካና ማላ ኦኒ ኢንቴና ዘሪዴ?

8 ኢንቴ ናጋራ ኦሶፔ ሲሚዲሳ ኤሪሲዛ ኦሶ ኦሊቲ፤ ኅ ኣዋይ ኣብራሃሜይ ኦሰ ዴሰ» ጉሰ ኣጌቲ ጊዴሰ። «ጸሲ ባሰ ጊኮ ሃ ሹቻታፔ ኣብራሃሜሰ ና ኦሊ ዴንፋናሰ ዳንዲዛይሳ ኤሪቲ»

9 ካልታይ ሚላ ቃንጸናሰ ሚላ ጸጸን ዴሰ። ሎኦ ኣይፌ ኣይፎንታ ኢታ ሚላ ዉሪ ቃንጾቲዲ ታማን ዩጌታና» ጊዴሰ።

10 ኣሳይካ፥ «ሂሰቲን ኣይ ኦሊኖ?» ጊዲ ኦይቺዴሰ።

11 ዮሃንሲካ ኣሳሰ፥ «ናሞኡ ማይኦይ ዲዛይ ኢሲ ማይኦይ ባይንዳ ኣሳሰ ኢሞ፤ ቃሴካ ቁማይ ዲዛይካ ባይንዳዴሰ ሻኪ ኢሞ» ጊዴሰ።

12 ቃራጸ ሺሺዛይቲካ ጸማቂታናሰ ዪዲ፥ «ኣሰታማሬ! ኦ ኣይ ኦሊኖ?» ጊዳና።

13 «ኢዚካ፡ ሐንቴ ኣዛዘቲዳይሳፌ ቦላራ ቃራጸ ሺሸፍቴ» ጌዴስ።

14 «ዋታዳራቲካ፡ ሐንጊ ቃሴ ኣይ ኦሊኖ?» ጌዴ ኦይቺዳ። ኢዚካ፡ ሐንጊ ሚሺካ ዋልቃን ኤኮፍቴ፤ ቃሴካ ኦናካ ዋርዶን ዋቶፒቴ፤ ኢንቴ ዳዋዛይ ኢንቴስ ጌዳና » ጌዴስ።

15 ኣሳይ ዮሃንሳ ቤኢዳ፡ «ሃይሲ ኪርስቶሳ?» ጌዴ ባ ዋዚናን ሲቂዴስ።

16 ዮሃንሲካ ኡባስ፡ «ታኒ ኢንቴና ሃላን ጸማቃይስ፤ ጌዶ ኣቲን ታ ኢዛ ጫማ ቢርሻናስ ቤሶንታይ ታፔ ኣቂዛይ ያና። ኢዚ ኢንቴና ጸሎ ኣያናኒኔ ታማን ጸማቃና።

17 ባሌዛን ዲዛ ካላ ጋፊዛፔ ጌሻናስ ካል ሱራጊዛ ላይዳይ ኢዛ ኩሺን ዴስ። ባሌዛ ኩሜል ጌሻና፤ ጌስቴዛ ቃሴ ዲኤን ቆላና፤ ጋፊዛካ ቶኦንታ ታማን ጸጋና» ጌዴስ።

18 ዮሃንሲ ኣሳ ሃራ ዱማ ዱማ ዞሬ ቃላራ ሚንሊ ዞሪሺ ሚሺራች ቃላ ዮቲዴስ።

19 ጌዶ ኣቲን ጋሊላ ቢታ ሃሪዛ ሄርዶሲ ባ ኢሻ ማች ሄርዲያዶ ኤኪዳ ጌሻሲኔ ሃራ ዳሮ ኢታ ኦሊዳ ጌሻስ ዮሃንሲ ኢዛ ሃንቂዳ ጌሻስ።

20 ካሴ ዋርዛ ቦላ ሃራ ጉጂዲ ሄርዶሲ ዮሃንሳ ቃሾ ኬላን ዩጌዴስ።

ዩሱሲ ጸማቂቲዴስ

(ማቶ 3:13-17፤ ማር 1:9-11)

21 ኣሳይ ጸማቂቲዳፔ ጉዬ ዩሱሲካ ጸማቂቲዴስ፤ ኢዚ ዋሲሺን ሳሎይ ዶዩቲዴስ።

22 ጸሎ ኣያናይካ ሃራጴ ሚሳቲዲ ኢዛ ቦላ ዋቂዴስ። «ሳሎፔ፡ ታ ዶሲዛ ናይ ኔና፤ ኔናን ታኒ ኡፋዬታይስ» ጌዛ ቃላይ ዩዴስ።

ዩሱሳ ዜሬላ ዛርኬ

(ማቶ 1:1-17)

23 ዩሱሲ ጸሳ ኦሶ ኣይኪሺን ኢዛስ ላይላይ ጌዴ ሄሹ ታሙ ጌዳና። ኣሳይካ ኢዚ ዮሴፌ ና፡ ኤሌ ና፡

24 ማቴ ና፡ ሌዌ ና፡ ሚልካ ና፡ ዩሁዳ ና፡ ዮሴፌ ና፡

25 ማቶቲዮ ና፡ ኣዋጼ ና፡ ናሆሜ ና፡ ኢሲሊሜ ና፡ ናጌ ና፡

26 ማቴ ና፡ ማቶቲዮ ና፡ ሴሜዬ ና፡ ዮሴፌ ና፡ ዩሁዳ ና፡

- 27 ዮናኔ ና፥ ኤሬሴ ና፥ ዘሩባቤሌ ና፥ ሳላቲያሌ ና፥ ኔሬ ና፥
 28 ሚልካ ና፥ ሃዴ ና፥ ዮሳ ና፥ ቆሳሜ ና፥ ኤሊሞዳሜ ና፥ ኤራ
 ና፥
 29 ኢያሶ ና፥ ኤልኤዘሬ ና፥ ኢዮራሜ ና፥ ማቲ ና፥ ኤሌ ና፥
 30 ሲሞና ና፥ ዩሁዳ ና፥ ዮሴፌ ና፥ ዮና ና፥ ኤልያቄሜ ና፥
 31 ሜሊያ ና፥ ማይናኔ ና፥ ማጸቱ ና፥ ናታኔ ና፥ ዳዊቱ ና፥
 32 ኢሴዬ ና፥ ኢዮቤዴ ና፥ ቦኤዜ ና፥ ሶሎሞኔ ና፥ ናሶኔ ና፥
 33 አሚናዳቤ ና፥ አራሜ ና፥ አሮኔ ና፥ ኤስሮሜ ና፥ ፋሬሴ ና፥
 ዩሁዳ ና፥
 34 ያቆቤ ና፥ ዩሳቃ ና፥ ኡብራሃሜ ና፥ ታራ ና፥ ናኮሬ ና፥
 35 ሴሮሄ ና፥ ኤራጉዌ ና፥ ፋሌቄ ና፥ አቤሬ ና፥ ሳላ ና፥
 36 ቃዩናሜ ና፥ አርፋኪሲዴ ና፥ ሴሜ ና፥ ኖሄ ና፥ ላሜሄ ና፥
 37 ማቱሳላ ና፥ ሄኖኬ ና፥ ያሬዴ ና፥ ማላልኤሌ ና፥ ቃዩናሜ
 ና፥
 38 ሄኖሴ ና፥ ሴቱ ና አዳሜ ና፥ ጸሳ ና ጌቴስ።

4

ዩሱሳ ፓጩቲል

(ማጥ 4:1-11፤ ማር 1:12-13)

- 1 ዩሱሲ ጸሎ ኢየሱስ ኩሚዲ ዮርዳኖሴ ሻፋፔ ሲሚዳ ማላ
 ጸሎ ኢየሱሰ ኢዛ ካሌሊዲ ባዞ ቢታ ኤፊዴስ።
 2 ሄንካ ጸላኤን ኦይዲ ታሙ ጋላስ ፓጩቲዴስ። ሄ ፓጩቲዛ
 ጋላሳታን አይኮካ ሞንታ ጊሻስ ወርሴላን ጋፊዴስ።
 3 ጸላኤይካ ዩሱሳ፥ «ኔ ጸሳ ና ጊዲኮ ኣኔ ሃይሳ ሹቻ ካል
 ጊዳና ማላ ኣዛዛ» ጊዴስ።
 4 ዩሱሲካ ዛሪዲ፥ «ኣሲ ካላን ጸላ ዴና ጌቴቲዲ ጸፊቲዴስ»
 ጊዲ ጸላኤስ ዛሪዴስ።
 5 ሄሳፌ ካሊዲ ጸላኤይ ዩሱሳ ኢሲ ቶቃ ዙማ ቦላ ኬሲዲ
 ሳሎ ጉፋንፉን ዲዛ ካዎቲታታ ቂዲዳ ኣይፊይ ጸላናስ ቤሲዲ፥
 6 «ሃይሲ ኔ ቤኢዛ ቢታ ካዎታ ጎዳቲሊኔ ቦንቾይ ወሪካ ታስ
 ኢማቲዴስ፤ ታኒካ ታ ዶሲዛዴስ ኢማናስ ዳንዳይዛ ጊሻስ ኔሰካ
 ኢማና።
 7 «ሄሳ ጊሻስ ኔኒ ኩንዳዳ ታስ ጎይኒኮ ሃይሲ ወሪካ ኔሰ
 ጊዳና» ጊዴስ።
 8 ዩሱሲካ ዛሪዲ፥ «ኔ ጎዳ ጸሳስ ኩንዳዳ ኢዛስ ጸላ ጎይና
 ጌቴቲዲ ጸፊቲዴስ» ጊዴስ።

9-11 ሄሳፌካ ዬሱሳ ዬሩሳሌምን ጸሓ ከፋ ጸራ ከሲ ኤሲዲ ጸሓ ማጸፋን፤ «ኔና ናገና ማላ ጸሲ ኔ ጊሻስ ባ ከታንቻ አዛዛና፤ ሄ ቶሆይ ሹቻን ቆጶቶንታ ማላ ከታንቻቲ ባ ኩሼራ ኔና ቆቁ ሂስቲ ኦይካና፤ ጌቲቲዲ ጸፊቲዲ ጊሻስ አኔ ኔ ጸሓ ና ጊዲኮ ሃይሳፌ ዲጌ ኩንዳ» ጊደሰ።

12 ዬሱሲካ፤ «ኔ ጎዳ ጸሓ ፓጮፋ» ጌቲቲደስ ጊዲ ዛሪደስ።

13 ጸላኤይካ ባ ፓጫናይሳ ወርሲዳፔ ጉዬ ባስ ኢንጃ ዋደይ ቤታናሼ ዬሱሳፔ ሻኬቲደስ።

ዬሱሲ ጋሊላን ታማርሶ ኦይኪደስ

(ማቶ 4:12-17፤ ማር 1:14-15)

14 ዬሱሲካ ጸሎ ኣያና ዋልቃን ጋሊላ ሲሚደስ፤ ኢዛ ጎባቴሌ ጋሊላ አቻን ዲዛ ዴሬታን ሲዬቲደስ።

15 ኢዚካ ኣይሁዳታ ዋሳ ከፋን ታማርሲሺን ኢዛ ቲሚርቴይ ሎኢን ኣሳይ ወሪካ ኢዛ ጋላቲደስ።

ናዚሬቲን ዬሱሳ ኢጶቴስ

(ማቶ 13:53-58፤ ማር 6:1-6)

16 ሄፔ ባ ዬሌቲዳ ካታማ ናዚሬቲ ዬዲ ካሴ ሳምባታ ጋላስ ኣይሁዳ ዋሳ ከፋ ጌሊዛ ማላ ጌሊዲ ጸሓ ማጸፋ ናባባናስ ዴንዲ ኤቂደስ።

17 ናቤ ኢሳያሳ ማጸፋይ ኢዛስ ኢሜቲን ማጸፋ ዶይዳ ማላ።

18-19 «ጎዳ ኣያናይ ታ ቦላ ደስ፤

ማንቆታስ ሚሺራች ቃላ

ዮታና ማላ ታና ቲይደስ፤

ቃሼቲዳይታስ ቢርሼቴስ፤

ቆቂቲ ጴላና ኦጌ

ታ ኣዋጃና ማላ፤

ሜቶቴቲዳይታ ኣሻና ማላ፤

ዶሴቲዳ ጎዳ ላይፋ ኣዋጃ

ታ ዮታና ማላ

ታና ከቲደስ»

ጊዛሶ ዴሚ ናባቢደስ።

20 ማጸፋካ ጎርዲዲ ኣይሁዳ ዋሳ ከፋ ናጊዛይሳስ ዛሪ ኢሚዲ ኡቲደስ። ኣይሁዳታ ዋሳ ከፋን ዲዛይቲ ወሪካ ኢዛ ቲሺ ሂስቲ ጸሊዳ።

21 ኢዚካ ኢስታስ፡ «ሃይሲ ኢንቴ ኢንቴ ሃይላሩ ሲዪዳ ማጻፋ ቃላይ ሃቶ ፖሌቲዳስ» ጌዳስ።

22 አሳይ ወሪካ ኢዛ ገሻስ ሎኦ ጸላላ ሃሳዬቴስ፤ ቃሴካ ኢዛ ደናፔ ኬዚዛ ሎኦ ቃላፔ ዳንዲዳይሳን ማላሌቲዲ፡ «ሃይሲ ዮሴፌ ና ጌዳኔ?» ጌዳ።

23 ኢዚካ፡ «ጳሌ ጎዶ ኔርካ ኔና ፓላ፤ ቂፊርናሆሜን ኔኒ ኦሊሺን ኑ ሲዪዳይሳ ሃይሳን ኔ ካታማንካ ኦላ ጊዛ ለሚሶ ኢንቴ ታ ሶላ ማላታናይሳስ ሲዳይ ባ» ጌዲ ኢስታስ ዮቲዳስ።

24 ቃሴካ፡ «ታ ኢንቴስ ቱማ ጋይስ፤ ናቤይ ባ ዩሌቲዳ ዳሬን ቦንቹቲ ኤሬና።

25-26 «ጌዶ ኣቲን ታ ኢንቴስ ቱማ ጋይስ፤ ሄዡ ላይሊኔ ባጋ ጋካናስ ሳሎይ ጎርዳቲን ዋልቃማ ኮሻይ ቢታ ሶላ ሃኒዳ ኤላሳ ዋዴ ሄ ላይላታን ኣዚናይ ባይንዳ ዳሮ ማጫሳቲ ኢሰራኤሌ ቢታን ዳቴስ ሺን ኤላሲ ኢስታፌ ኢሲኔይኮካ ከቲቲቤና። ጌዶ ኣቲን ሲዶና ጌቲቲዛ ቢታን ሰራጺታ ጌቲቲዛ ካታማን ዲዛ ኢሲ ኣዚናይ ባይንዳ ማጫሳይኮ ከቲቲዳስ።

27 ናቤ ኤልሳኤ ዋዴ ኢሰራኤሌ ዳሬን ዳሮ ኢንቹራቻ ሃርጊዛይቲ ዳቴስ፤ ጌዶ ኣቲን ሶሪያ ቢታ ኣስ ኒኢማኔፔ ኣቲን ሄ ዳርታፔ ኦኒካ ኢንቹራቻ ሃርጌፌ ፓጺቤና» ጌዳስ።

28 ኣይሁዳታ ዋሳ ኬላን ዲዛይቲ ወሪካ ሄሳ ሲዪዲ ዳሮ ሃንቁቲዳ።

29 ባ ኡቲዳሶሆፔ ዳንዲ ኤቂዲ ዩሱሳ ካታማፔ ካሬ ኬሲዲ ዲጌ ዛሪ ዩዳናስ ኢስታ ካታማያ ኦሴቲዳ ዙማ ሶላ ኣፎቲዛሶን ኦሴቲዳሶ ኤኪ ኤፊዳ።

30 ጌዶ ኣቲን ኢዚ ኢስታ ጌዶራ ሻኪ ዩጊዲ ኣጂ ቢዳስ።

ዩሱሲ ቱና ኣያና ኬሲዳስ

31 ሄፔካ ጋሊላ ኣዉራጃን ዲዛ ቂፊርናሆሜ ጌቲቲዛ ካታማ ዋዲዳስ፤ ሄንካ ሳሞባታ ጋላስ ዳሮ ኣሳ ታማርሶ ኦይኪዳስ።

32 ኢዚ ጎዳቴላሩ ሃሳይዛ ገሻስ ኢዛ ቲሚርቲዛን ማላሌቲዳ።

33 ኣይሁዳታ ዋሳ ኬላን ቱና ኣያናይ ኦይኪዳ ኣዳይ ዳስ። ኢዚካ ባ ቃላ ቶቁ ሂስቲዲ፡

34 «ናዚሬቲ ዩሱሳ ሃኢ ታ ዋኖ? ኔናራ ታና ኣዚ ጋሊዳ? ኔ ዩዳይ ኑና ጳይሳናሴ? ኔ ኦናኮ ታ ኤራሬስ፤ ኔ ጸሳ ጸሎዛ ጊዲኪ?» ጌዲ ዋሲዳስ።

35 ዩሱፊክ ቱና ኣያናዛ ሃ ኣዴዛፔ፡ «ጮኡ ጋዳ ኬዛ» ጊዲ ሴሪዴስ፤ ቱና ኣያናዛኪ ዳሮ ኣሳ ሲንፋን ኣዴዛ ቦላፌ ዩጊዲ ኢሲ ቆሆካ ጋሶንታ ዩዲ ኬዚዴስ፡፡

36 ኣሳይ ወሪካ ማላሊቲዲ ባ ጊዶን ኢሳይ ኢሳራ፡ «ኣሶ ሃይሲ ኣይ ጊዛ ቲሚርቲ? ጎዳቲላራኔ ዋልቃራ ኢታ ኣያና ኣዛዜስ፤ ኢስቲካ ኬዜቲስ» ጊዲ ሃሳዬቲዳ፡፡

37 ዩሱፊ ጎባቴሊካ ኡባሶ ጋኪዴስ፡፡

ዩሱፊ ዳሮ ሃርጋንቻታ ፓሊዴስ

(ማቶ 8:14-17፤ ማር 1:29-34)

38 ሄሳፌ ጉዬ ዩሱፊ ኣይሁዳ ዋሳ ኬላፌ ኬዚዲ ሲሞና ኬሌ ጌሊዴስ፡፡ ሲሞና ቦሎቴያ፡ «ዋልቃማ ሚሾ ሃርጌይ ኦይኪን ሳኬታዳ ዲሺን ዩሱፊ ኢዞ ፓላርኪ!» ጊዲ ዋሲዳ፡፡

39 ዩሱፊካ ኢዚኮ ሺቂዲ ሚሾ ሃርጌዛ ሴሪዴስ፡፡ ሚሻ ሃርጌይካ ዩዲን ሄራካ ዴንዳ ኤቃዳ ኢማላታ ሞካዴስ፡፡

40 ኣርሼይ ወላና ጊሺን ዱማ ዱማ ሃርጌይ ኦይኪዳ ኣሳ ወርሲ ኢዛኮ ኤኪ ዩዳ፡፡ ኢዚካ ሃርጊዛ ኣሳ ኡባ ቦላ ባ ኩሼ ዋሊዲ ፓሊዴስ፡፡

41 ቱና ኣያናቲ ቃሴካ ዩሱፊ፡ «ኔኒ ጸሳ ና» ጊሼኔ ዋሲሼ ዳሮ ኣሳታፔ ኬዚዳ፤ ጊዶ ኣቲን ኢዚ ኢስታ ሴሪዴስ፤ ቱና ኣያናቲ ኢዚ ኪርስቶሳ ጊዲዳይሳ ኤሪዛ ጊሻስ ኢስቲ ኢሲኖካ ሃሳያና ማላ ኮዪቤና፡፡

ጋሊላን ዩሱፊ ቲሚርቲ

42 ጋዴይ ዋንቲሺን ዩሱፊ ኢሲ ኣሲካ ባይንዳሶ ቢዴስ፡፡ ዳሮ ኣሳይካ ኢዛ ኮዪሼ ኢዚ ዲዛሶ ጋኪዴስ፡፡ ኢዚ ኢስታፌ ሻኬቲዲ ቦንታ ማላ ዲጋናስ ኮዪዳ፡፡

43 ጊዶ ኣቲን ኢስታስ፡ «ጌዴ ሃራ ካታማ ባዳ ጸሳ ካዋቲላ ሚሺራች ቃላ ዮታናስ ታስ ቤሴስ፤ ታኒ ኪቴቲዳ ጊታ ቆፋይ ሄሳ» ጊዴስ፡፡

44 ኢዚካ ዩሁዳን ኣይሁዳታ ዋሳ ኬላን ቃላ ጉጂ ዮቲዴስ፡፡

5

ዩሱፊ ኮይሮ ሃዋሪታ ጴይጊዴስ

(ማቶ 4:18-22፤ ማር 1:16-20)

1 ዩሱሲ ጌንቤሬጾ አባ ላንቄን ኤቂዲ ጾሳ ቃላ ታማርሲሺን ሲዩዛ አሳይ አዛ ኡንኤሊደስ።

2 ሄ ዎዴ ናምኡ ዋጎሎቲ አባ አቻን ዲሺን ዩሱሲ በዩደስ። ሞሌ ኦይኪዛይቲ ዋጎሎታፕ ዎዲዲ ሞሌ ጌቲታ ሜጨቴስ።

3 ዩሱሲ ዋጎሎታፕ ሲሞና ዋጎሎን ጌሊዲ በታፌ ጌዴ አባ ጊዶ ሺሻና ማላ ኦይቺዲኔ ዋጎሎ ጊዶን ኡቲዲ አሳ ታማርሲደስ።

4 ታማርሲ ወርሲዳፔ ጉዬ ሲሞና፡ «አባይ ጨማቲዛሶ ሺቃ ሞሌ ኦይካናስ አንቲ ጌቲዛ አባ ጊዶ ዩጌቲ» ጌዴስ።

5 ሲሞኒ ዩሱሳስ ዛሪዲ፡ «ጎዶ! ቃማ ኩሜል ዳቡሪ አቂዲ አሲኖካ ኦይኪቤኮ፤ ጊዶ አቲን ኔ ቃላን ጌቲዛ ኑ ዩጋና» ጌዴስ።

6 ጌቲዛ ዩጊዳ ዎዴ ዳሮ ሞሌ ኦይኪዳ። ጌቲይካ ዳኬቲደስ።

7 ሃራ ዋጎሎን ዲዛይቲ ዩዲ አስታ ማዳና ማላ ኩሼራ ወቲ ጴይጊዳ። አስቲካ ዩዲ ናምኡ ዋጎሎታ ሞሌ ኩንሊዳ። ዋጎሎቲካ ዲጌ ሚቲቲል ኦይኪዳ።

8 ሲሞና ጌቲቲዛ ጴጽሮሲ ሄሳ በኢዲ ዩሱሳ ቶሆ ቦላ ኩንዲዲ፡ «ጎዶ! ታ ናጋራንቻ ጊዲዳ ጊሻስ ታ አቻፌ ኪቻ» ጌዴስ።

9 አዚ ሄሳ ጊዳይ አዚኔ አዛራ ዲዛይቲ ኦይኪዳ ዳሮ ሞሌዛን ማላሌቲዳ ጊሻሳ።

10 ቃሴካ ሲሞና ላጌቲ ዛብዶሳ ናይቲ ያቆቤይኔ ዮሃኒሲ ወሪካ ማላሌቲዳ። ዩሱሲካ ሲሞና፡ «ባቦፋ! ሃይሳፌ ጉዬ ኔ አስ ኦይኪዛዴ ጊዳና» ጌዴስ።

11 አስቲካ ዋጎሎታ ቢታኮ ሺሺዲ ወርሲካ ዩጌ አጊዲ ዩሱሳ ካሊዳ።

ዩሱሲ አንቺራቻ ሃርጌፌ ፓሊዳ አዳዘ

12 ዩሱሲ ካታማታፕ አሲኔይን ዲሺን አንቺራቻ ሃርጌይ ቦላ ወርሲ ኦይኪዳ አሲ አሲ ሄ ካታማን ደስ፤ ሄ አዳዚካ ዩሱሳ በኢዲ አዛ ሲንፋን ኩንዲዲ፡ «ጎዶ! ኔ ኮይኮ ታና ፓላና ዳንዳያሳ» ጊዲ ዋሲደስ።

13 ዩሱሲ ባ ኩሼ ዩዲ ቦቺዲ፡ «ታ ዶሳዲስ፡ ፓጻ» ጌዴስ። አንቺራቻይ ሄራካ ጳይደስ።

14 ዬሱሲ ኢዛስ፡ «ሃይሳ ኦናስካ ዮቶፓ፤ ጊዶ ኣቲን ባዳ ኔና ቄሴ ሃላቃስ ቤሳ፤ ኢስታስ ማርካ ጊዳና ማላ ኔ ጌዬዳይሳስ ሙሴይ ኣዛዚዳ ያርሾዛ ሺሻ» ጊዱ ኣዛዚዳስ።

15 ጊዶ ኣቲን ኢዛ ገሻስ ኣሳይ ሃሳይዛ ዋሬይ ካሴፔ ኣኪ ኣኪ ቢዳስ፤ ከሂ ዳሮ ኣሳይ ኢዛ ሃሳያ ሲያናሲኔ ባና ሳኪዛ ሃርጌፌ ፓጸናስ ኢዛኮ ሸቂዳስ።

16 ዬሱሲ ዳሮ ዋዴ ኣሲ ባይንዳሶ ቢዱ ዋሲዳስ።

ዬሱሲ ፓሌዳ ሲላ ኣዳዛ
(ማቶ 9:1-8፤ ማር 2:1-12)

17 ዬሱሲ ታማርሲሺን ኣሳይ ጋለላፔኔ ዩሁዳፔ ቃሴካ ዩሩሳላሜፔ ዩዳ ፋርሳዌቲኔ ዋጋ ታማርሲዛይቲ ሄን ኡቲዳ። ኢዚ ፓላና ማላ ጎዳ ዋልቃይ ኢዛራ ዳስ።

18 ሄ ዋዴ ኣሳይ ኢሲ ኩሜላ ቦላይ ሲሊዱ ቃጽንታ ሃርጋንቻ ሃላራ ቶኪ ኤኪ ዩዱ ኬሌ ጌልሊዱ ዬሱሳ ሲንላን ዋላናስ ፓጪዳ።

19 ኣሳ ዳሮቴላፌ ዴንዲዳይሳን ኬሌ ጌልላናስ ጸኔቲዳ ገሻስ ፑዴ ኬላ ካራ ቦላ ኬዚዲኔ ካራ ቃሪዱ ሃርጋንቻዛ ሃላራ ቶኪ ኤሂዱ ኣሳ ጊዶራ ዬሱሳ ሲንላን ዋሊዳ።

20 ዬሱሲ ኢስታ ኣማኖ ቤኢዱ፡ «ሃይሶ ኔኒ ኔ ናጋራፔ ማሪታዳሳ» ጊዳስ።

21 ሙሴ ዋጋ ጸፊዛይቲኔ ፋርሳዌቲ፡ «ሃይሲ ጸሳ ቦላ ጸላቴላን ሃይሳሶ ሃሳይዛይ ኢዚ ኦኔ? ኢሲ ጸሳፌ ኣቲን ናጋራ ማራናስ ኦኒ ዳንዳይዜ?» ጊዱ ቆፒዳ።

22 ዬሱሲ ኢስታ ቆፋ ኤሪዳ ገሻስ፡ «ኢንቴ ኢንቴ ዋዚናን ኣይስ፡ ሄሳሶ ቆፒቲ?»

23 «ኔ ናጋራይ ኣቶ ጌቴቲዳስ» ጉሳፌኔ «ዴንዳዳ ባ» ጉሳፌ ኣዋይሲ ካወሺ?

24 ጊዶ ኣቲን ታ ሃይሳ ጊዳይ ኣሳ ናስ ቢታ ቦላ ኣስ ናጋራፔ ማራናስ ጎዳቴሊ ዲዛይሳ ኢንቴ ኤራና ማላ» ጊዳስ፤ ቃሴካ ሄ ሲላ ኣዳዛ፡ «ኔና ጋይስ! ዴንዳ ኤቃ! ኔ ሃላ ቶካዳ ባ!» ጊዳስ።

25 ኢዚ ሄራካ ኢስታ ሲንላን ዴንዲ ኤቂዳስ፤ ካሴ ባ ኢቺዳ ሃላ ቶኪዱ ጸሳ ጋላቲሺ ባሶ ቢዳስ።

26 ሄ ዋዴ ኣሲ ዉሪ ማላሌቲዳስ። ጸሳ ጋላቲሺ፡ «ሃቶ ማላሊሲዛዝ ቤኢዳስ» ጊዱ ዳሮ ባቢዳ።

ማቶሳ ጌቴቲዛ ሌዌ ጸይጌቴል

(ማቶ 9:9-13፤ ማር 2:13-17)

27 ሄሳፌ ጉዬ ዬሱሲ ሄፔ ኬዚ ቢዳሰ። ሌዌ ጌቴቲዛ ኢሲ ቃራጸ ቃንጺሲዛይሲ ቃራጸ ቃንጺዛሶን ኡቲዳይሳ ቤኢዲ፡ «ታና ካላ» ጌዴሰ።

28 ኢዚካ ወርሲ አጊዲ ኢዛ ካሊዳሰ።

29 ሌዌይካ ዬሱሳስ ባ ኬላን ጌታ ዲጊሳ ዲጊሲዳሰ። ቃራጸ ቃንጺሲዛ ዳሮ አሳቲኔ ሃራ አሳቲካ ኢሰታራ ኢሲፌ ማዳን ኡቲዳ።

30 ፋርሳዌቲኔ ኢሰታ ጸፌቲ፡ «ቃራጸ ቃንጺሲዛይታራኔ ናጋራንቻታራ ኢሲፌ አዛሰ ሜቲ?» ጌዲ ዬሱሳ ካሊዛይታ ቦላ ዙዙሜቲዳ።

31 ዬሱሲካ ኢሰታሰ፡ «ሃርጋንቻታሰ አቲን ፓጸ አሳሰ አኪሜ ኮሺና።

32 ታኒካ ናጋራንቻታ ማሮቴላኮ ዛራናሰ ያዲሰ አቲን ጸሎታ ጸይጋናሰ ያቤኬ» ጌዴሰ።

ጸማ ጊሻሰ ኦይሼቲዳ ኦይሾ

(ማቶ 9:14-17፤ ማር 2:18-22)

33 ኢሰቲካ ዛሪዲ፡ «ዮሃንሳ ካሊዛይቲ ዳሮ ዋዴ ጸሜቲሴኔ ዋሴቴሰ። ፋርሳዌታ ካሊዛይቲካ ኢዛሶ ኦሌቴሰ። ኔና ካሊዛይቲ ጌዲኮ ኡባ ዋዴ ሜቲሴኔ ኡዬቴሰ» ጌዳ።

34 ዬሱሲካ ኢሰታሰ ዛሪዲ፡ «ሚሺራይ ኢሲፌ ዲሺን ዲጊሳሰ ጸይጌቲዳይቲ ጸማናሰ ቤሲዜ?

35 ጌዳ አቲን ሚሺራይ ኢሰታፌ ሻኬታና ዋዴይ ያና፤ ኢሰቲ ሄ ዋዴ ጸማና» ጌዴሰ።

36 ኢሰታሰ፡ «ኦራላ ማይኦፌ ቃንጺ ኤኪዲ ጋልኦ ማይኦ ቦላ ዋሊ ሲኪዛዴይ ዳና፤ ዋሊ ሲኪኮ ኦራላዚ ጋልኦራ ጋንጎታ ጊሻሰ ጋልኦዛ ዳካና።

37 ዋይኔፔ ኦሴቲዳ ኦራላ ጫጃ ጋልኦ ሉካሞን ኩንሊዲ ዋሊዛ አሲ ኦኒካ ዳና፤ ዋሊዛ ጌዲኮ ዋይኔፔ ኦሴቲዳ ኦራላ ጫጃይ ጋልኦዛ ዳካና። ዋይኔ ጫጃዚካ ቢታን ጉካና፤ ጋልኦ ሉካሞይ ሲንሳፌ ጎኑንታዝ ጌዳና።

38 ሄሳ ጊሻሰ ኦራላ ዋይኔ ጫጃይ ኦራላ ኦጎሮን ጉጃታናሰ ቤሴሰ።

39 ሂሰቲኮ ጫላ ዋይኔ ጫጃ ኡዱዳፔ ጉዬ ጫሎንታዝ ኡያና ኮይዛይ ኦኒካ ዳና ጋሶይካ ጫላይ ሎኦ ጌዲዳ ጊሻሳ» ጌዴሰ።

6

ሳምባታ ጊሻስ አይሼቲዳ አይሾ

(ማቶ 12:1-8፤ ማር 2:23-28)

¹ ኢሲ ሳምባታ ጋላስ ዩሱሲ ካላ ጊዶራ አጁ ቢሺን ኢዛ ካሊዛይቲ ቲያ ጸጸ ኤኪዲ ባ ኩሼን ሺጌቺ ሚሺን፤

² ፋርሳዌታፔ ኢሲ ኢሲ አሳቲ፤ «ሳምባታ ጋላስ ኦላናስ ቤሶንታይሳ አይስ ኦሴቲ?» ጊዳ።

³ ዩሱሲካ ኢስታስ፤ «ዳዊቲ ኢዛራ ዲዛ አሳቲ ጋፊዳ ዎዴ ኢዚ ኦሊዳይሳ ናባቢቤኬቲ?»

⁴ ኢዚ ጸሳ ኬሌ ጌሊዲ ቄሴቲ ጸላ ማና ማላ አዛዜቲዳ ዱማ ኡኬላ ባስ ሚዲ ባናራ ዲዛይታስ ኢሚዴስ» ጊዲ ዛፊዴስ።

⁵ ቃሴካ ዩሱሲ፤ «አሳ ናይ ሳምባታ ጎዳ» ጊዲ ኢስታስ ዮቲዴስ።

ዩሱሲ ፓሊዳ ኩሼ ሲላ አዴዛ

(ማቶ 12:9-14፤ ማር 3:1-6)

⁶ ዩሱሲካ ሃራ ሳምባታ ጋላስ አይሁዳ ዋሳ ኬሌ ጌሊዲ ታማርሲሺን ኡሻቻ ኩሼይ ሲሊዳ ኢሲ አሲ ሄን ዴስ።

⁷ ሙሴ ዎጋ ታማርሲዛይቲኔ ፋርሳዌቲ ዩሱሳ ዋታናስ ጋሶ ኮዪዲ እኔ ኢዚ ሳምባታ ጋላሳን አዴዛ ፓሊኮ ቤያና ጊዲ ናጊሼ ጋምኢዳ።

⁸ ዩሱሲካ ኢስታ ዎዚና ቆፋ ኤሪዲ ኩሼይ ሲሊዳ አዴዛ ኡባ ሲንላን፤ «ዴንዳ ኤቃ» ጊዴስ። አዴዚካ ዴንዲ ኤቂዴስ።

⁹ ዩሱሲካ ኢስታ፤ «ታ ኢንቴና ኢሲ ሚሽ አኔ ኦይቻይስ፤ ሳምባታ ጋላስ ኦላናስ ቤሲዛይ ሎኦ ኦሶዬ? ኢታ ኦሶ? ሽምፖ አሾ ዎይኮ ጳይሶ?» ጊዲ ኦይቺዴስ።

¹⁰ ቃሴካ ዩሱሲ ባ ዩሾን ዲዛ ኡባ ዩሼ ጸሊዳፔ ጉዬ አዴዛ፤ «ኔ ኩሼ ፒዲሳ» ጊዴስ፤ አዴዚካ ዩሱሲ ጊዳ ማላ ኦሊዴስ። ኢዛ ኩሼይካ ፓጺዴስ።

¹¹ ጊዶ አቲን አሳቲ ሃንቄቲዳ፤ ዩሱሳ ቦላ አይ ኦላናስ ኮሺዛኮ ባ ጊዶን ዘሬቲዳ።

ታማኔ ናምኡ ሃዋሬታ ዶሬቴስ

(ማቶ 10:1-4፤ ማር 3:13-19)

¹² ሄ ጋላሳታፔ ኢሲ ጋላስ ዩሱሲ ዋሳናስ ዙማ ቦላ ኬዚዲ ኦማርስ ኩሜስ ጸሳ ዎሲሼ አቂዴስ።

13 ጋዴይ ዋንቲሺን ባና ካሊዛይታ ጸይጊዲ ኢስታፌ ታማኔ ናምእታ ደሪዳስ። ኢስታካ፥ «ሃዋሬታ» ጊዲ ሱንሊዳስ።

14 ኢስቲካ ጸጽሮሳ ጊዲ ሱንሊዳ ሲሞናኔ ኢዛ ኢሻ ኢንዲራሳ፥ ያቆቤ፥ ዮሃንሳ፥ ፒሊጶሳ፥ ባርቴሌሞሳ፥

15 ማቶሳ፥ ቶማሳ፥ ኢልፊዮሳ ና ያቆቤ፥ ባ ባጋስ ሚሼቲዛ ሲሞና፥

16 ያቆቤ ና ዩሁዳኔ ዬሱሳ ኣሊ ኢሚዳ ኣስቆሮንቶ ዩሁዳ።

ዬሱሲ ዳሮ ኣስ ታማርሲዳሲኔ ፓሊዳስ

(ማቶ 4:23-25)

17 ዬሱሲካ ኢስታራ ኢሲፌ ዙማ ቦላፌ ዱጌ ዋጂዲ ዴምባሶን ኤቂዳስ። ኢዛ ካሊዛይታፔ ዳሮ ኣሳይ ሄን ዴስ፥ ዩሁዳፔኔ ዬሩሳላሜፔ፥ ቃሴካ ጸሮሴፔኔ ሲዶና ኣባ ኣቻፌ ዩዳ ኬሂ ዳሮ ኣሳይካ ሄን ዴስ።

18 ኢስቲካ ዩዳይ ዬሱሲ ጊዛይሳ ሲያናሲኔ ሃርጌፌ ፓጸናሳ፤ ቱና ኣያናይካ ዋዩሲዛይቲ ወሪ ፓጺዳ።

19 ዋልቃይካ ኢዛፔ ኬዚዲ ዳሮታ ፓሊዛ ጊሻስ ኣሳይ ወሪ ኢዛ ቦቻናስ ዩዳስ።

ኣንጅኔ ዋዬ ጋሶታ

(ማቶ 5:1-12)

20 ዬሱሲካ ባና ካሊዛይታስ፥ «ጸሳ ካዋቴላይ ኢንቴስ ጊዲዳ ጊሻስ ኢንቴኖ ማንቆቶ! ኢንቴ ኣንጃቲዳይታ፤

21 «ኢንቴ ጉዬፔ ካላና ጊሻስ

ሃኢ ጋፊዛይቶ!

ኢንቴ ኣንጃቲዳይታ፤

ኢንቴ ጉዬፔ ሚጫና ጊሻስ

ኢንቴኖ ሃኢ ዬኪዛይቶ!

ኢንቴ ኣንጃቲዳይታ፤

22 ኣሳይ ታ ጊሻስ ኢንቴና ኢጺሺን

ባ ጊዶፌ ሻኪሺን፥

ቦሪሺኒኔ

ኢንቴና ኢታ ሱንላራ ጸይጊሺን

ኢንቴ ኣንጃቲዳይታ፤

23 «ኢንቴስ ሳሎን ጊታ ዋይቶይ ዲዛ ጊሻስ ሄ ዋዴ ኡፋይሳን ጉፒቴ፤ ኣይስ ጊኮ ኢስታ ኣዋቲ ናቤታ ቦላ ሄሳሉ ኦሊዳ።

24 «ጊደ ኣቲን ኢንቴኖ ዱሬቶ!
ኢንቴ ሃኢ ኡፋዬቲዳ ጊሻስ

ኢንቴስ ኣዬ ኣና!
25 ኢንቴኖ ሃኢ ካሊዳይቶ!
ኢንቴና ኣዬ ኣና!
ኢንቴ ጉዬፔ ጋፋና፤
ኢንቴኖ ሃኢ ሚጪዛይቶ!
ኢንቴስ ኣዬ ኣና!
ኢንቴ ጉዬፔ
ሚሼታና፤ ዩካና።

26 «ኣሲ ዉሪ ኢንቴ ጊሻስ ሎኦ ሃሳይዛ ዎዴ ኢንቴስ ኣዬ ኣና!
ኣይስ ጊኮ ኢስታ ኣዋቲ ዎርዶ ናቤታስ ሄሳ ማላ ኦሊዳ።

ሞርኬ ሲቆ ጊሻስ
(ማቶ 5:38-48፤ 7:12)

27 «ጊደ ኣቲን ታ ዮቲዛይሳ ሲዩዛይቶ! ታኒ ኢንቴስ ዮቲዛይ
ኢንቴ ሞርኬታ ሲቂቴ፤ ኢንቴና ኢዲዛይታስ ሎኦ ኦሊቴ፤

28 ኢንቴና ቃንጊዛይታ ኣንጂቴ፤ ኢንቴና ቆሂዛይታስ ዎሲቴ፤

29 ኢሲ ሻጋላን ባቂኮ ናሞኣንሶ ሻጋላ * ጉጃ ቤሳ፤ ኦኒካ ኔ
ቦላራ ማይኢዳይሳ ቃሪ ኤኪኮ ጋላራ ማይኢዳይሳካ ዲጎፋ።

30 «ኔና ዎሲዛ ኡባሰ ኢማ፤ ኔ ሚሻ ኤኪዳ ኣሲ ዛሪ ኢማና
ማላ ኦይቾፋ።

31 «ኣሲ ኢንቴስ ኦፋና ማላ ኢንቴ ኮይዛይሳሶ ኢንቴካ ሃራ
ኣሳስ ኦሊቴ።

32 «ናጋራንቻቲካ ባና ሲቂዛይታ ሲቂዛ ጊሻስ ኢንቴ ኢንቴና
ሲቂዛይታ ጸላ ሲቂኮ ኢንቴስ ኣይ ዱማ ኣንጀይ ዲዜ?

33 ኢንቴ ኢንቴስ ሎኦ ኦሊዛይታስ ጸላላ ሎኦ ኦሊኮ ኢንቴስ
ኣይ ዱማ ኣንጀይ ዲዜ? ኣይስ ጊኮ ናጋራንቻቲካ ሄሳሶ ኦሊቴስ።

34 ታልኤ ኤኪዲ ዛራና ዳንዳዬቴስ ጊዛይታስ ጸላ ኢንቴ
ታልኤኮ ኢንቴ ሃራ ኣይ ዱማ ኣንጀ ዳማኔ? ኣይስ ጊኮ
ናጋራንቻቲካ ኢስቲ ታልኤዳይሳ ሲሬ ዛሪዲ ኤካናስ ናጋራንቻታስ
ታልኤቴስ።

35 ጊደ ኣቲን ጸሲ ባና ጋላቶንታይታሲኔ ኢታታስ ኪያ ጊዲዳ
ማላ ኢንቴ ሞርኬታ ሲቂቴ፤ ሎኦ ኦሊቴ፤ ጉዬፔ ዛሪ ኤካናስ
ቆፖንታ ዲሼ ታልኤ ኢማቴ፤ ሄሳንካ ኢንቴስ ኩሼ ዛርይ ጊታ
ጊዳና፤ ቃሴካ ኢንቴ ዎጋ ጸሳ ና ጊዳና።

* 6:29 ሻጋላ፡ ሻጋላ ጌቲቲዛይሲ ኢሲ ኢሲ ባጋ ጋሞሶ ቃላን ቂንጸሌ ጌቲቲስ።

6:31 ማቶ 7:12

36 እንቲ አዋይ ኪያ ገዲዳ ማላ እንቲካ ኪያታ ገዲቲ።

ሃራ አሳ ቦላ ፒርዳናሰ ቤሴና

(ማቶ 7:1-5)

37 «እንቲ ሃራታ ቦላ ፒርዳፍቲ፤ እንቲ ቦላካ ፒርዳፍቲ፤ እንቲ ቦላ ፒርዳይ ዳሮንታ ማላ ሃራታ ቦላ ፒርዳ ዳሪሶፍቲ፤ አሳሰ አቶ ገቲ፤ እንቲሰካ አቶ ገቲታና።

38 እሚቲ! እንቲሰካ እሚታና፤ እንቲሰ እንቲ ማኪዳ ሚሻን ሰሚዲ ማኬታና፤ ሃራፔካ ናቂ ባቂቲዲ ዪጌቲ ኩሚዲ ዋራ ጉካናሼ ሎኦ ማኪዳ ሚሻን ማኬቲዲ እንቲሰ እሚታና» ገደሰ።

39 ቃሴካ ዬሱሲ ኢሰታሰ ሌሚሶን፡ «ቆቂይ ቆቂ ካሌላናሰ ዳንዳይዜ? ካሌሊኮካ ናሞኣቲ ኢሶይ ኢሳራ ኦይኬቲዲ ኦላን ጌሌቲኔ?

40 ታማሪይ ባና ታማርሲዛዴፌ አጼና፤ ገዶ ኣቲን ሎኤሊ ታማርዳ አሲ ዉሪ ባ አሰታማሪ ማላ ገደሰ።

41 «ኔ አይፌ ገደን ዲዛ ቱሳ ጸሎንታ ዳሼ ኔ አሻ አይፌ ገደን ዲዛ ቡራ አይሰ ጸላይ?

42 ኔ አይፌን ዲዛ ቱሳ ቤኦንታ ኔ አሻ፡ «ታኒ ኔ አይፌን ዲዛ ቡራ አኔ ኬሳይሰ» ጋናሰ ዋሰታ ዳንዳይያ? ኔኖ ቆጼፔ ቆሞን ሃኒዛይሶ ኮይርታዳ ኔ አይፌን ዲዛ ቱሳ ኬሳ፤ ሄሳፌ ጉዬ ኔ አሻ አይፌን ዲዛ ቡራ ኬሳናሰ ሎኤላ ጸላንዳሳ።

ሚሊ ባ አይፌን ኤሬቲሰ

(ማቶ 7:17-20፤ 12:34-35)

43 «ሎኦ ሚሊ ኢታ አይፌ አይፌና፤ ቃሴካ ኢታ ሚሊ ሎኦ አይፌ አይፌና።

44 ሚሊ ዉሪካ ባ አይፌን አይፌን ኤሬቲሰ፤ ኣጉንላፌ ባላሴ ጌቲቲዛ ሚላ አይፌይ ማጽቲና፤ ላዴፔ ዋይኔ አይፌይ ቃንጾቲና።

45 ሎኦ አሲ ባ ዋዚና ኩሚዳ ሎኦ ሚሻ ኬሴሰ፤ ኢታ አሲካ ባ ዋዚና ኩሚዳ ኢታ ሚሻፌ ኢታ ኬሴሰ፤ አሲ ዉሪካ ባ ዋዚና ኩሚ ፓላሂዳይሳ ባ ዶናን ሃሳዬሰ።

ናሞኡ ቆሞ ኬሌ ኬዲዛ አሳታ

(ማቶ 7:24-27)

46 «ታኒ ገዛይሳ ኦሌኬታ ሺን አይሰ ታና፡ «ጎዶ! ጎዶ!» ጌቲ?

47-48 ታኮ ዪዲኔ ታ ቃላ ሲዪዲ ፖሊዛይ ወሪ ኦና ሚሳቲዛኮ ታ ኢንቴና ቤሳና፤ ኬሌ ኬጸናሰ ዘቂ ኦሊ ቦኪዲ ሹቻ ቦላን ባ ኬሌ ኬጸዲ ኦሳ ሚሳቲሰ። ሃሮ ሃሊ ዪዲ ሄ ኬላ ሱጊዴሰ፤ ጊዶ ኦቲን ሚኒ ኬጸቲዳ ጊሻሰ ቃላናሰ ዳንዳይቤና።

49 ጊዶ ኦቲን ታ ቃላ ሲዪዲ ፖሎንታ ኦሲ ባ ኬሌ ሎኤሊ ባሶንታኔ ጊዶን ሹቻ ዩጎንታ ኬጸዲ ኦሳ ሚሳቲሰ፤ ሃሮይካ ኬላ ሱጊን ኬላይ ሄራካ ኩንዲዲ ኢታ ላሌላ ላሌቲዴሰ» ጊ ዮቲዴሰ።

7

ዩሱሲ ፓሊዳ ማቶ ሃላቃዛ አሽካራዛ

(ማቶ 8:13፤ ዮሃ 4:3)

1 ዩሱሲ ሄሳ ወርሲካ ዴሪ ሲንላን ዮቲ ወርሲዳፔ ጉዬ ቂፊርናሆሚ ጊዛሶ ቢ ጌሊዴሰ።

2 ሄን ቂፊርናሆሚን ማቶ ሃላቃይ ዴሰ፤ ሄ ኦዴዛሰ ኢዚ ሲቁዛ አሽካራይ ሃርጊዲ ሃይቆሰ ሽምፖ ቦላ ዴሰ።

3 ኢዚካ ዩሱሳ ጊሻሰ ሲዪዲ፡ «ባ አሽካራ ፓላና ማላ ዩሱሳ ዋሴሪኬቲ!» ጊዲ ኢሲ ኢሲ ኦይሁዳ ባጋ ኦሳታፔ ጪማታ ዩሱሳኮ ዩዲዴሰ።

4 ከቲቲዲ ቢዳ ኦሳቲ ዩሱሳኮ ዪዲ፡ «ሃይሳ ኦዴዛ ጊሻሰ ኔ አሽካራዛ ፓላና ቤሴሰ።

5 ኦይሰ ጊኮ ሃይሲ ኦዴዚ ኑ ኦሳ ዳሮ ዶሴሰ፤ ኑሰካ ኦይሁዳ ዋሳ ኬሌ ኬጸሲዳይ ኢዛ» ጊዲ ሚንሊ ዋሲዳ።

6 ዩሱሲካ ኢሰታራ ቢዴሰ። ዩሱሲ ኦዴዛ ኬላኮ ማቲዛ ዋዴ ኦዴዚ ባ ላጌታ ዩሱሳኮ ዩዲዲ፡ «ጎዶ! ኔ ታ ኬሌ ጌላናሰ ቤሴና፤ ታኒካ ኔና ታ ኬሌ ጌልላናሰ ቤሲዛ ኦሰ ጊዶንታ ጊሻሰ ሃ ያሼ ዳቡሮፓ።

7 ታኒ ኔ ሲንላን ቤታናሰ ቤሶንታ ኦሰ ጊዲዳ ጊሻሰ ኔኮ ባቤኬ፤ ሄሳ ጊሻሰ ኔኒ ሄን ዳዳ ቃላ ጸላ ጊኮ ታ አሽካራይ ፓጸና።

8 ታሰካ ታና ኦዛዚዛ ኦሲ ታፔ ቦላራ ዴሰ። ታፔ ጋርሳራ ታኒ ኦዛዚዛ ዋታዳራቲ ዴቲሰ። ኢሳ፡ «ሃ ያ!» ጊኮ ዩሰ፤ ኢሳ፡ «ሄ ባ!» ጊኮ ቤሰ፤ አሽካራይካ፡ «ሄሳ ኦላ!» ጊኮ ኦዛዜቲዳይሳ ኦሌሰ» ጊዴሰ።

9 ዩሱሲካ ኦዴዚ ጊዳይሳ ሲዪዲ ኦዴዛ ሃናቲላን ማላሌቲዴሰ፤ ጉዬ ሲሚዲ ባና ካሊዛ ዴራሰ፡ «ታ ኢንቴሰ ጊዛይ ሃይሳ ማላ ጊታ ኦማኖ ሃራይ ኦቶሺን ኢሰራኤሌ ናይታ ጊዶንካ ዴማቤኬ» ጊዴሰ።

10 ዬሱሳኮ ከቴቲዳ አሳቲ ጉዬ ከቲዳ ሃላቃዛሶ ሲሚዲ አሸካራዚ ፓጺዳይሳ ቤኢዳ።

ዬሱሲ ሃይቆፔ ፓሊዳ አምኤይ ናዛ

11 ሄሳፌ ጉዬ ዬሱሲ ጋምኦነታ ዲሼ ናይኔ ጌቴቲዛ ካታማ ባና ካሊዛይታራኔ ዳሮ ዳሬራ ኢሲፌ ቢዳስ።

12 ኢዚ ቢዲ ካታማ ጌሊዛ ሚጸ ጋኪሺን ሄ ካታማይፔ ዳሮ አሳይ አሃ ቶኪ ኤኪዲ ኬዚ ዎፋዴሰ። ሃይቁዳይሲ ባ አዬይሰ ኢዚ ሚጸ ኢሲኖ። አዬይሰካ አዚናይ ባ፤ ካታማፔ ዳሮ አሳይ ኢዚራ ኢሲፌ ዴሰ።

13 ጎዳይካ ኢዞ ቤኢዳ ዎዴ ኢዚሰ ሚሹቲዲ፥ «አይኮይ ባ፤ ዬኮፋ!» ጌዴሰ።

14 ሸቁዲ አሃ ቶኪዳ ሃላ ቦቹን አሃ ቶኪዳይቲ ሲቲ ጌ ኤቁዳ። ዬሱሲካ፥ «ሃይሶ ናዞ ኔና ጋይሰ ዴንዳ!» ጌዴሰ።

15 ሃይቁዳ ናዚካ ሱሪ ኡቲዲ ሃሳያ ኦይኪዴሰ። ዬሱሲካ ናዛ አዬይሰ ኤፊ አሚዴሰ።

16 አሳይ ዉሪካ ኬሂ ባቢዲ ጸሳ ጋላቲሹ፥ «ጌታ ናቤይ ኑ ጊዶፌ ዴንዲዴሰ፤ ጸሲካ ሃይሳ ዴሬዛ ዪዲ ቤዪዴሰ» ጌዴሰ።

17 ሃይሲ ዬሱሳ ጊሻሰ ሃሳዬቲዛ ሎኦ ሃሳያይ ኩሜላ ዩሁዳኒኔ ዩሁዳ ዩሾን ዲዛ ዴሬታን ኬዚዴሰ።

ጸማቂዛ ዮሃንሳፔ ዬሱሳኮ ከቴቲዳ አሳታ

(ማቶ 11:19)

18 ጸማቂዛ ዮሃንሳ ካሊዛይቲካ ሃይሳ ኡባ ዮሃንሳሰ ዮቲዳ። ዮሃንሲካ ኢሰታ ጊዶፌ ናምኦታ ጴይጊዲ፥

19 «ኢዚ ያና ጌቴቲዲ ሃሳዬቲዛይሲ ኔኔዬ? ሃራ አሰ ናጊኖ? ጌ ኦይቹቲ» ጊዲ ጎዳኮ ዬዲዴሰ።

20 ቢዳ አሳቲ ዬሱሳኮ ጋኪዲ፥ «ጸማቂዛ ዮሃንሲ፥ «ኢዚ ያና ጌቴቲዲ ሃሳዬቲዛይሲ ኔኔዬ? ሃራ አሰ ናጊኖ?» ጊዲ ኔኮ ኑና ዬዲዴሰ» ጊዳ።

21 ሄ ዎዴ ዬሱሲ ዳሮ አሳ ዎዬፔ፥ ሃርጌፌኔ ቱና አያናታፔ ፓሊዴሰ። ዳሮ ቆቁታ አይፌይካ ጴሊዴሰ።

22 ዮሃንሲ ከቲን ኢዛኮ ዪዳይታ፥ «ቢዲ አንቴ አንቴ አይፌራ ቤኢዳይሳኔ ሲዪዳይሳ ዮሃንሳሰ ዮቲቴ። አይፌ ቆቁቲ ጴሊቴሰ፤ ቶሆ ዎቤቲ ሱሬ ሄሜቴቴሰ፤ አንቹራቻ ሃርጊዛይቲ ፓጺዳ፤ ቱሊቲ ሲዪዳ፤ ሃይቁዳይቲ ሃይቆፔ ዴንዲዳ፤ ማንቆታሰ ሚሺራች ቃላይ ዮቲቴሰ።

23 ታናን ጵጵቶንታ አሲ ወሪካ አንጃቲዳይሳ» ገደሰ።

24 የሃኒሲ ከቲዳ አሳቲ ዬሱሳ አቻፌ ቢዳፔ ጉዬ ዬሱሲ ዳሮ አሳሰ የሃኒሳ ገሻሰ፡ «አንቱ አይ ቤያናሰ ባዞ ከዚዳቲ? ጫርኮይ ያኔ ሃ ቃሴሊዛ ሾሞቦቆ ቤያናሴ?

25 አይ ቤያናሰ ከዚዳቲ? ሎኢዛ ማይኦ ማይኢዳ አሰ ቤያና ከዚዳቲ? ሎኦ ማይኦ ማይኢዳ ዋርጺ ዋርጺ ገዛይቲ አሻሎ ዲሰ ዲዛይቲ ካዎ ከላን ዳቲሰ።

26 ሂሰቲኮ አይ ቤያናሰ ከዚዳቲ? ናቤ ቤያናሴ? ኤ ታ አንቲሰ ቱማ ጋይሰ፤ አንቲ ከዚዳይ ናቤፔ አጁዛዳ ቤያናሳ።

27 ጸሳ ቃላን፤ ሳሳ ባና ኦፔ ኔሰ ባሲ ሎኤላና ከቲቲዳ አሰ ታ ኔፔ ሰንሳራ ዬዳና፤ ጌቲቲዳ ኢዛ ገሻሰ ጸፊቲዳይሲ ኢዛኮ።

28 «ታኒ አንቲሰ ገዛይ ማጫሳፌ ዬሌቲዳ አሳ ገደን የሃኒሳፔ አጁዛዳይ ኦኒካ ዳና፤ ጸሳ ካዎቲላን ገዲኮ አሰ ኡባፌ ጉል ጌቲቲዳ አሲ የሃኒሳፔ አጁና» ገ ዮቲዳሰ።

29 ቃራጸ ቃንጺሲዛይቲካ አቶንታ ሃይሳ ዬሱሳ ቃላ ሲዱዳይቲ ወሪካ የሃኒሳ ኩሼን ጸማቂቲዳ ጸሳሰ ቤሲዛ ቦንቾ ኢሚዳ።

30 ፋርሳዌቲኔ ሙሴ ዋጋ ኤራንቻቲ የሃኒሳ ኩሼን ጸማቂቶንታ ገሻሰ ጸሲ ኢሰታሰ ዋና ቆፋ ኦሊዲ ሺሺዳይሳ ሂራይሲዳ።

31 ቃሴካ ዬሱሲ ዛሪዳ፡ «ሂሰቲኮ ሃኢ ዬሌታ አዛን ለሚሶ? ኢሰቲ አይ ሚሳቲዞ?

32 ገያን ኡቲዳ ባ ገደን ኢሶይ ኢሳራ ጸይጌቲዳ፡ «አንቲሰ ኦኒ ዲል ዲጺዶሰ ሺን ዱሪቤኬታ፤ ዚላሰ ዚላሊዶሰ ሺን ዬከቤኬታ ገዛ ናይታ ሚሳቲቲሰ» ገደሰ።

33 አይሰ ገኮ ጸማቂዛ የሃኒሲ ካል ሞንታኔ ዎይኔፔ ኦሴቲዳ ጫጃ ኡዮንታ ዪን፡ «ዳይዳንሊ ኢዛ ቦላ ዳሰ» ገደታ።

34 አሳ ናይ ቃሴ ሚሼኔ ኡዪሼ ዪን፡ «ጋንጃማኔ ኡሻንቻ፡ ቃራጸ ሺሺዛይታራኔ ናጋራንቻታራ ላጌቲሰ» ገደታ።

35 ሄሳ ገሻሰ ኤራቴላ ቱማቲላይ ኢዚ ናይታ ኡባታ አቻን አማኔቲዳሰ» ገደሰ።

ዬሱሳ ቶሆ ሺቶ ቲይዳ ማጫሳዮ

36 ሄሳፌ ጉዬ ፋርሳዌታፔ ኢሲ አሲ ቁማ ማናሰ ዬሱሳ ባሶ ጸይጌን ዬሱሲ ጸይጌዳ ፋርሳዌዛሶ ቢ ኡቲዳሰ።

37 ሄ ካታማን ዲዛ ኢሲ ናጋራንቻ ማጫሰ ዲዛራ ዬሱሲ ፋርሳዌዛ ከላን ቁማ ማዳ ቦላን ዲዛይሳ ሲያዳ ኢሲ አልባሰጸርሴ ቢልቃጾ ሺቶ ኤካ ያደሰ።

38 ሂስታዳ ዩሱፋፕ ጉዬራ ኢዛ ቶሆ አቻን ኤቃዳ ዩካሼኔ ባ አፋንላን ኢዛ ቶሆ ጫጲሳዳ ባ ሁኔ ቢናናራ ቁጫሼኔ ዩራሼ ሺቶዛ ቲያዱስ።

39 ዩሱፋ ቁማሰ ጸይሲዳ ፋርሳዌይካ ሄሳ ቤኢዲ፡ «ሃይሲ አዴዚ ናቤ ጊዲዳኮ ሃና ኢዛ ቦቺዳ ማጫሳያ ኢዛ አናኮኔ አይ ኦሊዛ አሳኮ ኤራናኮሺን፤ ኢዛ ናጋራንቻኮ ሺን» ጊዲ ባ ዎዚናን ቆፒዴስ።

40 ዩሱሲ፡ «ሲሞና! ኔስ ታ ዮታናዚ ዴስ» ጊዴስ። ሲሞኒካ፡ «አስታማሬ! ኤሮ ዮታ» ጊዴስ።

41 ዩሱሲ ዛሪዲ፡ «ኢሲ ሚሼ ታልኤ አሚዛዴፌ ታልኤ ኤኪዳ ናሞኡ አሳቲ ዴቲስ፤ ኢስታፌ አሳ ቦላ ኢቻሹ ጸት ዲናሬይ ዴስ፤ ናሞአንጾዛ ቦላ ኢቻሹ ታሙ ዲናሬይ * ዴስ።

42 ኢስታስ ቃንጺዛ ሚሺ ቆዩን ታልኤ አሚዳይሲ ናሞአታ አጮዛ ኡባካ ማሪዴስ፤ ሂስቲኮ ሃ ናሞአታፕ ሃ ታልኤ አሚዳይሳ ዳርሲ ዶሳናይ አዋይሴ?» ጊዴስ።

43 ሲሞኒካ ዛሪዲ፡ «ዳሮ አጮይ ማሬቲዳይሳ ጋዳ ቆፓይስ» ጊዴስ። ዩሱሲካ፡ «ቱሙ ፒርዳዳሳ» ጊዴስ።

44 ሄ ማጫሳይኮ ዩዩዲ ሲሞና፡ «ሃኖ ማጫሳዮ ጸላይ? ታ ኔ ከፊ ጌሊን ኔ ታ ቶሆስ ሃፊ ሺሻቤካ፤ ኢዛ ጊዲኮ ታ ቶሆ ባ አፋንላን ጫጲሳዳ ባ ሁኔ ቢናናራ ቁጫዱስ።

45 ኔኒ ኡባካ ታና ዩራቤካ፤ ኢዛ ጊዲኮ ታ ጌሎሶፕ ዶማዳ ታ ቶሆ ዩሮ አጋቤኩ።

46 ኔ ታ ሁኔ ዛይቲ ቲያቤካ ሺን ኢዛ ጊዲኮ ታ ቶሆ ሺቶ ቲያዱስ።

47 «ሄሳ ጊሻስ ታ ኔና ጊዛይ ኢዛ ታና ከሃ ዶሲዳ ጊሻስ ኢዛ ባ ዳሮ ናጋራፕ ማሬታዱስ፤ ጉላራ ማሬቲዛ አሳ ሲቆይካ ጉላ» ጊዴስ።

48 ዩሱሲ ማጫሳዮ፡ «ኔ ናጋራፕ ማሬታዳሳ» ጊዴስ።

49 ኢዛራ ኢሲፌ ማዳን ኡቲዳ አማላቲካ፡ «ሃይሲ ናጋራ ማሪዛይ ኢዚ ኦኔ?» ጊዲ ባ ዎዚናራ ቆፒዴ።

50 ዩሱሲካ ማጫሳዮ፡ «ኔና ኔ አማኖይ ኣሺዴስ፤ ሳሮን ባ!» ጊዴስ።

8

ዩሱፋ ካሊዳይታኔ ኢዛስ ኦሊዳ ማጫሳታ

* 7:41 ዲናሬ፡ ዲናሬይ ሄ ዎዴ ኢሲ ኦሳንቻስ ኢሲ ጋላሳ ዳሞዛ።

1 ሄሳፌ ጉዬ ዩሱሲ ጸሳ ካዎቴላ ሚሺራች ሳባኪሽ ዲማ ዲማ ካታማታ ጊደራኔ ጉታታ ጊደራ ኣጲዴስ። ኣጲ በዛ ዎዴ ኢዛ ካሊዛ ታማኔ ናምኣቲ ኢዛራ ዴቴስ።

2 ቃሴካ ቱና ኣያናፔኔ ኢታ ሃርጌፌ ፓጺዳ ኢሲ ኢሲ ማጫሳቲ ኢዛራ ዴቴስ። ኢስቲካ ሳፑን ቱና ኣያናይ ኢዚፔ ኬዚዳ ማግዳሌ ጌቲቲዛ ዴሬፔ ዪዳ ማራሞ።

3 ካዎ ሄርዶሳስን ኦሊዛ ኩዛ ማቾ ዮሃኖ ቃሴካ ሶሲኖኔ ሃራ ዳሮ ማጫሳቲ ዴቴስ፤ ኢስቲካ ባንታስ ዲዛ ሚሻራ ዩሱሳስ ኦሊዛይታ።

ካል ዜሪዛዴ ለሚሶ

(ማቶ 13:1-9፤ ማር 4:1-9)

4 ዳሮ ዴሬይ ኢሲፌ ሽቂ ዲሺን ቃሴካ ኣሳይ ዲማ ዲማ ካታማፔ ኢዛኮ ዎጲዛ ዎዴ ዩሱሲ ለሚሶራ ታማርሲሽ።

5 «ኢሲ ጎሻንቻይ ዜሬል ዜራናስ ኬዚዴስ፤ ኢዚ ዜሪሺን ባጋይ ኦጌን ዎጲዳ ኣሳ ቶሆን ዩጴቲዴስ፤ ሳሎ ካፎቲካ ዪዳ ማጺ ሚዳ፤

6 ኢሲ ዜሬላይ ሹቻ ጋዴን ዎጲዳ ሄራካ ጫሪዴስ፤ ጋዴዚካ ሚላ ጋዴ ጊዲዳ ጊሻስ ኤሌ ሚሊዴስ።

7 ቃሴካ ሃራ ዜሬሊ ኣጉንላ ጊዶን ዎጲዴስ፤ ኣጉንላይካ ኢዛራ ኢሲፌ ዲጪዲ ጫሬቻይካ ዲጮንታ ማላ ጩሊዴስ።

8 ቃሴካ ሃራ ዜሬላይ ኣራዳ ጋዴን ዎጲዴስ፤ ጫሪዲ ጸቱ ኩሼ ኣይፊዴስ» ጊዴስ።

ዩሱሲ ለሚሶን ሃሳይዳ ጋሶ

(ማቶ 13:10-17፤ ማር 4:10-12)

ዩሱሲ ሃሳያ ዉርሲዳፔ ጉዬ ቃላ ቶቁ ሂስቲዲ፡ «ሲዪዛ ሃይሊ ዲዛ ኣሲ ሲዮ!» ጊዴስ።

9 ዩሱሳ ካሊዛይቲ፡ «ዜሬላ ለሚሶዛስ ቢርሼል ኢማ» ጊዲ ኦይቹን።

10 ኢዚካ ኢስታስ፡ «ጸሳ ካዎቴላ ጹራ ኤሮይ ኢንቴስ ኢማቲዴስ፤ ሃራታስ ጊዲኮ ለሚሶራ ዮታይስ ቃሴካ ሃራቲ ቤኢዲ ዎዚናን ዎሶንታ ማላኔ ሲዪዲ ዩሺ ቆፖንታ ማላ ሃኒዴስ።

ዩሱሲ ቢርሺዳ ዜሬላ ለሚሶ

(ማቶ 13:18-23፤ ማር 4:13-20)

11 «ዜሬላዛ ለሚሶይካ ሃይሳ፤ ዜሬል ጌቲቲዳይሲ ጸሳ ቃላ።

12 እኔ ለንቁን ዋዲያይሲ ቃላ ሲዩዛይታ፤ ጊዶ አቲን ኢስቲ አማኒዲ አቶንታ ማላ ጸላኤይ ዩዲ ቃላ ኢስታ ዋዚናፔ ኤኪቺዛይታ።

13 ሹቻ ሶላ ዋዲያይቲካ ቃላ ሲዩዲ ኡፋይሳራ ኤኪዛይታ፤ ኢስቲካ ሃኢስ አማኔቲስ አቲን ሜቶይ ኢስታ ሶላ ጋኪዛ ዋዴ ጸጸ ዩዶንታ ጊሻስ ኤሌራ አማኖ ካዲዛይታ።

14 አጉንሳ ጊዶን ዋዲያይቲ ቃላ ሲዩዛይታ፤ ሄይቲካ ሃይሳ ሃ አላሜ ቆፋኒኔ አቆታን፤ ሃ ቢታ ሶላ ዱሳ ሎኤቴላን ጨሌቲዲ ሎኤሊ አይፌ አሜቴና።

15 አራዳ ቢታን ዋዲያይሲ ቃላ ሱሬኒኔ ሎኦ ዋዚናን ሲዩዲ ናጊዛይታኔ ዳንዳያን ሚኒዲ አይፌ አይፊዛይታ።

ቆንጨሶን ዲዛ ጸምፔ
(ማር 4:21-25)

16 «ፖኦ ፖኢሲዲ ባላ ጊዶን ዋይኮ አርሳ ጋርሳን ዋሊዛ አሲ ዳና፤ ጊዶ አቲን ኬሌ ጌሊዛ አሳስ ፖኦና ማላ ቆንጨሶን ዋሊቲስ።

17 ቆቴቲዲ ቆንጨ ኬዘንታይ፥ ፖኦን ኬዚዲ ኤሬቶንታ ጌማን አታና ሚሺ ዳና።

18 «ሄሳ ጊሻስ አንቴ ሲዩዛይሳ ናጌቲ ሲዩቴ፤ ዲዛ አሳስ ጉጃታና፤ ባይንዳዴስ ኡባፌ ኢዛስ ዲዛ ሚሳቲዛራካ ኤኬታይቻና» ጊ ዛሪዴስ።

ዩሱሳኔ ኢዛ ኢሻታ
(ማቶ 12:46-50፤ ማር 3:31-35)

19 ሄሳፌ ጉዬ ዩሱሳ አያኔ ኢዛ ኢሻቲ ዩሱሳኮ ዩዳ፤ ጊዶ አቲን አሳ ዳርቴላፌ ዴንዲዳይሳን ኢዛኮ ሺቃናስ ዳንዳይቤቴና።

20 ሄ ዋዴ አሳይ ዩሱሳስ፥ «ኔ አይያኔ ኔ ኢሻቲ ኔና ቤያናስ ኮዩዲ ካሬን ኤቂዳ» ጊዲ ዮቲዳ።

21 ዩሱሲካ ዛሪዲ፥ «ታ አያኔ ታ ኢሻቲ ጸሳ ቃላ ሲዩዲ ናጊዛይታ» ጊዴስ።

ዩሱሲ አባ ዳምባላዛ ሴሪዴስ
(ማቶ 8:23-27፤ ማር 4:35-41)

22 ኢሲ ጋላስ ዩሱሲ ባና ካሊዛይታራ ዋሳሎ ጊዶ ጌሊዲ፥ «አባፌ ሄ ፒንሐ ፒኖስ» ጊዴስ።

23 ኢስቲካ ፒኒሺን አባ ቦላ ዳምባላይ ዴንዲዲ ዋዪሲዛ ዋዪ ዩሱሲ ጳስኪዴስ፤ ሃሊካ ዋጎሎዛ ጊዶ ጌሊን አሳይ ዳር ሜቶቲቲዴስ።

24 ዩሱሳ ካሊዛይቲ ኢዛኮ ሺቂዲ፥ «ጎዶ! ጎዶ! ኑ ወራና ሃኖስ» ጊዲ ዩሱሳ ጳስኮፌ ዴንሊዳ።

ኢዚካ ቤጊዲ ጫርኮዛኔ አባ ዳምባላይ ሴሪን ጫርኮይኔ አባ ዳምባላይ ጮኡ ጊዴስ።

25 ኢዚካ ባና ካሊዛይታ፥ «ኢንቴ አማኖይ አዋ ቢዴ?» ጊዴስ፤ ኢስቲካ ባ ጊዶን ባቢሼኔ ማላሌቲሼ፥ «ጫርኮኔ ሃሌ አዛዚዛይ፤ ኢስቲካ ኢዛስ አዛዜቲዛይ ኢዚ ኦኔ?» ጊዳ።

ዳይዳንሊ ኦይኪን ዩሱሲ ፓሊዳ አዴዛ

(ማቶ 8:28-34፤ ማር 5:1-20)

26 ኢዛፔ ጉዬ ጋሊላፔ ሄ ፒንላን ዲዛ ጌርጌሴኖኔ ጌቲቲዛ ዴሬ ዋጎሎራ ፒኒዳ።

27 ዩሱሲ ዋጎሎዛፔ ጋዴን ዋዲን ዳይዳንሊ ኢዛ ቦላ ዲዛ ኢሳዴይ ካታማፔ ኬዚዲ ኢዛ ዴሚዴስ፤ ሄ አዴዚ ዳር ዋዴ ማይኦ ማይኦንታ ካሎ ዲዛዴኔ ኬላን አቆንታ ዲፎ ባስ አቆሶ ኦሊዳ አሳ።

28 ዩሱሳ ቤኢዳ ዋዴ ዋሲሼ ዩሱሳ ሲንላን ኩንዲዴስ፤ ቃላ ቆቁ ሂስቲዲ፥ «ቦንኞ ጸሳ ና ዩሱሳ! ታሲኔ ኔስ አይ ጋይቶቴሊ ዲዜ? ኔ ታና ዋዩሶንታ ማላ ታ ኔና ዋሳይስ» ጊዴስ።

29 ቱና አያናይ ሄሳ ጋናስ ዳንዳይዳይ አዴዛፔ ኬዛና ማላ ዩሱሲ አዛዚዳ ጊሻሳ። ቱና አያናዚካ ዋዴን ዋዴን ዴንዲዛ ጊሻስ አዴዚ ሳንሳላታኒኔ ቢራታን ቶሆ ቃቺ ናጊንካ ቃሼቲዳ ሳንሳላታ ዲሴሬሊዲ ኢዛ ቦላ ዲዛ ዳይዳንላይ ኢዛ ዴጌ ባዘ ዛሪ ኤፌስ።

30 ዩሱሲ፥ «ኔ ሱንሊ ኦኔ?» ጊዲ ኦይቺዴስ፤ ኢዚካ ዳር ዳይዳንላቲ ኢዛን ጌሊዲ ዲዛ ጊሻስ ታ ሱንሊ፥ «ሌጎኔ» ጊዴስ።

31 ዳይዳንላቲካ ባና ወርሴሊ ባይንዳ ጨማ ኦላን ዩጎንታ ማላ ሚንሊዲ ዋሲዳ።

32 ሄንካ ዙማ ቦላ ዳር ጉዲንሊ ሄሜቴስ፤ ዳይዳንላቲ፥ «ጉዲንላ ወዴዛን ጌሊቲ» ጊዲ አዛዛና ማላ ዋሲን ዩሱሲ፥ «ኤሮ ጌሊቲ!» ጊዴስ።

33 ዳይዳንላቲ አዴዛፔ ኬዚዲ ጉዲንላታን ጌሊዳ። ጉዲንላቲ አፎዛ ዱጉንላራ ቢቻሪሼ ቢዲ አባን ጌሊ ሚቲቲዳ።

34 ሄሚዛይቲ ሃኒዳይሳ ቤኢዳ ዋዴ ቤሮቲ ቢዲ ካታማ አሳሲኔ ዴሬ አሳስ ዮቲዳ።

35 ሃኒዳይሳ ቤያና ገዲ አሳይ ባ ዲዛሶፔ ዬሱሳኮ ዪዴስ፤ ዳይዳንላይ ኢዛፔ ኬዚዳ አዳዚካ ካሃይ ሲሚን አፋላ ማይኢዲ ዬሱሳ ቶሆ ገደን ኡቲዳይሳ ቤኢዲ ባቢዳ።

36 ዳይዳንላን ኦይኬቲዳ አዳዚ ፓጺሺን ቤኢዳይቲ ኢዚ ዋኒ ፓጺዳኮ ዳሬዛሰ ዮቲዳ።

37 ጌርጌሴኖኔ ማታን ዲዛ አሳይ ኬሂ ባቢዳ ገሻሰ ዬሱሳ፤ «ሃይሳፌ ከቻ!» ገዲ ዋሲዳ፤ ኢዚካ ዋሳሎዛን ጌሊዲ ሲሚ ቢዴስ።

38 ዳይዳንላይ ኢዛፔ ኬዚዳ አዳዚ ዬሱሳራ ኢሲፌ ዳና ማላ ዋሲዴስ።

39 ገደ አቲን ዬሱሲ ኢዛ፤ «ኔሶ ሲማዳ ጾሲ ኔስ ኦሊዳ ገታ ሚሽ ኡባ ዮታ» ገዲ ዋይዚዴስ፤ አዳዚካ ዬሱሲ ኢዛሰ ኦሊዳ ገታ ሚሽ ባ ካታማን ዲዛ አሳሰ ኡባሰ ቆንጨን ዮቲሼ ቢዴስ።

ኢያኢሮሳ ናዮኔ ዬሱሳ ማይኦ ቦቺዳ ማጫሳዮ
(ማቶ 9:18-26፤ ማር 5:21-43)

40 አሳይ ወሪ ዬሱሳ ዩሳ ናጊሼ ጋምኢዳ ገሻሰ ኢዚ ሲሚሺን ኡፋይሳን ሞኪ ኤኪዴስ።

41 ሄ ዋዴ ኢያኢሮሳ ጌቲቲዛ አይሁዳ ዋሳ ኬላ ሃላቃይ ዪዲ ዬሱሳ ቶሆ ቦላ ኩንዲዲ ባሶ ባና ማላ ዋሲዴስ።

42 ኢዚ ሄሳላ ኦይቺዳይ ኢዛሰ ታማኔ ናምኡ ላይሳ ኩሚዳ ኢሲ ማጫ ናይ ሳኬታዳ ሼምፖ ቦላ ዲዛ ገሻሳ።

ኢዚ ሄ ቡሳን ዲሺን ዳሬይ ዳሪዲ ባ ገደን ሱጌቲዲ ኢዛ ኬሂ ኡንኢሲዴስ።

43 ታማኔ ናምኡ ላይሳ ሱሊ ኢዚፔ ጉኪሺን ዲዛ ኢሲ ማጫሳያ ባሰ ዲዛ ሚሻ ወርሳ ቆሌ ኤሪዛ አሳታሰ ኢማ ወርሲን ኢዛ ፓላናሰ ዳንዳይዳ አሲ ኢሳዴይካ ዴና።

44 ኢዛካ ጉዬራ ሺቃዳ ዬሱሳ አፋላ ማጫራታ ቦቻዴስ፤ ኢዚፔ ጉኪዛ ሱላይ ሄራካ ኤቂ አጊዴስ።

45 ዬሱሲካ፤ «ታና ቦቺዳይ ኦኔ?» ገዴስ። ወሪካ ኦኒ ቦቺቤኮ ገ ካዲዳ ዋዴ ጴጽሮሲ ዛሪዲ፤ «ጎዶ! አሲ ወሪ ዩዩ አጲዲ ኔና ሱጌሬሊዲ ኡንኢሴስ» ገዴስ።

46 ገደ አቲን ዬሱሲ፤ «አሲ ታና ቦቺዴስ፤ ዋልቃይ ታፔ ኬዚዳይሳ ታ ኤራይስ» ገዴስ።

47 ማጫሳያ ኤሬቶንታ ቆቲታዳ ባናሰ ዳንዳዮንታይሳ ኤራዳ ኮኮራሼ ያዳ ዬሱሳ ሲንላን ኩንዳዴስ፤ ኢዛካ ዬሱሳ ዋና ቦቺዳኮኔ ቃሴካ ኤሌራ ዋና ፓጺዳኮ ኡባ አሳ ሲንላን ዮታዴስ።

48 ኢዚካ፡ «ታ ናዬ! ኔ አማኖይ ኔና ፓሊደስ፤ ሳርን ባ!» ጌደስ።

49 ዬሱሲ ቡር ማጫሳይስ ሃሳያ ቦላ ዲሺን አይሁዳ ዋሳ ኬላ ሃላቃ ኢያኢሮሳ ኬላፊ ኢሲ ኣሲ ኢያኢሮሳስ፡ «ኔ ናያ ሃይቃዱስ፤ ሄሳ ገሻስ ሃይሳፊ ጉዬ ኣስታማሬዛ ሚላ ዳቡርሶፋ!» ጌደስ።

50 ዬሱሲ ሄሳ ሲዬዲ ኢያኢሮሳ፡ «አይኮይ ባ፤ ባቦፋ! አማና ኣቲን ኔ ናያ ፓጻና» ጌደስ።

51 ዬሱሲ ኢያኢሮሳ ኬላ ጌሊዛ ዋዴ ጴጽሮሳ፡ ዮሃንሳኔ ያቆቤ ቃሴካ ናዬ አዋፔኔ አይፔ ኣቲን ሃራይ ኦኒካ ኢዛራ ጌላና ማላ ኮዪቤና።

52 ሄ ዋዴ አሳይ ዉሪ ናይስ፡ «ዉ! ዉይ» ጌ ዋሲ ዬኪሺን ዬሱሲ፡ «ዬኮፍቲ፤ ኢዛ ኢቻዱስ ኣቲን ሃይቃቤኩ» ጌደስ።

53 አሳይካ ናያ ሃይቂዳይሳ ኤሪዛ ገሻስ ዬሱሳ ቦላ ሚጨደስ።

54 ጌዶ ኣቲን ናዬ ኩሼ ኢዚ ኦይኪዲ፡ «ታ ናዬ! ዴንዳ!» ጌደስ።

55 ናይስ ሸምፖይካ ሲሚደስ፤ ሄራካ ዴንዳ ኤቃዱስ፤ ዬሱሲካ ኢዚስ ሚዛ ሚሽ ኢማና ማላ ኣዛዚደስ።

56 ናዮ ዬሊዳይቲካ ማላሌቲዳ፤ ጌዶ ኣቲን ኢዚ ሃኒዳይሳ ኦናስካ ዮቶንታ ማላ ኣዛዚደስ።

9

ሚሺራች ቃላ ዮታና ማላ ዬሱሲ ከቲዳ ሃዋሬታ

(ማቶ 10:5-15፤ ማር 6:7-13)

1 ዬሱሲካ ታማኔ ናምኡ ሃዋሬታ ኢሲፊ ጴይጌዲ ዳይዳንላታ ኬሳና ማላኔ ሃርጌፊ ፓላና ማላ ኢስታስ ዋልቃኔ ጎዳቲል ኢሚደስ።

2 ቃሴካ ጸሳ ካዋቲል ዮታናሲኔ ሃርጌዛይታ ፓላናስ ኢስታ ከቲደስ።

3 ኢስታስ፡ «ኦጌ ቢሼ ጉፊ ዋይኮ፡ ቃራጺቲ ዋይኮ፡ ቁማ ዋይኮ፡ ሚሼ ዋይኮ ናምኡ ማይኦ ኦይኪ ባናስ ኮሼና።

4 ኢንቲካ ሄ ካታማይፔ ኬዛና ጋካናስ ኮይሮ ጌሊዳ ኦና ኬላንካ ጌዲን ሄን ጋምኢቲ።

5 ካታማ አሳይ ኢንቲና ሞኪ ኤኮንታ ኢጲኮ ሄ ካታማይፔ ኬዚዲ ኢንቲና ሞኮንታይታስ ማርካ ጌዳና ማላ ኢንቲ ቶሆን ዲዛ ጉዲላ ፒቲዲ ኬዚቲ» ጌደስ።

6 ኢስቲካ ጎዳይ ጊዳ ማላ ኬዚዲ ሚሺራች ቃላ የተሸኔ ሃርጋንቻታ ፓሊሽ ጉታን ጉታን ዩዱዳ።

ሄርዶስ ሲዱዳ ዩሱሳ ዎሪ
(ማቶ 14:1-12፤ ማር 6:14-29)

7-8 ሄ ዎዴ ኢሲ ኢሲ አሳቲ፥ «የሃኒሲ ሃይቆፔ ዴንዲዴስ» ባጋይቲ፥ «ኤላሲ ኬዚዲ ቤቲዴስ» ቃሴ ባጋይቲ፥ «ቤኒ ናቤታፔ ኢሶይ ሃይቆፔ ዴንዲዴስ» ጊዲ ሃሳዬቲዛ ጊሻስ ዩሁዳ ቢታ ሃሪዛ ሄርዶስ ሄሳ ሲዱዲ ሃኒዛ ሚሻን ባ ዎዚናን ሜቶቲቲዴስ።

9 ሄርዶስካ፥ «ታኒ ኢዛ ቆዴ ቃንጺዳ ጸማቂዛ የሃኒሲ ሃይቂዴስ። ሂስቲን ኢዛ ጊሻስ ሃይሳ ማላ ሃሳዬቲሽን ታ ሲዩዛይሲ ኢዚ እኔ?» ጊዲ ኢዛ ባ አይፌራ ቤያና ኮዩዴስ።

ዩሱሲ ሚዚዳ ኢቻሹ ሺ አሳ
(ማቶ 14:13-21፤ ማር 6:30-44፤ ዮሃ 6:1-14)

10 ሃዋሬቲካ ሲሚዲ ኢስቲ ኦሊዳይሳ ኡባ ዩሱሳስ የቲዳ፤ ኢዚካ ኢስታ ጸላ ባናራ ኤኪዲ ቤቲሳይዳ ጌቲቲዛ ፖሳን ዲዛ ካታማ ቢዴስ።

11 ጊዶ አቲን ዳሮ አሳይ ሄሳ ኤሪዲ ኢስታ ካሊዴስ፤ ኢዚካ ኢስታ ሞኪ ኤኪዲ ጸላ ካዎቲላ ጊሻስ የቲዴስ፤ ቃሴካ ሃርጌፌ ፓላናስ ቤሲዛይታ ፓሊዴስ።

12 ጋዴይ ለምኢሺን ታማኔ ናምኡ ሃዋሬቲ ኢዛኮ ሺቂዲ፥ «ኑኒ ዲዛይ ባዞ ቢታን ጊዲዳ ጊሻስ አሳይ ቢዲ ባስ አቃናሶኔ ሚዛ ሚሽ ኮያና ማላ አሳ ሞይዛ» ጊዳ።

13 ጊዶ አቲን ኢዚ ኢስታስ ዛሪዲ፥ «ኢንቴ ኢስታስ ሚዛዝ ኢሚቲ» ጊዴስ። ኢስቲካ፥ «ኑስ ኢቻሹ ኡኬላፌኔ ናምኡ ሞሌፔ ሃራይ ባ፤ ሃ አሳስ ጊዲዛ ካሐ ኮሺኮ ሻማናስ ቤሴስ» ጊዳ።

14 ዩሱሲካ ባና ካሊዛይታ፥ «አሳ ኢቻሹ ታሙ፥ ኢቻሹ ታሙ ሂስቲ ሻኪ ሻኪ ኡቲሲቲ» ጊዴስ። ሄንካ ኢቻሹ ሺ ጊዲዛ አቱማሳይ ዴስ።

15 ዩሱሳ ካሊዛይቲካ ዩሱሲ አዛዚዳ ማላ አሳ ኡባ ኡቲሲዳ።

16 ዩሱሲካ ኢቻሹ ኡኬላኔ ናምኡ ሞሌታ ኦይኪ ፑዴ ሳሎ ጴሊዲ ጸላ ጋላቲዴስ፤ ኢዚካ ኡኬላ ሜንሊዲ አሳ ጋላና ማላ ባና ካሊዛይታስ ኢሚዴስ።

17 አሳይ ዉሪካ ሚዲ ካሊዴስ። ዩሱሳ ካሊዛይቲካ አሳፔ አቲዳ ታማኔ ናምኡ ለማቲ ኩሜሐ ማዳፌ ዴንሊዳ።

ጴጥሮስ እማኖን ኢዛ ማርካቴል
(ማቶ 16:13-19፤ ማር 8:27-29)

18 ኢሲ ጋላስ ዩሱሲ ባርካ ዎሲሺን ኢዛ ካሊዛይቲ ኢዛኮ ዩዳ። ኢዚካ ኢስታ፡ «አሳይ ታና ኦና ጊዜ?» ጊዲ ኦይቺዴስ።

19 ኢስቲካ ኢዛስ፡ «ኢሲ ኢሲ አሳይ ጸማቂዛ ዮሃንሳ፤ ባጋይቲ ኤላሳ፤ ሃራቲ ቃሴ ቤኒ ናቤታ፤ ኢሶይ ሃይቆ፤ ዴንዲዴስ ጌቲስ» ጊዲ።

20 ኢዚካ ኢስታ፡ «ኢንቴቾ ታና ኦና ጌቲ?» ጊዲ ኦይቺዴስ። ጴጥሮስካ፡ «ኔኒ ጸሳፊ ኪቲቲዳ ኪርስቶስ» ጊዲ ዛሪዴስ።

ዩሱሳ ካሎይ ቃንጺሲዛ ዋጋ
(ማቶ 10:38-39፤ 16:24-28፤ ማር 8:34-38፤ ሉቃ 14:25-27)

21 ዩሱሲካ ኢስታ፡ «ሃይሳ ኦናስካ ዮቶፒቲ» ጊዲ ሚንሊ ዮቲዲ

22 ቃሴካ፡ «አሳ ናይ ዳሮ ዋዬ ኤካናስ ቤሴስ፤ ዴሬ ጨማታን፤ ቂሴ ሃላቃታኒኔ ሙሴ ዋጋ ጸፊዛይታን ኢጴታና፤ ኢስታ ኩሼን ሃይቃናኔ ሄዳንሉ ጋላሳን ሃይቆ፤ ዴንዳና» ጊዴስ።

23-24 ቃሴካ ኡባስ፡ «ባ ሼምፖ አሻና ጊዛ አሲ ወሪ ጳይሳና ሺን ባ ሼምፖ ታ ጊሻስ ጊዲ ጳይሲዛ አሲ አሻና። ሄሳ ጊሻስ ታና ካላና ኮይዛ አሲ ዲኮ ባና ካዶ፤ ኡባ ጋላስ ባ ማስቃሌ ቶኪዲ ታና ካሎ።

25 አሲ አላሜ ጎኣ ሙሌ ዴሚዲ ባ ሼምፖ ጳይሲኮ ኣዛ ጎኣይ ዲዜ?

26 ኦኒካ ታናኒኔ ታ ቃላን ዩላቲኮ አሳ ናይ ባ ቦንቾራ፤ አዋ ቦንቾራኔ ጌሻ ኪታንቻታ ቦንቾራ ዩዛ ዋዴ ታኒ ኢዛን ዩላታና።

27 ታ ኢንቴስ ቱሙ ጋይስ፤ ሃይሳን ኤቂዳ አሳ፤ ሃይቃና፤ ሲንሳን ጸሳ ካዎቴል ቤያና ኢሲ ኢሲ አሳቲ ዴቲስ» ጊዴስ።

ዩሱሳ ሜቶ ላሜቴል
(ማቶ 17:1-8፤ ማር 9:2-8)

28 ዩሱሲ ሄሳ ጊዲ ኦስፑን ጋላሳ ማላ፤ ጉዬ ዎሳናስ ዙማ ቦላ ኬዚዴስ፤ ቢሼ ባናራ ጴጥሮስ፡ ዮሃንሳኔ ያቆቤ ኤኪ ቢዴስ።

29 ኢዚ ዎሲሺን ኢዛ አይፌሶይ ላሜቲዴስ። ኢዛ ሜቶይካ ዋልቃንሳ ማላ ጸልቂዲ ቦቲዴስ።

30 ናምኡ አሳቲ ሙሴይኔ ኤላሲ ኢዛራ ሃሳዬቲዳ

31 ኢስቲካ ቦንቸራ ቆንጨዲ ዩሩሳሌምን ፖሌታና ዲዛ ዩሱሳ ሃይቆ ገሻስ ሃሳዬቲዳ።

32 ጴጽሮሳኔ ኢዛራ ዲዛይታ ዴጾ ሷስኮይ ኦይኪዴስ፤ ኢስቲካ ሷስኮፊ ቤጊዲ ዩሱሳ ቦንቸኔ ናምኡ ኣሲ ኢዛራ ኤቂዳይታ ቤኢዳ።

33 ሄ ናምኡ ኣሳቲ ዩሱሳፔ ሻኬቲ ቢሺን ጴጽሮሲ ዩሱሳ፥ «ጎዶ! ኢሲ ዳሴ ኔስ፥ ኢሲ ዳሴ ሙሴስ፥ ኢሲ ዳሴ ኤላሳስ ኦሊዲ ሃን ዲዛኮ ኩስ ሎኦኮሺን» ጊዴስ፤ ጊዶ ኣቲን ጴጽሮሲ ባ ጊዛይሳ ኤሮንታ ጊዴስ።

34 ኢዚ ሄሳ ሃሳይሺን ሻራይ ዩዲ ኢስታ ጌንሊዴስ። ሻራ ጊዶ ጌሊዲ ባቢዳ።

35 ሻራ ጊዶፊካ፥ «ታኒ ዶሪዳ ታ ናይ ሃይሳ፤ ኢዛ ሲዩቲ» ጊዛ ቃላይ ሴቴቲዴስ።

36 ቃላይ ሴቴቲዳ ዋዴ ዩሱሲ ጸላ ቤቴዴስ። ዩሱሳ ካሊዛይቲካ ሃኒዳ ሚሽ ኡባ ባ ዋዚናን ኦይኪዳ ኣቲን ኦናሰካ ዮቴቤቴና።

ዩሱሲ ኢታ ኣያናፔ ፓሊዳ ናዛ

(ማቶ 17:14-18፤ ማር 9:14-27)

37 ዋንቴላ ጋላስ ኢስቲ ዙማ ቦላፌ ዋዲን ዳሮ ኣሳይ ዩዲ ዩሱሳራ ጋጊዴስ።

38 ሄ ዋዴ ኣሳ ጊዶፌ ኢሳዴይ ቃላ ቶቁ ሂስቲዲ «ታማርሲዛይሶ! ታስ ኢሲ ናይ ጸላ ዲዛ ገሻስ ኢዛ ኔ ጴላና ማላ ታ ኔና ዋሳይስ።

39 ኢዛ ኢታ ኣያናይ ኦይኪሺን ሃሳኣይ ባይንዳ ዋሴስ፤ ቃኬቲሺ ዶናራ ጎፖንቶ ኬሴስ፤ ቆሆ ጋሊዳፔ ጉዬ ዳሮ ዋዩሲዲ ኣጌስ።

40 ኔና ካሊዛይቲ ናዛፔ ኬሳና ማላ ኢስታ ታ ዋሳዲስ፤ ጊዶ ኣቲን ኬሳና ዳንዳይቤቴና» ጊዴስ።

41 ዩሱሲካ ኢስታስ ዛሪዲ፥ «ኣማኖንታ ሃ ዋዴ ዋቤ ኣሳቶ! ታኒ ኢንቴናራ ኣይዴ ጋካናስ ዳኔ? ኢንቴናካ ኣይዴ ጋካናስ ዳንዳያኔ? ናዛ ኣኔ ሃ ኤሃ!» ጊዴስ።

42 ናዚ ዩሺን ኢታ ኣያናይ ኢዛ ቦላፌ ዩጊን ቃኬቲዴስ። ዩሱሲካ ኢታ ኣያናዛ ሴሪዲ ናዛ ፓሊዲ ናዛ ኣዋስ ኢሚዴስ።

43 ኣሳይካ ዉሪ ጸላ ጊታቴላን ማላሌቲዴስ።

ዩሱሲ ባ ሃይቆ ጊሻስ ናምኣንሉ ዮቲዴስ
(ማቶ 17:22-23፤ ማር 9:30-32)

ኢዚ ኦሊዳይሳን ኣሳይ ወሪ ማላሌቲሺን ዩሱሲ ባና ካሊዛይታ፡

⁴⁴ «ኣሳ ናይ ኣሳ ኩሼን ኣጲ ኢሜታና፤ ኢንቴካ ሃ ዮኦዛ ባሎፒቲ» ጊዴስ።

⁴⁵ ጊዶ ኣቲን ኢዚ ጊዛይሲ ኢስታስ ጌሊቤና። ጋሶይካ ኢስቲ ኣኬኮንታ ማላ ዮኦዚ ኢስታፊ ጌሜቲዴስ፤ ዛሪዲካ ኦይቸንታ ማላ ባቢዳ።

ኡባፌ ኣጲዛይ ኦኔ?

(ማቶ 18:1-5፤ ማር 9:33-37)

⁴⁶ ኢዛ ካሊዛይቲ፡ «ኦኒ ኦናፔ ኣጲዜ?» ጊዲ ባ ጊዶን ፓላሜቲዳ።

⁴⁷ ዩሱሲካ ኢስታ ዋዚና ቆፋ ኤሪዲ ጉላ ና ኤኪ ዪዲ ባ ማታን ኤሲዲ፡

⁴⁸ «ሃ ጉላ ናዛ ታ ሱንፋን ኤኪዛይይ ኦኒካ ዲኮ ታና ኤኬስ፤ ታና ኤኪዛይይካ ታና ኪቲዳይሳ ኤኬስ፤ ኢንቴፊ ኡባታፔ ጉጺዛይይ ኢዚ ኡባፌ ኣጴስ» ጊዴስ።

ኢንቴ ጊዛይሳ ኢጸንታይ ኢንቴ ባጋ

(ማር 9:38-40)

⁴⁹ ዮሃኒሲካ፡ «ጎዶ! ኢሲ ኣሲ ኔ ሱንፋን ዳይዳንሉ ኬሲሺን ኑ ቤኢዶስ፤ ጊዶ ኣቲን ኢዚ ኑናራ ካሎንታ ጊሻስ ኑ ኢዛ ዲጋናስ ኮዪዶስ» ጊዴስ።

⁵⁰ ዩሱሲካ፡ «ኢንቴና ኢጸንታ ኣሲ ወሪ ኢንቴ ባጋ ጊዲዳ ጊሻስ ዲጎፍቲ» ጊዴስ።

ሳማሪያ ኣሳይ ዩሱሳ ሞካናስ ኮዪቤና

⁵¹ ዩሱሲ ሳሎ ቢዛ ዎይይ ማቲዳ ጊሻስ ዩሩሳላሜ ባናስ ዴንዲዴስ።

⁵² ኢዚካ ሲንፋሲዲ ኣሴ ኪቲዴስ፤ ኢስቲካ ኮሺዛ ሚሽ ጊሊናፔ ካሴቲዲ ሳማሪያ ቢታን ዲዛ ኢሲ ጉታ ቢዳ።

⁵³ ጊዶ ኣቲን ዴሬይ ኢዚ ዩሩሳላሜ ቢዛይሳ ኤሪዳ ጊሻስ ሞኪ ኤኪቤና።

54 ኢዛ ካሊዛይታፔ ያቆቤይኔ የሃኒሲ ሃኒዛይሳ ቤኢዲ፥ «ጎዶ! ኤላሲ ኦሶይሳ፥ ታማይ ሳሎፔ ዋዲዲ ኢስታ ዲፒ ሂሰቶ!» ጊዲ ኦዛዛና ማላ ኮያይ?» ጊዲ። *

55 ጊዶ ኦቲን ዩሱሲ ኢስታኮ ዩዩዲ፥ «ኢንቴሰ ኣይ ማላ ኣያናይ ዲዛኮ ኤሬኬቲ? ኣሳ ናይ ዩዳይ ኣሳ ሼምፖ ኣሻናሰ ኦቲን ዳይሳናሰ ጊዴና» ጊዲ ኢስታ ሴሪዴሰ።

56 ኢስቲ ዉሪካ ሃራ ጉታ ቢዲ።

ዩሱሳ ካሊዛይታ ጋኪዛ ፓጩ

(ማቶ 8:19-22)

57 ኢስቲካ ቢሺን ኢሲ ኣሲ ኢስታኮ ሺቂዲ፥ «ኔኒ ቢዛ ኡባሶ ታ ኔና ካላና» ጊዴሰ።

58 ዩሱሲ፥ «ዋራካናታሰ ኣቂዛ ኦላይ፥ ካፎታሰ ቃሴ ኣቂዛ ካፎ ኬሊ ዴሰ፤ ጊዶ ኦቲን ኣሳ ናሰ ባ ሁኤ ኣይሲዛሶይካ ባ» ጊዴሰ።

59 ዩሱሲካ ሂንኮይሳ፥ «ታና ካላ» ጊዴሰ። ሄ ኣዴዚካ «ጎዶ! ታ ካሴታ ባዳ ታ ኣዋ ሞጎ?» ጊዴሰ።

60 ዩሱሲካ፥ «ኣጋጋ፥ ሃይቂዳይቲ ሃይቂዳይታ ሞጌቶ። ኔኒ ጊዲኮ ባዳ ጸሳ ካዎቴላ ኣሳሰ ዮታ» ጊዴሰ።

61 ቃሴካ ሃራ ኣሲ፥ «ጎዶ! ታ ኔና ካላና ሺን ኮይሮ ሶ ባዳ ታ ኬላ ኣሳ ሳሮ ጋዳ ዮ?» ጊዴሰ።

62 ጊዶ ኦቲን ዩሱሲ፥ «ቦራ ካሶ ኦይኪዲ ጎዩሼ ጉዬ ዛሪ ጴሊዛዴይ ኦኒካ ጸሳ ካዎቴላሰ ቤሴና» ጊዴሰ።

10

ዩሱሲ ኪቲዳ ላፑን ታማኔ ናሞኣታ

1 ሄሳፌ ጉዬ ጎዳይ ሃራ ላፑን ታማኔ ናሞኡ * ኣሰ ዶሪዲ ሱንሊዴሰ፤ ኢስታካ ናሞኡ ናሞኡ ሂሰቲዲ ኢዚ ባና ሶሆታኔ ካታማታ ዉርሲካ ኢስቲ ካሴቲዲ ባና ማላ ኪቲዴሰ።

2 «ማጸ ጋኪዳ ካሳይ ዳሮ፤ ካሳ ማጸ ሺሺዛይቲ ጉላታ፤ ሄሳ ጊሻሰ ካሳ ጎዳይ ካሳ ማጸዲ ሺሺዛይታ ካሳይ ዲዛሶ ዩዳና ማላ ዋሲቴ።

* 9:54 ኢሲ ኢሲ ጌሻ ማጸፋቲ፥ «ኤልያሲ ኦሶይሳ ማላ» ጊዛ ቃላ ጉጃቴሰ።

9:54 2ካዋ 1:9-16 9:61 1ካዋ 19:20 * 10:1 ላፑን ታማኔ ናሞኣታ ኢሲ ኢሲ ጌሻ ማጸፋታ ቢርሼላን «ላፑን ታማ» ጌቴሰ። 10:2 ማቶ 9:37-38

3 ሄሳ ገሻሰ ቤቱ፤ ዶርሳቲ ካና ሱይቲ ገደራ ቢዛ ማላ ታ አንቲና ዩዳይስ።

4 ኮሮጆ ወይኮ ቃራጺቲ ወይኮ ጫማ ኤኮፍቲ፤ ኦጌ ቦላ ኦናካ ሳሮ ጎጥቲ።

5 «አንቲ ኦና ኬሊካ ጌሊዛ ገዲኮ ኮይሮቲዲ፡ «ኬላ ኦሶ ሳሮ!» ገቲ።

6 ሄ ኬላን ሳሮ ዶሲዛ ኦሲ ዲኮ አንቲ ሳሮታይ ሄ ኬላን ሸምፓና፤ ሳሮ ዶሲዛ ኦሲ ዶንታ ኦጊኮ አንቲ ሳሮታይ አንቲሰ ሲማና።

7 አንቲሰ ማና ሺሺዳ ካሐ ኡባ ሚሼኔ ኡዩሼ ሄ አንቲ ጌሊዳ ኬላን ኡቲቲ፤ ኦሊዛዴሰ ባ ወልቃ ዋጋ ኤካናሰ ኢዛሰ ቤሴሰ፤ ሃ ኬላፌ ሄ ኬላ ዩዮጥቲ።

8 «አንቲ ኦይ ካታማካ ጋኪዛ ወዴ ኦሳይ አንቲና ሞኪ ኤኪኮ ኢሰቲ አንቲሰ ኦሊዳ ቁማ ሚቲ።

9 ሄ ካታማን ዲዛ ሃርጋንቻታ ፓሊዲ፡ «ጸሳ ካወቱሊ አንቲኮ ማቲዴሰ» ገዲ ዮቲቲ።

10 ገደ ኦቲን አንቲ ቢዲ ኢሲ ካታማ ጌሊሺን ሄ ካታማ ኦሳይ አንቲና ሞኪ ኤኮንታ ኢዲኮ ሄ ካታማ ኦሳይ ሸቁዛ ዱቡሻ ኬዚዲ፤

11 «ኦ ቶሆ ቦላ ዲዛ አንቲ ካታማ ጉዲላ አንቲሰ ማርካ ገዲና ማላ ኦ ቶሆ ቦላፌ ፒቶሰ፤ ገደ ኦቲን ጸሳ ካወቱላይ አንቲኮ ማቲዴይሳ ኤሪቲ» ገቲ።

12 ታ አንቲሰ ዮታይሰ ፒርዳ ጋላሰ ሄ ካታማ ፒርዳፌ ሶዶማ ካታማ ፒርዳይ ካዉሼ ገዲና።

አማኖንታ ኢዲዳ ገሻሰ ዋላሴቲዳ ካታማታ
(ማቶ 11:20-24)

13 «ኩራዚኔ ኔሰ ኦዬ ኦና! ቤቲሳይዳ ኔሰ ኦዬ ኦና! አንቲናን ኦሴቲዳ ማላታቲ ጸርሴኔኔ ሲዶናን ኦሴቲዳኮ ኢሰቲካ ማቃ ማይኢዲኔ ቢዲንሐ ጎርፔቲዲ ሄ ወዴ ቤኒ ማሬታናሺን።

14 ገደ ኦቲን ፒርዳ ወዴ አንቲፌ ጸርሴሲኔ ሲዶናሰ ካዉያና።

15 ሃኔ ቂፊርናሆማ ፑዴ ሳሎ ቶቁ ቶቁ ጋዲ? ኔኒ ዲጌ ሲኦሌ ዋፋና፤

10:3 ማቶ 10:16 10:4 ማቶ 10:7-14፤ ማር 6:8-11፤ ሉቃ 9:3-5 10:7
1ቆሮ 9:14፤ 1ጸሞ 5:18 10:12 ሚጴ 19:24-28፤ ማቶ 10:15፤ 11:24
10:13 ኢሳ 23:1-18፤ ሂዚ 26:1—28:26፤ ኢዩ 3:4-8፤ ኦሞ 1:9-10፤ ዛካ
9:2-4 10:15 ኢሳ 14:13-15

16 «አንቲ ጊዛይሳ ሲዪዛ ኣሲ ታና ሲዬስ፤ አንቲና ኤኮንታ ኣሲ ታናካ ኤኬና፤ ታና ኤኮንታይካ ታና ኪቲዳይሳ ኤኬና» ጊደስ።

ዬሱሲ ኪቲዳ ላፑን ታማኔ ናምኣቲ ቢዳሶፔ ሲሚዳ

17 ላፑን ታማኔ ናምኣቲካ ኡፋዬቲሼ ሲሚዳ፡ «ጎዶ! ሃራይ ኣቶሺን ዳይዳንፋቲካ ኔ ሱንፋን ኩሰ ሃራቲዳ» ጊ ዮቲዳ።

18 ኢዚካ ኢስታስ፡ «ጸላኤይ ዋልቃንፋ ማላ ሳሎፔ ኩንዲሺን ታ ቤያዲስ።

19 «ሂሰቲኮ ሾሺኔ ማሲማሶ አንቲ ዬቆና ማላ ሞርኬ ዋልቃ ኡባ ቦላ አንቲስ ጎዳቲል ታ አማዲስ፤ አንቲና ቆሂዛ ኢሲ ሚሺካ ዴና። 20 አንቲ ሱንፋይ ሳሎን ጸፊቲዳ ጊሻስ ኡፋዬቲቲ ኣቲን ቲና ኣያናቲ አንቲስ ሃራቲዳ ጊሻስ ኡፋዬቶፍቲ» ጊደስ።

ዬሱሲ ባ ኡፋይሳ ቆንጨሲል

(ማቶ 11:25-27፤ 13:16-17)

21 ሄ ዋዴ ዬሱሲ ጸሎ ኣያናን ኡፋዬቲዲ፡ «ሳሎሲኔ ሳኣስ ጎዳ ጊዲዳ ኣሶ! ሃይሳ ወርሳካ ኣቶ ኤራንቻታፔኔ ኤራንቻታፔ ቆታዳ ቄሪ ጉፋ ናይታስ ኔ ቆንጨሲዳ ጊሻስ ታኒ ኔና ጋላታይስ፤ ኤ፡ ታ ኣዋወ! ሃይሲ ኔ ሎኦ ሼኔይ ሃኒደስ።

22 «ወሪ ታ ኣዋ ማታፔ ታስ አማቲደስ፤ ቃሴካ ኢዛ ናይ ኦናኮ ኣዋፔ ኣቲን ኤሪዛይ ባ፤ ኣዋይ ኦናኮ ናዛፔ ኣቲን ዋይኮ ናዚ ኢዛስ ቆንጨሳናስ ዶሲዳዴፊ ኣቲን ኤሪዛይይ ባ» ጊደስ።

23 ባና ካሊዛይታኮ ሲሚዲ ኢስታስ ዴማ፡ «አንቲ ቤኢዛይሳ ቤኢዛ ኣይፊቲ ኣንጃቲዳይታ።

24 ታ አንቲስ ቱማ ጋይስ፤ ዳር ናቤቲኔ ካዋቲ አንቲ ሃኢ ቤኢዛይሳ ቤያናስ ኮዬዲ ቤዬቤቲና፤ አንቲ ሃኢ ሲዪዛይሳካ ሲያናስ ኮዬዲ ሲዬቤቲና» ጊደስ።

ኣሳስ ቃዴቲዛ ሳማሪያ ኣዳዛ

25 ኢሲ ጋላስ ሙሴ ዋጋ ታማርሲዛ ኢሲ ኣሲ ዬሱሳ ፓጫናስ ኮዬዲ፡ «ታማርሲዛይሶ! ታኒ ሜርና ዴኦ ላታናስ ኣይ ኦላ?» ጊዲ ኦይቺደስ።

26 ዬሱሲካ ዛሪዲ፡ «ዋጋ ማጸፋን ኣይ ጌቲቲ ጸፊቲዳ? ኢዛፔ ኔስ ጌሊዳይ ኣዜ?» ጊዲ ኦይቺደስ።

27 አዳዲስ ዛሬዲ፡ «ኔ ጎዳ ጸላ ኔ ኩሜላ ወዚና፤ ኔ ኩሜላ ሽምግፊ፡ ኔ ኩሜላ ወልቃፊኔ ኔ ኩሜላ ቆፋ፤ ሲቃ፤ ኔ ላጌካ ኔ ሁኔ ማላ ሲቃ ጌስ» ጌዲ ዛሬዳስ።

28 ዩሱፊካ፡ «ሎኦ ዛሬዳሳ፡ ኔኒካ ሄሳሶ ኦሊኮ ሚርና ዳኦ ዳማና» ጌዳስ።

29 አዳዲስ ባና ጸሊሳናስ ኮዩዲ፡ «ሂስቲን ታ ላጌይ ኦኔ?» ጌዲ ዩሱፊካ ኦይቺዳስ።

30 ዩሱፊካ ዛሬዲ፡ «ኢሲ አዳዲስ ዩሩሳሌም ሊያርኮ ወዲሽን ፓንጋቲ ዳሚዲ ኢዛ ማይኦ ቃሪ ኤኪዳ፤ ኬሂ ቆጾሬዲ ሃይቆፔኔ ፓጻፔ ጌደን ዩጌ ኣጌዲ ቢዳ።

31 ኢሲ ቄሴይ ሄ ኦጌራ ባስ ዱጌ ወዲሽ ኣሙንሶንታ ሄ ቆጾቲዳ አዳዲስ ዳሚዲ ፖቁሳራ ዩጌ ኣዲዳስ።

32 ቃሴካ ኢሲ ለዌ ባጋ ኣሳፔ ኢሲ አዳዲስ ሄ ኦጌራ ኣዲሽ ቆጾቲዳ አዳዲስ ቤኢዲ ሃኢካ ፖቁዲ ኣዲዳስ።

33 ኢሲ ሳማሪያ ቢታ ኣሲ ሄ ኦጌራ ኣዲሽ ቢሽ ቆጾቲዳ አዳዲስ ቦላ ጋኪ ወዲዳስ፤ አዳዲስ ቤኢዲ ኬሂ ሚሽቲዳስ።

34 አዳዲስ ሽቁዲ ማዱንላ ዳላና ማላ ወጋራ ሚላ ዛይቲኔ ወይኔ ጫጃ ማዱንላ ቦላ ጉሲዲ ቃቺዳስ፤ አዳዲስ ባ ሃሪ ቶጊሲዲ ኢማሊ ሽምፒዛሶ ኤፊዲ ሎኤሊ ጸሊዳስ።

35 ወንቴላ ጋላስ ኢማሊ ሽምፒዛ ኬላ ጎዳስ ናምኡ ዲናሪ ኢሚዲ፡ ሳና ሃራ ሚሽ ኬሲሲኮ ታ ሲማሽ ኔስ ኢማና፤ ኔፔ ኬሳዳ ሎኤላ ናጋ» ጌዳስ።

36 «ሂስቲኮ ሃ ሄቹ ኣሳታፔ ፓንጋታን ቆጾቲዲ ሃይቆፔኔ ፓጻፔ ጌደን ዩጌቲዳዳስ ኬሂ ማታ ላጌይ ኔስ ኣወይሳ ሚሳቲዬ?» ጌዳስ።

37 ሙሴ ወጋ ታማርሲዛይሲካ፡ «ሂሲ ኢዛስ ኔ ሚሽቲዳይሳኔ ማዲዳይሳ!» ጌዳስ። ዩሱፊካ ኢዛስ፡ «ኔካ ባዳ ኢዛይሳኦ ኦላ» ጌዳስ።

ዩሱፊካ ማርታኔ ማራሚ ሶ ቢዳስ

38 ዩሱፊካ ኢዛ ካሊዛይቲ ኦጌ ቢሽን ዩሱፊካ ኢሲ ጉታ ጌሊዳስ፤ ማርታ ጌቲቲዛ ኢሲ ማጫሳያ ባሶን ዩሱፊካ ሞካ ኤካዲዳስ።

39 ኢዚሰ ማራሞ ጌቲቲዛ ኢሲ ሚቺያ ዳዉስ። ማራማካ ኢዛፔ ቃላ ሲያሽ ጎዳ ቶሆ ጋርሳን ኡታዲዳስ።

40 ጊደ አቲን ማርታይ ኦሶ ዳሮፔ ዳንዲዳይሳን ዳቡራዳ ዩሱሳኮ ሺቃዳ፥ «ጎደ! ታ ሚቺያ ኦሶ ኡባ ታ ቦላ አጋዳ ኡቲሺን ኔኒ ጮኡ ጋይ? ኢዛ ታና ማዳና ማላ ኢዚሰ ዮታ አቲን» ጋደሰ።

41 ጊደ አቲን ጎዳይ ኢዚሰ፥ «ሃኔ ማርታ! ኔኒ ዳሮ ሚሻ ጊሻሰ ቆፋ ዳራሳ፤ ዲርባታሳ፤ ቱጋታሳ።

42 ኮሺዛይ ጊዲኮ ኢሲ ሚሽ ጸላ፤ ማራማካ ሎኦ ኤጸ ዶራደሰ፤ ሄሲካ ኢዚፔ ኤኬቴና» ጊደሰ።

11

ዩሱሲ ታማርሲዳ ዋሳ

(ማቶ 6:9-13፤ 7:7-11)

1 ኢሲ ጋላሰ ዩሱሲ ኢሲሶን ዋሲደሰ፤ ኢዚ ዋሳ ወርሲሺን ኢዛ ካሊዛይታፔ ኢሶይ፥ «ጎደ! ጸማቂዛ ዮሃኒሲ ባና ካሊዛይታ ዋሳ ታማርሲዳይሳላ ኔካ ኦና ዋሳ ታማርሳ!» ጊደሰ።

2 ኢዚካ ኢሰታሰ፥

«ዋሲሼ፥ ሉ ኣዋወ!

ኔ ሱንሊ ኣንጄቶ፤

ኔ ካዋቴሊ ሃ ዮ።

3 ሃቺሰ ጊዲዛ ቁማ ኦሰ ኢማ።

4 ኦና ቆሂዳይታ ኦ ማሪዛ ማላ

ኦና ማራ፤

ፓጮንካ ኦና ጌልሶፋ)

ጊ ዋሲቴ» ጊደሰ።

5-6 ቃሴካ፥ «ኢንቴፌ ኢሳደሰ ላጌይ ዲኮ ሌላ ጊደሰ ሄ ላጌዛሶ ቢዲ፥ ታሰ ኢሲ ኢማሊ ኦጌፔ ዪን ሚዛና ካሊ ባይንዳ ጊሻሰ ሄሹ ሶሎይ ዲኮ ታሰ ታልኣርኪ?»

7 ላጌዚካ ዛሪዲ፥ «ታና ዋዪሶፓ፤ ካሬይካ ጎርዴቲደሰ፤ ታኒካ ደይታራ ኢቻዲሰ። ሃኢ ዳንዳዳ ኢማናሰ ዳንዳይኬ» ጋንዴ?

8 ታኒካ ኢንቴሰ ዮታይሰ፤ ላጌቴላ ጊሻሰ ዳንዲዲ ኢሞንታ ኣጊኮካ ኢዚ ኦይሾን ሳሌሊዳ ጊሻሰ ዳንዲዲ ኮይዛይሳ ኡባ ኢሚደሰ።

9 «ሄሳ ጊሻሰ ታኒ ኢንቴሰ ጊዛይ ዋሲቴ ኢንቴሰ ኢማታና፤ ኮዩቴ ኢንቴ ዳማና፤ ካሬ ቆጶቴ ኢንቴሰ ደዬታና።

10 ኣይሰ ጊኮ ዋሲዛይ ዉሪ ኤካና፤ ኮይዛይካ ዳማና፤ ካሬ ቆጶዛደሰካ ደዬታና።

11 «እንቴፌ አዋ ጊዲ ኡቴዲ ኢዚ ዬሊዳ ናይ ሞሌ ኦይቸኮ ሾሽ አሚዛይ ዳንዴ?

12 ዋይኮ ጹጹሌ ኦይቸኮ ማሲማሶ አሚዛይ ዳንዴ?

13 እንቴ ኢታታ ጊዲሼ እንቴ ናይታሰ ሎኦ አሞታ አሞ ኤሪኮ ሳሎን ዲዛ እንቴ አዋይ ባና ዋሲዛይታሰ ጸሎ ኣያና ዋሰቲ ዳርሲ አሚኔ?» ጊዴሰ።

ዬሱሳኔ በኤሊዜቡላ

(ማቶ 12:22-30፤ ማር 3:20-27)

14 ኢሲ ጋላሰ ዬሱሲ ሃሳይሶንታ ዱዴ ዳይዳንሐ ኬሲዴሰ። ዳይዳንሓዚካ ኬዚዳፔ ጉዬ ዶና ዱዴ ኣዴዚ ሃሳይዴሰ፤ በኤዲ ኣሳቲካ ዳርሲ ማላሌቲዳ።

15 ጊዶ ኣቲን ኢሲ ኢሲ ኣሳቲ፡ «በኤሊዜቡላ ጌቴቲዛ ዳይዳንሓታ ሃላቃን ዳይዳንሓታ ኬሴሰ» ጊዳ።

16 ኢሲ ኢሲ ኣሳይ ኢዛ ፓጫናሰ፡ «ሳሎፔ ማላታ ቤሳ» ጊዲ ኦይቸዴሰ።

17 ጊዶ ኣቲን ዬሱሲ ኢሰታ ቆፋ ኤሪዲ፡ «ባ ጊዶን ሻኬቲዛ ካዋቲሊ ወሪ ጳያና፤ ባ ጊዶን ሲጋይ ባይንዳ ኬሊካ ኩንዳና።

18 እንቴ ታና፡ «በኤሊዜቡላን ዳይዳንሓታ ኬሴሰ» ጊዲ ሃሳዬታ ሺን ጸላኤይካ ባ ጊዶን ኢሶይ ኢሳፌ ሻኬቲኮ ኢዛ ካዋቲሊ ዋኒ ሚናኔ?

19 ሂሰቲኮ ታኒ ዳይዳንሓታ በኤሊዜቡላን ኬሲኮ እንቴ ናይቲ ኦናን ኬሳንዴቶ? ሄሳ ጊሻሰ እንቴ ናይቲ እንቴ ቦላ ፒርዲዛይታ ጊዳና።

20 ጊዶ ኣቲን ታኒ ዳይዳንሓታ ኬሲዛይ ጸሳ ዋልቃን ጋኪዴሰ፤ ጸሳ ካዋቲሓይ እንቴኮ ማቲዳሮ ኤሪቴ።

21 «ሚኖ ኣሲ ሎኤሊ ጊጾቲዲ ባ ኬሌ ናጊኮ ኬላን ዲዛ ሚሺ ሎኦን ናጌቲሰ።

22 ጊዶ ኣቲን ኢዛፔ ሃራ ሚኖ ኣሲ ዪዲ ጸኒኮ ኢዚ ኣማኔቲዳ ኦላ ሚሻታ ዋሊ ኤኪዲ ኢዛሰ ዲዛ ሃሮዛካ ወርሲ ሃራሰ ጊሻና።

23 «ታናራ ጊዶንታይ ታናራ ኤቄቴሰ፤ ታናራካ ሺሾንታይይ ላሌሰ።

ኢታ ኣያናይ ኣጊ ቢዳሶ ሲሚ ዩሰ

(ማቶ 12:43-45)

24 «ቱና አያናይ አሳፔ ከዚላ ዋዴ ሽምፖሶ ኮዪሼ ሃሊ ባይንዳ ማላሶን ዋዬቲስ፤ ሽምፖሶይ ላይኮ፣ ሓኒ ካሴ ከዚላሶ ጉዬ ሲማና፡ ጌስ።

25 ኢዛፔ ሲሚዲ ዪሺን ካሴ ኢዚ አገ ቢዳ ከላይ ፒቴቲዲኔ ገጊ ኡቲዳይሳ ዴሚስ።

26 ሄሳፌ ሲሚ ቢዲ ባፔ ኢቲዛ ሃራ ላፑን ዳይዳንላታ ባናራ ኤኪዲ ዬስ፤ ኢስቲካ ጌሊዲ ሄን ዳና፤ ሄሳዴስካ ኮይሮይሳፌ ጉዬይሲ ኬሂ ኢታ ጌዳና» ጌዴስ።

ቱሙ አንጆ

27 ዬሱሲ ሄሳ ሃሳይዛ ዋዴ አሳ ጌዴፌ ኢሲ ማጫስ ዲዛራ ባ ቃላ ቶቁ ኦላዳ፣ «ኔና ቶኪዳ ቃንሊኔ ኔ ቶሚዳ ቶንላቲ አንጆቲዳይታ» ጋዴስ።

28 ጌዶ አቲን ኢዚ፣ «አንጆቲዳይቲ ጸሳ ቃላ ሲዪዲ አዛዜቲዳይታ» ጌዴስ።

ዮናሲ ማላታ ጌዴስ

(ማቶ 12:38-42፤ ማር 8:12)

29 ዳሮ ዴሬይ ዬሱሳኮ ሽቂዳ ዋዴ ዬሱሲ፣ «ሃይሲ ዬሌታይ ኢታ ዬሌታ፤ ጌታ ማላታ ቤያናስ ኮዬስ፤ ጌዶ አቲን ዮናሳ ማላታፔ ሃራ ዲማ ማላታይ ኢሜቲና።

30 ጋሶይካ ዮናሲ ናናዌ አሳስ ማላታ ጌዲዳ ማላ አሳ ናይ ታኒ ሃ ዬሌታስ ማላታ ጌዳና።

31 ዲጌሃ ዴሬ ማጫ ካዎያ ሶሎሞኔ ኤራቴላ ቤያናስ ቢታ ጋጽፔ ዴንዳዳ ዪዳ ገሻስ ፒርዳ ዋዴ ኢዛ ሃ ዬሌታራ ዴንዳዳ ፒርዳና፤ ሄኮ ሶሎሞኔፔ አጂዛዴይ ሃን ዴስ።

32 ዮናሲ ሳባኪሺን ሲዪዲ ናናዌ አሳይ ባ ናጋራፔ ማሬቲዳ ገሻስ ሃ ዬሌታራ ኢሲፌ ዴንዲዲ ፒርዳና፤ ጌዶ አቲን ዮናሳፔ አጂዛይ ሃን ዴስ።

33 «ጸምፔ ኦይሊዲ ካሬፔ ጌሊዛ አሳስ ፖኣና ማላ ቆንጨሶን ዋሌቲስ አቲን ጌማሶን ዋሊዛ አሲ ዴና።

34 ኔ አሳቴላስ ፖኦይ ኔ አይፌ፤ ኔ አይፌይ ፓጸ ጌዲኮ ኔ ኩሚላ አሳቴላይካ ፖኦ ጌዳና፤ ኔ አይፌይ ሳኬቲኮ ኔ ኩሚላ አሳቴላይ ቆማ ጌዳና።

35 ሄሳ ገሻስ ኔናን ዲዛ ፖኦይ ቆሞንታ ማላ ናጌታ።

36 ሂስቲኮ ኔ አሳቴላይ ፖኦ ጊዲኮ ቋሚዳ አሳቴላ ዳና አገኮ ኔ ኩሚላ አሳቴላይ ጸምፔይ ሎኤላ ፖኢዛ ማላ ሎኢ ቤታና» ጊዴሰ።

ዩሱሲ ዋላሲዳ ፋርሳዌታኔ ዋጋ ታማርሲዛይታ
(ማቶ 23:1-36፤ ማር 12:38-40)

37 ዩሱሲ ሃሳያ ወርሲዳ ማላ ኢሲ ፋርሳዌይ ባናራ ቁማ ማናሰ ዩሱሳ ዴይጊዴሰ።

38 ዩሱሲ ቁማ ማና ኩሼ ሜጩቶንታ አጊዳይሳ ቤኢዲ ማላሌቲዳ።

39 ጎዳይ ኢዛሰ፡ «ሃኢ ኢንቴ ፋርሳዌቲ ጸኣሲኔ ኬሬሰ ቦላ ባጋ ሜጪ ጌሼታ፤ ኢንቴሰ ጊዶ ባጋዚ ኡዜቴላኒኔ ኢታቴላን ኩሚዴሰ።

40 ኢንቴኖ ኤያቶ! ካሬ ባጋ ሜዲዳይ ጊዶ ባጋ ሜዲቤኔ?

41 ዮኦን ጊዲኮ ጊዶን ዲዛይሳ ሙጽዋታ አሚቴ፤ ሄ ዋዴ ወሪካ ኢንቴሰ ጌሽ ጊዳና።

42 «ኢንቴኖ ፋርሳዌቶ! ኢንቴሰ አዬ አና! አኑጋፔኔ ጸሎታፔ ቃሰካ ዲማ ዲማ ካላፌ ታማፌ ኢሲኖ ኬሴታ፤ ጊዶ አቲን ቱሙ ፒርዳኔ ጸሰ ዶሳናይሳ አጊ አጼታ፤ ጊዲኮካ ኢንቴ አጊ አቋናሰ ቤሴና፤ ሃንኮይሳ አጎንታ ኢንቴ አላና ቤሲዛይቲካ ሃይታ።

43 «ኢንቴኖ ፋርሳዌቶ! ኢንቴሰ አዬ አና! አይሁዳ ዋሳ ኬላን ኡታናሰ ቦንቾ ኦይዴ ኮዬታ፤ ጊያ ጊዶንካ አሳይ ኢንቴ ሰንላን ሆካና ማላ ዶሴታ።

44 አሲ ኤሮንታ ኢዛ ቦላራ ቢዛ ቆቴቲ ዲዛ ዱፎ ኢንቴ ሚሳቲዛ ጊሻሰ ኢንቴሰ አዬ አና!» ጊዴሰ።

45 ሙሴ ዋጋ ኤሪዛይታፔ ኢሶይ ዛሪዲ፡ «አሰታማሬ! ኔ ሄሳሶ ሃሳይዛ ዋዴ ኑናካ ጫያሳ» ጊዴሰ።

46 ዩሱሲካ ዛሪዲ፡ «ኢንቴኖ ሙሴ ዋጋ ኤሪዛይቶ ኢንቴሰካ አዬ አና! አሲ ቶካናሰ ዳንዳዮንታ ዴጸ ቶሆ አሰ ቶሴታ፤ ኢንቴ ጊዲኮ ቢራጼ ጴራንካ ቦቼኬታ።

47 «ኢንቴ አዋቲ ዋዲዳ ናቤታ ዱፎ ኢንቴ ሎኤላዛ ጊሻሰ ኢንቴሰ አዬ አና።

48 ሂስቲኮ ኢንቴ ኢንቴ አዋታ ኦሶ ሚንሊዛ ማርካታ፤ ኢሰቲ ናቤታ ዋዲዳ፤ ኢንቴካ ኢሰታ ዱፎ ሎኤላታ።

49 «ሄሳ ጊሻሰ ጸሳ ኤራቴላ፡ ሩቤታኔ ሃዋሬታ ታ ኢሰታሰ ዬዳና፤ ኢሰቲካ ኢሰታፌ ኢሳ ኢሳ ዋዳና፤ ሃራታካ ጎዳና።

50 ሄሳ ጊሻሰ ሃ ዬሌታይ ቢታይ ሜጼቶሶፌ ሃኢ ጋካናሰ ጉኪዳ ናቤታ ኡባ ሱላ ጊሻሰ ኦይሼታና።

51 አቤሌ ሱላፌ ደሚዲ ያርሺዛሶፔኔ ጸሓ ኬላ ጊደን ጉኪዲ ዛካራሳ ሱላ ጋካናስ ኮዬቴስጎ ጋዱስ። ኤ ታ ኢንቴስ ጊዛይ ሃ ዩሌታይ ሃይሳስ ኦይሼታና።

52 «ኢንቴኖ ዋጋ ኤሪዛይቶ! ኢንቴስ አዩ አና! ኤራቴላ ፔንጌ ቁልፔ ዋልቃራ ዋላ ኤኪዲ ኢንቴስካ ጌሊቤኬታ፤ ጌላናይታካ ዲጌታ» ጊዴስ።

53 ዩሱሲ ሄፔ ኬዚዳፔ ጉዬ ጸፊቴኔ ፋርሳዌቲ ኤቄቴሼ ኦይሻን ሸምፖ ዲጊዳ።

54 ኢዛ ዶናፔ ኬዚዛ ቃላን ኢዛ ቃጻናስ ናጌቲዳ።

12

ቆጂፔ ቆሞ ሃኖቴላ ጊሻስ ዩሱሳ ቆፊሶ

1 ሄ ዋዴ ዳሮ ዳሬይ ባ ጊደን ኢሶይ ኢሳራ ዩጂታና ጋካናስ ሸቂ ኡቲዳሼ ዩሱሲ ባና ካሊዛይታ፡ «ፋርሳዌታ ኢርሾፌ ናጌቲቴ፤ ሄሲካ ቆጂፔ ቆሞ ሃኖ።

2 ቆንጮንታ ካሜቲዲ አታናይኔ ኤፊቶንታ ቆታን አታና ሚሺ ዴና።

3 ሄሳ ጊሻስ ኢንቴ ጌማን ሃሳይዳዚ ዉሪ ቆንጮ ኬዛና፤ ቃሴካ ኢንቴ ቆልኣን ሃይላን ሳሱኬቲ ሃሳይዳዚ ዉሪ ዳሬ ሲንላን ዮቴታና።

**ኦናስ ባባናስ ቤሲዛኮ
(ማቶ 10:28-31)**

4 «ታ ላጌቶ! ታ ኢንቴስ ጊዛይ ኣሾ ጸላ ዋጳናፔ ኣቲን ሃራ ኣይኮካ ኦላናስ ዳንዳዮንታይታስ ባቦፍቴ።

5 ጊዶ ኣቲን ኢንቴ ባባናስ ቤሲዛይ ኦናኮ ታ ኢንቴና ቤሳና፤ ኣሾ ዋጂዳፔ ጉዬ ኣሾኔ ሸምፖ ኢሲፌ ጋላ ጋናሜ ታማን ዩጋናስ ዳንዳይዛይሳስ ባቢቴ፤ ኤ ኢዛስ ባቢቴ ጋይስ።

6 «ሲኔ ካፎ ኢቻሻቲ ናምኡ ሳንቴስ ባይዜቴቴስ፤ ጊዶ ኣቲን ኢሰታፌ ኢሲኔዮካ ጸሲ ዶጌና።

7 ኢንቴ ሁኤ ቢናናይ ኩሜላ ታይቦን ዴስ፤ ሄሳ ጊሻስ ባቦፍቴ፤ ዳሮ ሲኔ ካፎታፔ ኢንቴ ኣጂታ።

**ኪርሰቶሳ ጊሻስ ማርካቴላ
(ማቶ 10:32-33፤ 12:32፤ 10:19-20)**

8 «ታ ኢንቴስ የታይሰ፤ ታ ጊሻስ አሳ ሲንላን ማርካቲዛ አሳ ኡባስ አሳ ናይ ቃሴካ ጸሳ ኪታንቻ ሲንላን ኢዛ ጊሻስ ማርካታና።

9 ጊዶ አቲን አሳ ሲንላን ታና ካዲዳዴይ ጸሳ ኪታንቻ ሲንላን ካዴታና።

10 «አሳ ና ቦላ ካዉሻ ቃላ ሃሳይዛዴስ ናጋራይ ዉሪ ማሬታናሺን ጸሎ ኣያና ጫዩዛዴይ ማሬቲና።

11 «አሳይ ኢንቴና ኦይኪዲ ዴሬ ሃሪዛይታኮኔ ጎዳቲዛይታኮ፤ ኣይሁዳ ዋሳ ከሐ ኦይኪ ኤፊኮ፤ «ኣይ ጊ ዛሪኖ? ኣይ ጊኖ?» ጊዲ ሂርጎፍቲ።

12 ኣይስ ጊኮ ኢንቴ ሃሳያናስ ቤሲዛይሳ ጸሎ ኣያናይ ሄ ዋዴ ኢንቴና ታማርሳና» ጊዴስ።

ዱሬ ኣዴዛ ኤያቴሐ

13 ዳር አሳ ጊዶሬ ኢሳዴይ፡ «ኣስታማሬ! ታ ኢሻይ ኦ ኣዋ ላታ ሚሻሬ ታና ጋኪዛይሳ ታስ ኢማና ማላ ኢዛስ የታ» ጊዴስ።

14 ዬሱሲካ፡ «ሃይሶ! ታና ኢንቴ ቦላ ፒርዲዛ ዳና ኦሊዳይ ኦኔ?» ጊዴስ።

15 ቃሴካ ኢስታስ፡ «ኣሳስ ዳር ሚሺ ዲኮካ ሼምፖይ ሄ ዱሬቴላን ዶንታ ጊሻስ ናጌቲቲ፤ ዪቄቴላሬ ኢንቴና ኬሂ ናጌቲ» ጊዴስ።

16 ዛሬዲካ ኢስታስ፡ «ሎኤሊ ካሐ ኢሚዛ ጋዴ ጎዳ ጊዲዳ ኢሲ ዱሬ ኣሲ ዴስ።

17 ሄ ኣዴዚካ ባ ዋዚናን፡ «ታ ካላ ሺሻዳ ዋሊዛሶይ ባይንዳ ጊሻስ ኣይ ኦሶ?» ጊ ቆፒዴስ።

18 «ኣዴዚካ፡ «ታስ ዲዛ ጎታራታ ላላዳ ሃራ ኣኪዛይሳ ኬጻና፤ ሂስታዳ ታስ ዲዛ ካላኔ ታስ ዲዛዝ ኡባ ኢዛን ሺሻና።

19 ታ ሼምፖዬ! ዳር ዋዴስ ጊዲዛ ካሐ ሺሺዳ ጊሻስ ሼምፓ ኡታዳ ማ፤ ኡያ፤ ኡፋዬታ» ጋና ጊዴስ።

20 «ጊዶ አቲን፡ «ጸሲ ሃይሶ ኤያዙ! ኔ ሼምፖዮ ሃኙ ኦማርስ ኔፔ ኤካና ኮዬቴስ፤ ሃሳ ጊሻስ ኔ ኔስ ሺሺዳይሲ ኦናስ ጊዳኔ?» ጊዴስ።

21 «ሃሳ ጊሻስ ጸሳ ኣቻን ዱሬ ጊዶንታ ባስ ሚሼ ሺሺዛ አሳ ዉርሴሊካ ሃሳ ማላ» ጊ ሌሚሶን የቲዴስ።

ጸሳን ኣማኔቴሐ

(ማቶ 6:25-34)

22 ሄሳፌ ጉዬ ዩሱሲ ባና ካሊዛይታስ፥ «ኢንቴስ ታ ዮታይስ፤ ኢንቴ ዱሳስ፥ ላይ ማናኮ ዎይኮ ኢንቴ ቦላስ ኣይ ማይኣናኮ» ጊዲ ጨፍፎፒቴ።

23 ኣይስ ጊኮ ሸምፖይ ካፋፌ ኣሳቴሊ ቃሴ ማይኦፌ ኣጼስ።

24 ቁርታ ጸሊቴ ዜሬቴና፤ ማጼቴና፤ ካል ሺሺዛ ጎታራይ ኢስታስ ባ ሺን ጸሲ ኢስታ ሚዜስ። ሂስቲኮ ኢንቴ ኢስታፌ ኬሂ ኣጼኬቴ?

25 ጊዶ ኣቲን ኢንቴፌ ዳርሲ ቆፒዲ ባ ላይፋ ቦላ ኢሲ ጋላስ ጉጃና ዳንዳይዛይ ኦኔ?

26 ሂስቲኮ ጉፋ ሚሽ ኦሶይ ኢንቴስ ዳንዳዬቶንታሼ ኣይስ ሃራ ሚሻስ ኬሂ ቆፒቴ?

27 «ጨሻቲ ዋኒዲ ዲጨዛኮ ኣኔ ጸሊቴ፤ ዋዬቴና፤ ሱቄቴና፤ ጊዶ ኣቲን ታ ኢንቴስ ዮታይስ፤ ሶሎሞኔይካ ጊታ ኣሳ ሺን ኢስታፌ ኢሲኔይሶ ማይኢቤና።

28 ሂስቲኮ ጸሲ ሃኝ ቤቲዲ ዋንቶ ታማን ዋቆና ማታ ሃይሳፋ ማይዚዛ ጊዲኮ ኢንቴኖ ኣማኖይ ፓጨዳይቶ! ኢንቴና ዋስቲ ኣሊ ማዪዜኔ?

29 «ሄሳ ጊሻስ፥ ላይ ሚኖ? ኣይ ማይኢኖ?» ጊዲ ኢንቴ ዋዚናይ ዳርሲ ቆፖፎ።

30 ቢታ ቦላን ዲዛ ኣሲ ዉሪ ሃይሳ ኮዬስ፤ ጊዶ ኣቲን ሃይሲ ዉሪ ኢንቴስ ኮሺዛይሳ ኢንቴ ሳሎ ኣዋይ ኤሬስ።

31 ኡባፌካ ኮይሮሊዲ ጸሳ ካዎቴል ኮዪቴ፤ ሃይሲ ዉሪ ኢንቴስ ጉጃቲ ኢሜታና።

ሳኣ ቦላ ሚሽ ሺሻናስ ቤሴና

(ማቶ 6:19-21)

32 «ኢንቴኖ ጉፋ ዉዴ ማህ ማላ ጊዲዳይቶ! ካዎቴል ኢንቴስ ኢማናስ ኢንቴ ኣዋስ ሎኦ ቆፋ ጊዲዳ ጊሻስ ባቦፍቴ።

33 ኢንቴስ ዲዛይሳ ባይዚዲ ማንቆታስ ኢሚቴ፤ ካይሶይ ኤኮንታሶን፥ ቢላይ ሞንታሶን፥ ጨሞንታ ኮሮጃን ዉሮንታ ሚሽ ሳሎን ሺሺቴ።

34 ኢንቴ ዋዚናይ ኢንቴ ሚሺ ዲዛሶን ዳና» ጊዴስ።

ኦሳንቻታ ሚኖቴል

35 «ቃጎሳን ጊጺዲ ጊጌቲቴ፤ ኢንቴ ፖኦይካ ፖኦ፥

36 ኢስታ ጎዳይ ቡላቻ ዲጊሳፔ ሲሚዲ ያናሼ ናጌቲዛይታኔ ኢዚ ዩዲ ፔንጌ ቆጶሺን ኤሌ ዶያናሰ ገጊ ኡቲዳ አሳታ ሚሳቲቲ።

37 ኢስታ ጎዳይ ዩዛ ዋዴ ጲስኮንታ ናጊ ኡቲዳ አሸካራቲ ኢስቲ አንጃቲዳይታ፤ ታ ኢንቴሰ ቱሙ ጋይሰ፤ ኢስታ ጎዳይ ባሰ ቃንላን ገጶ ኤቂዲ ኢስታ ማዳን ኡቲሲዲ ሚዛና።

38 ኦማርሰ ዋይኮ ሌላ ገደላን ዩዲ ኢስቲ ጲስኮንታ ዲሺን ዴሚኮ ሄ አሸካራቲ አንጃቲዳይታ።

39 ካይሶይ ኣይ ዋዴ ያናኮ ኤሪዛ ገዲዳኮ ኬላ ጎዳይ ካይሶይ ቦኪሺን ጮኡ ገዲ ቤሶንታይሳ ኤሪቲ።

40 አሳ ናይ ኢንቴ ቆፖንታ ዋዴን ያናይሳ ኤሪዲ ኢንቴካ ገጌቲዲ ናጌቲ» ገዴሰ።

ኢታ ኦሳንቻታኔ ሎኦ ኦሳንቻታ ሌሚሶ
(ማቶ 24:45-51)

41 ጴጽሮሲካ፡ «ጎዶ! ሃይሳ ሌሚሶዛ ኔ ዮቲዛይ ኑሰ ጸላዬ? ኡባ አሳሳራ?» ገዴሰ።

42 ጎዳይካ፡ «ሂስቲኮ ባሶ አሳሰ ኮሺዛ ዋዴን ቁማ ኢማና ማላ ኬላዴይ ኬላ አሳ ቦላ ዋሒዛ አማኔቲዳ ዋዚናማ አሲ ኦኔ?

43 ጎዳይ ሲሚሺን ሄሳሉ ኦሒሽ ቤቲዛዴይ ኢዚ አንጃቲዳዴ።

44 ታ ኢንቴሰ ቱሙ ጋይሰ፤ ባሰ ዲዛ ሚሽ ኡባ ቦላ ሄሳዴ ጎዳሳና።

45 ገዶ አቲን፡ «ኢዛዴይ ታ ጎዳይ ኤሌ ዬና ጋሞአና» ገ ቆፒዲ ኣዴ አሸካራታኔ ማጫ አሸካራታ ቡኪኮ፡ ቃሴካ ኮዩዳ ማላ ሚዲኔ ኡዩዲ ማሉቲኮ፡

46 ሄሳዴ ጎዳይ ኢዚ ቆፖንታ ጋላሳን ያና ገዲ ኤዘጎንታ ሳቲን ያና፤ ሂስቲዲ ኢዛ ቃንጼሬሒ ዩገዲ ኢዛ ኤጸ አማኖንታይታራ ኢሲፌ ኦላና።

47 «ባ ጎዳ ቆፋ ኤሪዲ ገጌቶንታይኔ ጎዳ ሽኔ ኦሶንታ አሸካራይ ኢታ ሾች ሾጮታና።

48 ገዶ አቲን ኤርንታ ዲሽ ሾቻሰ ቤሲዛ ሞሮ ኦሒዳ አሸካራይ ጉላራ ሾጮታና፤ ዳሮ ኢማቲዳ አሳ ኡባፌ ዳሮይ ኮዬቲሰ፤ ዳሮ ሃዳራ ኤኪዳዴፌ ዳሮይ ኮዬቲሰ።

ኡባ ኣገዲ ዩሱሳ ካሎ
(ማቶ 10:34-36)

49 «ታሪ ዩዳይ ቢታ ቦላን ታማ ኤፋናሳ፤ ሄ ታማይ ሃኢ ኤጲ ኬዚዳኮ ታና ዳሮ ኡፋይሳና።

50 ጊዶ አቲን ታሪ ጸማቂታና ጸንቃታይ ዳሰ፤ ሄ ጸንቃታይ ፖሌታናሼ ታሪ ኬሃ ሜቶቲታዲሰ።

51 አንቴስ ታሪ ቢታ ቦላ ሳሮ ኤሃና ዩዳ ሚሳቲዜ? ጊዳና፤ ታ አንቴስ ዮታይስ፤ ታሪ ዩዳይ ኢሳ ኢሳፌ ሻካናሳ።

52 ሃይሳፌ ሲንፋን ኢሲ ኬፋን ባ ጊዶን ሻኬቲዳ ኢቻሹ አሳቲ ዳና። ናምኦቲ ሄቻታ ቦላ ሄቻቲ ናምኦታ ቦላ ዴንዲዲ ባ ጊዶን ሻኬታና።

53 አዋይ ባ አቱማ ና ቦላ፤ አቱማ ናይካ ባ አዋ ቦላ፤ አያ ባ ማጫ ናይ ቦላ፤ ማጫ ናያካ ባ አዬይ ቦላ፤ ቦሎታ ባ ና ማቺ ቦላ፤ ና ማቻካ ባ ቦሎቲ ቦላ ዴንዲዲ ባ ጊዶን ሻኬታና» ጊዳስ።

ዎዴዛ ሃኖታ ኤሮ

(ማቶ 16:2-3)

54 ቃሴካ ዳሪዛስ፤ «አንቴ ኦርሼይ ሞኪዛ ባጋራ ሻራይ ኬዚሺን ቤኢዲ፤ ሔሌራካ ኢራይ ያና ጌስ) ጌታ፤ አንቴ ጊዳ ማላካ ሃኔስ።

55 ዲጌሃ ባጋራ ፑዴሃ ጫርኪሺን፤ ሪላሳይ ሆኦ ጊዳና) ጌታ፤ አንቴ ጊዳ ማላካ ሃኔስ።

56 አንቴኖ ሎኦ ሚሳቲዛ ኢታቶ፤ ሳሎይሳኔ ሳኦ ሜጳ ቤኢዲ ሃናናይሳ ኤሬታ ሺን ሃ ዎዴዛ ኤሮይ አንቴና ዋኒ ጸኒዜ?

57 «ሂስቲኮ አንቴ ኦይስ ቱማ ፒርዴኬቲ?

ሞርኬራ ሲጌቲል

(ማቶ 5:25-26)

58 «ኔ ሞርኬራ ዳና ሲንፋን ኤቃና ቢሺን ቡሮ ኦጌ ቦላን ዳሼ ኢዛራ ጊጋና ኦጌ ኮያ፤ ኔ ሂስቶንታ ኦጊኮ ኢዚ ኔና ጎቺዲ ዳና ሲንል ኤፋና፤ ዳናይካ ኔና ኦሊዲ ሃላቃስ ኢማና፤ ሃላቃይካ ኔና ዎይኔን ዩጋና።

59 ታ ኔስ ዮታይስ፤ ዳናይ ፒርዲዳ ወርሴፋ ሳንቲዮ ቃንጸ ወርሳና ጋካናስ ኔ ሄፔ ኬዛካ» ጊዳስ።

13

ናጋራፔ ሲሞንታይ ወሪ ጳያና

1 ሄ ዋዴ ኢሲ ኢሲ አሳቲ ዩሱሳኮ ዩዲ፥ «ጲላጶሲ ኢስታ ሱሉ ኢስታ ያርሾራ ጋሊ ዋላኪዳ ጋሊላ አሳታ» ጊሼ ዩሱሳስ ዮቲዳ።

2 ኢዚካ ዛሪዲ፥ «ሂሰቲን ሄሳ ማላ ሜቶይ ኢስታ ቦላ ጋኪዳ አሳቲ ሃንኮ ዋዬይ ጋኮንታ ኣቲዳ ጋሊላ አሳ ኡባፌ ኣጲዳ ናጋራንቻ ጊዲዳ ጊሻስ ጊ ቆፔቲ?»

3 ጊዴና! ታ ኢንቴስ ዮታይስ፤ ኢንቴ ማሬቶንታ ኢጲኮ ኢንቴ ዉሪካ ሄ አሳታ ማላ ጳያና።

4 ዋይኮ ሴሊሆሜን ጊምቤይ ኢስታ ቦላ ኩንዲን ሃይቂዳ ታማኔ ኦስቸን አሳቲ ዩሩሳላሜን ዲዛ አሳ ኡባፌ ናጋራንቻ ጊዲዳ ጊሻስ ጊዲ ቆፔቲ?

5 ጊዴና! ታ ኢንቴስ ዮታይስ፤ ኢንቴ ማሬቶንታ ኢጲኮ ኢንቴ ዉሪካ ሄ አሳታ ማላ ጳያና» ጊዴስ።

ኣይፎንታ ባላሴ ሚላይ ሌሚሶ

6 ቃሴካ ኢስታስ፥ «ኢሲ ኣሲ ዋይኔ ቶኪዛሶሆን ቶኬቲዳ ኢሲ ባላሴ ሚላ ዳዉስ፤ ሄ ባላሴ ሚላይኮ ኣይፌ ኮያና ዩዲ ኢሲ ኣይፌካ ዴሚቤና።

7 ዋይኔ ኣታኪልቲ ኦሊዛይሳስ፥ «ሄኮ ታኒ ኣይፌ ዴማና ጋዳ ሃቺራ ሄቹ ላይላ ሃ ባላሴይኮ ሰሜሬታ ያዳ ኢሲ ኣይፌካ ዴማቤኬ፤ ሄሳ ጊሻስ ኢዞ ቃንጸ ዲጋ! ኣዛስ ጮ ቢታ ጸንጸዜ?» ጊዲ ሌሚሶ ዮቲዳስ።

8 ኢዚካ ዛሪዲ፥ «ሳዶ! ታኒ ኢዚ ጸጸን ኦሻ ዩጋዳ ኦሴላ ዴላና ማላ ሃ ላይላስ ኣጋጋርኪ?»

9 ዩዛ ላይላስ ኢዛ ኣይፊኮ ሎኦ፤ ኣይፎንታ ኢጲኮ ቃንጸንዳሳ» » ጊዴስ።

ዩሱሲ ሳምባታ ጋላስ ፓሊዳ ቁና ማጫሲዮ

10 ዩሱሲ ሳምባታ ጋላስ ኢሲ ኣይሁዳ ዋሳ ኬላን ታማርሲሺን፥

11 ታማኔ ኦስቸን ላይላ ኩሜላ ኢታ ኣያናይ ኦይኪዲ ኣሳቲላ ፓጪሲዳ ኢሲ ማጫሳያ ሄን ዳዉስ፤ ኢዛካ ዘኮይ ቁኒዳ ጊሻስ ሙሌካ ቶቁ ጋናስ ዳንዳዩኩ።

12 ዩሱሲ ኢዞ ቤኢዳፔ ጉዬ ጴይጊዲ፥ «ሃኔ ማጫሳዬ! ኔኒ ኔና ሳኪዛ ሃርጌዛፔ ፓጸዳሳኮ!» ጊዴስ።

13 ዩሱሲ ባ ኩሼ ኢዚ ቦላ ዋሊን ኢዛ ሄራካ ሲቲ ጋዳ ኤቃዴስ፤ ጸሳካ ጋላታዲስ።

14 ኣይሁዳታ ዋሳ ኬላ ሃላቃዚካ ሳምባታ ጋላስ ፓሊዳይሳስ ዩሱሳ ቦላ ሃንቁቲዲ ኢዛኮ ዩዛ ዴሬዛ፥ «ኦሶስ ቤሲዛ ኡሱቸን

ጋላሳቲ ዲዛ ገሻስ ሄ ኦሶ ጋላሳታን ዬዲ ፓጺቴ ኣቲን ሳምባታ ጋላስ ዮፒቴ» ገዴስ።

15 ጎዳይካ ዛሪዲ፡ «ኢንቴኖ ቆጴፔ ቆሞን ሃሳይዛይቶ! ኢንቴ ገዴፌ ኢሳዴይ ባ ቦራ ዋይኮ ባ ሃሬ ሳምባታ ጋላስ ባሶን ቃሼቲዳሶፔ ቢርሺዲ ሃሌ ኡሻናስ ኤፊ ኤሬኔ?»

16 ሂስቲን ሃና ማጫሳያ ኣብራሃሚ ና ገዴዳ ታማኔ ኦስፑን ላይሳ ኩሚሳ ጸላኤይ ቃቺን ዲዛሶፔ ሳምባታ ጋላስ ቢርሼታናስ ኢዚስ ቤሴኔ?» ገዴስ።

17 ዬሱሲ ሂዘጊ ኦይቺዳ ዋዴ ኢዛራ ኤቄቲዛይቲ ዉሪካ ዬላቲዳ፤ ገዴ ኣቲን ዴሬይ ዉሪካ ኢዚ ኦይቺዳ ማላሊሲዛ ኦይሻን ኡፋዬቲዳስ።

ሳናፊጩ ጌቴቲዛ ሚላይ ዜሬላ ሌሚሶ

(ማቶ 13:31-33፤ ማር 4:30-32)

18 ቃሴካ ዬሱሲ ዛሪዲ፡ «ጸሳ ካዎቴሉ ኣይ ሚሳቲዜ? ታ ኢዘ ኣዛራ ሌሚሶ?»

19 ኢሲ ኣሲ ሳናፊጩ ጌቴቲዛ ሚላ ኣይፌ ባ ጋዴን ቶኪን ሞካ ዲጫዳ ጌታ ገዲን ካፎቲ ኢዚ ሃጋ * ገዴን ዴሳሶ ገጊሳና ጋካናስ ዲጪዳ ሳናፊጩ ሚሳ ሚሳታዉስ» ገዴስ።

ኢርሾ ሌሚሶ

(ማቶ 13:33)

20 ቃሴካ፡ «ጸሳ ካዎቴሉ ኣዛራ ሌሚሶ?»

21 ኢሲ ማጫሲ ሙኑቃ ጫሊሳናስ ዳሮ ጲሌራ ዋላኪዳ ጉላ ኢርሾ ሚሳታዉስ» ገዴስ።

ጸንሳ ፔንጌ

(ማቶ 7:13-14፤21-23)

22 ሄሳፌ ጉዬ ዬሱሲ ዬሩሳላሚ ቢሼ ካንሉ ቢዛ ካታማኒኔ ጉታታን ኣሳ ታማርሲሼ ኣጲሼን፡

23-24 ኢሳዴይ ኢዛኮ ሸቂዲ፡ «ጎዶ! ፒርዳፌ ጉላ ኣሳቲ ጸላ ኣታኔ?» ገ ኦይቺዳስ። ኢዚካ ዛሪዲ፡ «ጸንሳ ፔንጌይራ ጌላናስ ባጸቲቲ፤ ዳሮቲ ጌላናስ ኮዬቴስ ሺን ኢስታስ ሃኔና።

25 ኬላ ጎዳይ ዴንዲዲ ባ ካሬ ጎርዲ ገዲን ኢንቴ ካሬን ኤቂዲ፡ «ጎዶ! ካሬ ዶያርኪ!» ገዲ ፔንጌ ቆጶና ሺን ኢዚ ዛሪዲ፡ «ኢንቴ ኦናኮኔ ኣዎፔ ዬዳኮ ታ ኢንቴና ኤሪኬ» ጋና ገዴስ።

13:14 ኬሳ 20:9-10፤ ዛሬ 5:13-14 * 13:19 ሃጋ፡ ሃጋ ጌቴቲዛይሳ ኢሲ ኢሲ ባጋ ጋሞላ ቃላን ሃንጌ ጌቴስ።

26 «እንቴካ ኢዛስ ዛሪዲ፥ ሉኒ ኔናራ ኢሲፌ ሚዶሲኔ ኢሲፌ ኡዱደሰ፤ ኑ ዱቡሻን ኔ ኑና ታማርሳዳሳ» ጋና።

27 «ኢዚካ ዛሪዲ፥ ሉኒቴና ኢንቴ ኦናኮኔ ኢንቴ ኣዋፔ ዪዳኮ ታ ኢንቴና ኤሪኬ፤ ኢንቴ ማካላቲ ዉሪካ ታፔ ሃኪቱ» ጋና ጊዴሰ።

28 «እንቴ ኣብራሃሜ፥ ዪሳቃ፥ ያቆቤኔ ናቤታ ኡባታ ጸሳ ካዎቴላን ቤኢዛ ዎዴ ኢንቴ ካሪን ዬጌቲ ኣቲኮ ሄ ዎዴ ኢንቴሰ ዬሆኔ ኣቻ ጋርጨኞች ጊዳና።

29 ኣሳይ ኣርሼይ ሞኪዛ ባጋፌኔ ዉሊዛ ባጋፌ ፑዴሃፔኔ ዲጌሃፔ ዪዲ ጸሳ ካዎቴላ ማዳን ኡታና።

30 ሄኮ ጉዬን ዲዛይታፔ ባጋይቲ ሲንፊ ኣቆና፥ ሲንላን ዲዛይታፔ ባጋይቲ ጉዬ ኣቆናይቲ ዴቴሰ» ጊዴሰ።

ዩሱሲ ዩራሳላሚ ዋላሲዴሰ

31 ሄ ዎዴ ፋርሳዊታፔ ኢሲ ኢሲ ኣሲ ዪዲ፥ «ሄርዶሲ ኔና ዎቆናስ ኮይዛ ጊሻስ ሃይሳፌ ዴንዳ ኪቻ» ጊዳ።

32 ዩሱሲ ኢሰታሰ፥ «ታኒ ቡሮ፥ ሳሃቲኔ ዎንቶ ዳይዳንላታ ኣሳፔ ኬሳና፤ ሃርጊዛይታካ ፓላና፤ ሄቫንሶ ጋላስ ታ ቆፋሶ ታ ጋላና» ጊዴሰ ጊዲ ሄ ዎራካናስ ዮቲቲ።

33 ጊዶ ኣቲን ናቤይ ዩራሳላሚፔ ሃራሶን ሃይቃናስ ቤሶንታ ጊሻስ ሃሃቲኔ ዎንቶ ዎንቶፔይንካ ታ ሲንፊ ቡሰ ጉጃና።

34 «ሃኔ ዩራሳላሚ ናቤታ ዎጲዛሬ! ኔኮ ኪቴቲዳይታ ሹቻራ ጫዲዛሬ! ኩቶይ ባ ጨዬታ ባ ቁፌ ጋርሰ ሺሺዛ ማላ ኔ ናይታ ሺሻናስ ኣፑን ዎዴ ኮያዲናሺን ኔ ጊዲኮ ኣካይ ጋዳሳ።

35 ሄኮ ኢንቴ ኬላይ ካይዚዴሰ፤ ታ ኢንቴሰ ዮታይሰ፥ ሳዳ ሱንላን ዪዛዴይ ኣንጃቲዴሰ» ኢንቴ ጋና ዎዴይ ጋካናሹ ናምኣንሶ ታና ቤዬኬታ» ጊዴሰ።

14

ቃሴካ ዩሱሲ ኢሲ ሃርጋንቻ ሳምባታ ጋላስ ፓሊዴሰ

1 ኢሲ ጋላስ ዩሱሲ ቁማ ማናስ ፋርሳዊታ ሃላቃታፔ ኢሳ ሶ ጌሊዲ ዎዴ ኣሳይ ዉሪ ዩሱሲ ኣይ ኦላናኮ ጊዲ ኣይፌ ኢዛ ቦላ ቶኪ ጴሊዴሰ።

2 ሄንካ ኢዛስ ኣሳቴላይ ፑሪን ዋዬቲዛ ኢሲ ኣሲ ኢዛ ሲንላን ዴሰ።

3 ዩሱሲካ ሙሴ ዋጋ ኤሪዛይታኔ ፋርሳዌታ፡ «ሳኬቲዛዳ ሳምባታ ጋላስ ፓፋናስ ኮሺዜዬ? ኮሺኔ?» ጊዲ ኦይቺዴስ፡፡

4 ኢስቲካ ጮኡ ጊዳ፤ ኢዚካ አዳዛ ቦቺዲ ፓሊ ዩዲዴስ፡፡

5 ቃሴካ፡ «ኢንቴፌ ኢሲ አሳስ ሳምባታ ጋላስ ናይ ዋይኮ ቦራይ ኩንዲዲ ኦላን ጌሊኮ ኤሶን ሄራካ ኬሶንታዴይ ኦኔ?» ጊዴስ፡፡

6 ኢስቲካ ኦይሻስ አይኮ ዛሮካ ዳማናስ ዳንዳይቤቴና፡፡

ባና ዚቂ ሂስቴሊኔ ኢማላ ሞኮ

7 ዴይጌቲዳ አሳቲ ኡታናስ ቦንቾሶ ኮዬሺን ዩሱሲ ቤኢዲ ሌሚራራ ኢስታስ፡፡

8 «ኢሲ አሲ ኔና ሳርጌስ ዴይጌኮ ቦንቾሶን ኡቶፋ፤ ኔፔ ቦላራ ቦንቺቲዛዴይ ዴይጌቲኮ፡፡

9 ኢንቴና ናምኦታካ ዴይጌዳዴይ ዩዲ፡ ሳኔ ኡቲዳሶሆዛ ሃይሳዴስ ዩዳ» ጋና፤ ኔኒካ ዩላታሺ ዚቃሶ ባንዳሳ፡፡

10 ጊደ አቲን ኔ ዴይጌቲዳ ዋዴ ዚቃሶ ዴላዳ ኡታ፤ ኔና ዴይጌዳዴይ ዩዲ፡ ሳታ ላጌዞ! ሃ ያ ቶቃሶሆን ኡታ» ጋንዴስ፤ ኔኒካ ሄ ዋዴ ኔናራ ማዳን ኡቲዳ አሳ ኡባ ሲንላን ቦንቺታና፡፡

11 ጋሶይካ ባና ቶቂ ሂስቲዛዴይ ዉሪ ዚቂ ጋና፤ ባና ዚቂ ሂስቲዛዴይ ዉሪ ቶቂ ጋና» ጊዴስ፡፡

12 ዩሱሲካ ዴይጌዳ አዳዛ፡ «ቁማ ዋይኮ ካዋ ሚዛናስ ዴይሲኮ ኔይሳሶ ኔና ዴይሲዲ ሚዞንታ ማላ ኔ ላጌታ ዋይኮ ኔ ኢሻታ፡ ኔ ዳቦታ ዋይኮ ዱሬታ ዋይኮ ዱሬ ጉታታ ዴይጎፓ፡፡

13 ጊደ አቲን አሳ ዴይሳዳ ሚዛና ኮይኮ ማንቆታ፡ ኩሺይ፡ ቶሆይ ባይንዳ ዋቤታኔ ቆቂታ ዴይሳ፤ ኔኒ አንጃታና፡፡

14 ዴይጌቲዳይቲ ኩሺ ዛራናስ ዳንዳዮንታ ጊሻስ ጸሎታ ዳንላ ዋዴ ኔስ ኩሺይ ዛሬታና» ጊዴስ፡፡

ዋጋ ጊቢራ ሌሚሶ

(ማቶ 22:1-10)

15 ማዳን ዩሱሳራ ኢሲፌ ኡቲዳይታፔ ኢሶይ ሃይሳ ሲዩዲ፡ «ጸሳ ካዋቴላን ሽቂዲ ማዳፌ ሚዛ አሲ አንጃቲዳዳ» ጊዴስ፡፡

16 ዩሱሲካ፡ «ኢሲ አሲ ዋልቃማ ጊቢራ ገግሲዲ ዳሮ አስ ዴይጌዴስ፡፡

17 «ጊቢራ ማና ዋዴይካ ጋኪን ዴይጌቲዳ ኢማላታ፡ ሳዉሪካ ጊጊዳ ጊሻስ ሃ ዩቲ!» ጊዲ ዴይጋና ማላ ባ አሸካራ ዩዲዴስ፡፡

18 ጊደ ኣቲን ወሪካ ባስ ሃራ ጋሶ ሺሺዲ ኢሶይ፡ «ሃኢ ጋዴ ሻማዲስ፤ ታ ባዳ ቤያናስ ቤሴስ፤ ሃቺስ ታና ላንጮፋ» ጊደስ።

19 «ሃንኮይሲካ፡ ታኒ ኢቻሹ ዋጾ ቦራ ሻማዲስ፤ ኢስታ ፓጫ ጸላና ገሻስ ሃኙ ታና ላንጮፋ» ጊደስ።

20 «ቃሴ ሃራ ኢሳዳይካ፡ ታኒ ቡሮ ሚሺራቴላን ዳይስ፤ ባናስ ዳንዳይኬ» ጊደስ።

21 «ኦሳንቻዚ ከቴቲዳሶፔ ሲሚዲ ሄሻቲ ጊዳይሳ ባ ጎዳስ ዮቴዳስ፤ ሄ ዋዳካ ገቢራ ገግሲዳይሲ ሃንቄቲዲ ኦሳንቻዛ፡ ሓሌ ኦይዲ ኦጌ ኬዛዳ ማንቆታ፡ ኩሺይኔ ቶሆይ ባይንዳ ዋቤታ፡ ቆማጸታኔ ኣይፌይ ባይንዳ ቆቄታ ሃ ጌልላ» ጊደስ።

22 «ኦሳንቻዚካ ዛሪዲ፡ ታ ጎደ! ኔ ታና ኣዛዚዳይሳ ኡባ ፖላዲስ፤ ሃኢካ ሃራ ኡቴላሶይ ዳስ» ጊደስ።

23 «ጎዳዚካ ኦሳንቻዛ፡ ጌዴ ኦይዲ ኦጌ ኬዛዳ ታ ኬፍ ኩማና ማላ ፑዴኔ ዱጌ ኣፏዛይታ ዋልቃራ ሃ ጌልላ።

24 ታኒ ቱማ ጋይስ፤ ገቢራ ማና ጸይጌቴዳይታፔ ኢሳዳይካ ዶናን ጌልልና» » ጊደስ።

ዩሱሳ ካሎይ ባና ያርሾ ኮዬስ

(ማቶ 10:37-38)

25 ዳር ዳሬይ ኢዛራ ኢሲፌ ቢዛይሳ ዩሱሲ ቤኢዲ ጉዬ ሲሚ፡

26 «ታኮ ዪዛይ ወሪ ባ ኣዋ፡ ባ ማኞኔ ናይታ፡ ባ ኢሻታኔ ሚቹታ፡ ባ ሼምፖ ጊዲን ኢጸንታ ኣጊኮ ታና ካሊዛዴ ጊዳናስ ዳንዳይና።

27 ባ ማስቃሌ ቶኪዲ ታና ካሎንታይ ታና ካሊዛዴ ጊዳናስ ዳንዳይና።

28 «ኢንቴፌ ኢሲ ኣሲ ኬፍ ኬጸናስ ኮይኮ ፖላናስ ዳንዳያናኮኔ ዳንዳዮንታኮ ኮይሮቲዲ ባስ ዲዛ ቢራ ቆፖንታይ ኦኔ?

29 ኬላ ኬጸና ደሚዲ ወርሳናስ ሃኖንታ ኢጲኮ ቤኢዳ ኣሲ ወሪ ኢዛ ቦላ ሚጫና።

30 ኢስቲካ፡ «ሃይሲ ኣዴዚ ኬፍ ኬጸ ኦይኪዳስ ሺን ፖሊቤና» ጊ ሚጫና።

31 «ዋይኮ ኢሲ ካዋይ ሃራ ካዋራ ኦላስ ገጌቲዲ ናምኡ ታሙ ሺ ኣስ ኤኪ ዪዛ ካዋ ዛራናስ ታሙ ሺ ኦላ ኣሳራ ዛራናኮ ኡቲዲ ቆፖንታይ ኦኔ?

32 ኦላ ዛራናስ ዳንዳዬቸንታ ሚሳቲዲ ቤቲኮ ቡሮ ሃሆን ዲሺን ማቃይናናስ ጋና ዬዴስ።

33 ሄሳሶካ ኢንቴፌ ኦናካ ጊዲን ባስ ዲዛይሳ ኦጎንታይ ታና ካሊዛዴ ጊዳናስ ዳንዳዬና።

ማልኦንታ ማጺኔ ለሚሶ
(ማቶ 5:13፤ ማር 9:50)

34 «ማጺኔይ ሎኦሺን ባ ማጺኔቴላ ማልኦ ዬዲኮ ዛሪዲ ዋኒ ማልኦና ዳንዳይዜ?

35 ጋዴን ዬጊን ኦራዲሶንታ ጊሻስ ጮ ካሬ ዋራ ዬጌቴስ፤ ሲዩዛ ሃይሊ ዲዛ ኦሲ ሲዮ!» ጊዴስ።

15

ጳይዲ ቤቲዳ ዶርሳ ለሚሶ
(ማቶ 18:12-14)

1 ኢሲ ጋላስ ቃራጸ ሺሺዛይቲኔ ናጋራንቻቲ ዉሪ ዬሱሳፔ ሲያናስ ኢዛ ኦቺ ሸቂዳ።

2 ፋርሳዊታኔ ጳፌቲ፤ «ሃይሲ ኦዴዚ ናጋራንቻታ ኢጾና፤ ኢስታራካ ሚስ» ጊዲ ባ ጊደን ዙዙሜቲዳ።

3 ዬሱሲካ ኢስታስ ለሚሶ ሂዘጊ ዮቲዴስ፤

4 «ኢንቴ ጊዶፌ ኢሳዴስ ጴቴ ዶርሲ ዲኮ ሄ ጴቴ ዶርሳታፔ ኢሲና ጳይኮ ኦቲዳ ኡዱፋን ታማኔ ኡዱፋናታ ዴምባን ዬጊዲ ጳይዳይሳ ዴማና ጋካናስ ኮያና ቦንታይ ኦኔ?

5 ዴሚዲ ኡፋይሳራ ሃሺን ቶኪ ኤኪዲ፤

6 ባሶ ሲሜስ፤ ባ ላጌታኔ ጉታ ኦሳታ ኢሲ ቦላ ጳይጊዲ፤ «ጳይዳ ታ ዶርሳዮ ዴማዲስ፤ ታናራ ኢሲፌ ኡፋዬቲቴ» ጋና።

7 ታ ኢንቴስ ዮታይስ፤ «ሄሳሶካ ማሮቴላ ኮሽንታ ኡዱፋን ታማኔ ኡዱፋን ጸሎታፔ ማሬቴላን ጌሊዛ ኢሲ ናጋራንቻን ሳሎን ኡፋይስ ጊዳና።»

ጳይዲ ቤቲዳ ቦላ ሺሊንጌ ለሚሶ

8 «ዋይኮ ኢሲ ታሙ ቢራ ሳንቴይ ዲዛ ማጫሳያ ሄ ታማፌ ኢሲኔያ ጳይኮ ጸምፔ ኦይላዳ ዴማና ጋካናስ ኬላ ጋርስ ፒታዳ ሎኤላ ኮዮንታ ማጫሲ ኦኔ?

9 ኢዛካ ዴሚዳ ዋዴ ባ ላጌታኔ ባ ጉታታ ኢሲፌ ጳይጋዳ፤ «ታፔ ጳይዳ ቢራ ሳንቴዮ ዴሚዳ ጊሻስ ታናራ ኢሲፌ ኡፋዬቲቴ» ጋንዲስ።

10 ታ ኢንቴስ የታይስ፤ «ሃሳፉካ ማርታን ጌሊዛ ኢሲ ናጋራንቻ ኣሳን ጸሳ ኪታንቻታ ኣቻን ኡፋይስ ጊዳና።»

ጳይዲ ቤተዳ ናዛ ሌሚሶ

11 «ኢሳዴስ ናሞኡ ናይቲ ዴቴስ።

12 ኢስታፊካ ካሎ ናዚ ባ ኣዋ፥ ሓቦ! ኔስ ዲዛ ሚሻፊ ታ ጊሻ ታስ ኢማ፡ ጊዴስ። ኣዋይካ ባስ ዲዛ ሚሻ ባ ናይታስ ጊሺዴስ።

13 «ዳር ዋዴ ጋሞኦንታ ዲሼ ካሎ ናዚ ባ ሚሻ ኡባ ሺሺ ኤኪዲ ሃሆ ቢታ ቢዴስ፤ ሄንካ ባስ ዲዛ ሚሻ ጎኣይ ባይንዳ ጮ ማላ ጳይሲዴስ።

14 ኢዚካ ባስ ዲዛይሳ ኡባ ጳይሲዳፔ ጉዬ ሄ ቢታን ኢታ ኮሻይ ዴንዲን ዳር ዋይቲዴስ።

15 ሄሳ ጊሻስ ሄ ዴሬን ዲዛ ኣሳፔ ኢሳዴኮ ሺቂዴስ፤ ኢዛዴይካ ባ ጉዲንሐ ሄማና ማላ ጉዲንሐ ሄሚዛሶሆ ዬዲዴስ።

16 ናዚካ ጉዲንሐቲ ሚዛ ሃርቆዛፔ ማናስ ኣሞቲዴስ ሺን ሄሳካ ኢሚዛዴይ ቤቲቤና።

17 «ጊዶ ኣቲን ኢዛ ዋዚናይ ሲሚዳ ዋዴ፥ ታ ኣዋ ኣሽካራታ ኣፑናታፔ ካሊ ፓላሂዜ ሺን ታኒ ሃይሳን ጋፋን ሃይቃና ማታዲና?

18 ዴንዳዳ ታ ኣዋ ሶ ባዳ ኣቦ! ሳሎን ጸሳ፥ ሳኣን ታ ኔና ቆሃዲስ።»

19 ሃይሳፊ ጉዬ፥ ታኒ ኔ ና ጌቲታዳ ጴይጌታናስ ታስ ቤሴና፤ ኔ ኣሽካራታፔ ኢሳ ማላ ታና ቆዳ፡ ጊዴስ።

20 ሄሳ ጊሻስ ዴንዲዲ ባ ኣዋኮ ቢዴስ፤ ጊዶ ኣቲን ቡሮ ኢዚ ሃሆራ ዪሺን ኣዋይ ቤዪ ሚሽቲዲኔ ኢዛኮ ዋጺ ቢዲ ኢዲሚ ኦይኪዲ ዬሪዴስ።

21 «ናዚካ፥ ሓቦ! ሳሎን ጸሳ፥ ሳኣን ታ ኔና ቆሃዲስ፤ ሃይሳፊ ጉዬ ታ ኔ ና ጌቲታዳ ጴይጌታናስ ታስ ቤሴና፡ ጊዴስ።

22 «ጊዶ ኣቲን ኣዋይ ኣሽካራታስ፥ ሔሶቲዲ ኡባፊ ዶሬቲዳ ማይኦ ኤሂዲ ማይዚቲ፤ ኢዛ ቢራጴን ሚጊዶ፥ ኢዛ ቶሆንካ ጫማ ኣሊቲ።

23 ሞጶ ሚርጎ ቦራ ኤሂዲ ሹኪቲ፤ ኣኔ ሚዲ ኡፋዬቶስ።

24 ሃይሲ ታ ናዚ ሃይቂዴስ ሺን ፓጺዴስ፤ ጳይዴስ ሺን ቤቲዴስ፡ ጊዴስ፤ ሄሳፊ ጉዬ ኡፋዬቲሐ ኦይኪዴ።

25 «ሄሲ ሃኒዛ ዋዴ ባይራ ናዚ ጎሻሶን ዴስ፤ ሄፔካ ሲሚዲ ሶ ማቲዳ ዋዴ ዲላ ዱሪስ ሲዪዴስ።

26 ኢዚካ ኣሽካራታፔ ኢሳ ጴይጊዲ፥ «ሄሲ ኣዜ?» ጊ ኦይቺዴስ።

27 እሽካራዚካ፡ ሳኔ እሻይ ዩዴስ፤ እዚ ሳሮኒኔ ሎኦን ሲሚዳ ገሻሰ ኔ አዋይ ሞጽ ሚርጎ ሶራ ሹኪዴስ፤ ጌዴስ።

28 «ባይራ እሻዚካ ሃንቁቲዲ ሶ ጌላናሰካ ኮዬቤና። አዋይካ ካሬ ኬዚዲ እዚ ሶ ጌላና ማላ ዋሲዴስ።

29 ጌዶ እቲን እዚካ ዛሬዲ አዋስ፡ ሳሄኮ ታኒ ሃይሳ ጋካናሰ ኔስ አይሌ ማላ አላዲሰ፤ ኔ አዛዙ፤ እሲኖካ ፓጪሳቤኬ፤ ጌዶ እቲን ታኒ ታ ላጌታራ ኡፋዬታና ማላ ኔ ታስ እሲ ዴይሻ ላቃካ አማቤካ።

30 ጌዶ እቲን ሃይሲ ኔ ናዚ ኔስ ዲዛይሳ ኡባ ላይማቲዛይታራ ወርሲዲ ዩሺን ሞጽ ሚርጎ ሶራ እዛሰ ሹካዳሳ፤ ጌዴስ።

31 «አዋይካ፡ ታ ናዙ ኔ ኡባ ዋዴ ታናራ ዳሳ፤ ታስ ጌዲዳይ ወሪካ ኔሳ።

32 ሃይሲ ኔ እሻይ ሃይቂዴስ ሺን ፓጺዴስ፤ ጳይዴስ ሺን ቤቲዴስ፤ ሄሳ ገሻሰ ኦኒ ኡፋዬታናሰ ቤሴስ፤ ጌዴስ።»

16

ጪንጫ ሄንሳንቻ ሌሚሶ

1 ዩሱሲ ባና ካሊዛይታስ፡ «እሲ ዱሬ አዴ ዳይሳስ እዛ ኬላ አይሲዛ እሲ አሲ ዴስ፤ እዚ ሄ ዱሬ አዴዛ ሚሻ ኦጌይ ባይንዳ ላሊዛይሳ ዋሬይ ዱሬ አዴዛ ሃይሳን ዋጺዴስ።

2 ዱሬ አዴዚ ሄ አዴዛ ጾይጊዲ፡ ሳሃይሶ ታ ሲዩዛይሲ ሄሲ አዜ? ሃይሳፊ ዶማዳ ኔ ታ ኬላ አይሲዛዴ ጊዳናሰ ዳንዳዮንታ ገሻሰ ኔ አላፊቴላን ዲዛ ሚሻ ኦይኪዳ ማዘጋባ ታስ ዛራ፤ ጌዴስ።

3 «ኬላ አይሲዛ አዴዚ ባ ዋዚናራ፡ ታ ጎዳይ ታና ታ አላፊቴላፊ ጎዳና ጌስ፤ ጎያ ማናሰ ታስ ዋልቃይ ባ፤ ዋሳናሰ ዩላታይስ፤ ሄሳ ገሻሰ አይ ኦሉ?» ጌዲ፡

4 ታኒ አላፊቴላፊ ኬዚኮ አሳይ ታና ሞኪ ኤካና ማላ ኦላና ኦጌ ታ ኤራይስ።

5 «ሄሳ ገሻሰ እዛ ጎዳ አጮይ አሰታ ሶላ ዲዛ አሳታ እሳ አሳ ጾይጊዴስ። ኮይሮ ዩዳይሳ፡ ሳኔ ሶላ ጎዳ አጮይ አፑኔ?» ጌዴስ።

6 « እሲ ጾቱ ጸሮ ኩሜላ ዛይቲይ ታ ሶላ ዴስ፤ ጌዴስ፤ አላፊዚ ዛሬዲ ካሴ ኔ ፋራሚዳ ዋራቃታ ሄይ ኤካ ኡታዳ ኤሌ እቻሹ ታሙ ጸሮ ጋዳ ጸፋ ጌዴስ።

7 «ካሊዲ ሃንኮይሳ፡ ሳኔቶ፡ ኔ ሶላ አፑኒ ዲዜ?» ጌዴስ። «ጾቱ ኦጎሮ ጊስቲይ ዴስ፤ ጌዴስ፤ አላፊዚ ዛሬዲ፡ ሳኔ ኔ

ታልኦሽ ፋራሚዳ ዋራቃታ ሄይ ኦስፑን ታሙ ኦጎር ጋዳ ጸፋ ጊዴስ።

8 «ጎዳዚካ ሾጮቹዛ አላፌዚ ኦሊዳ ጨንጫቴላ ጊሻስ ኢዛ ናሺዴስ፤ ሃይሳ ሃ አላሚዛ ናይቲ ባና ሚሳቲዛይታራ ዲዛ ጋጎቴላን ፖኦ ናይታፔ ኣጲዳ ጨንጫታ።

ሚሾ ሴሲዛሶን ፔይሾ

9 «ሄሳ ጊሻስ ታኒ ኢንቴና ጊዛይ ሃ ቢታ ሚሻይ ወሪዳ ዋዴ ሚርና ኬላን ኢንቴ ኤኬታና ማላ ሃኢ ኢንቴስ ዲዛ ሚሻራ ኢንቴስ ላጌ ምጲቲ ጋይስ።

10 ጉላ ሚሻን አማኔቲዛዴይ ዳር ሚሻንካ አማኔታና፤ ጉላ ሚሻን አማኔቶንታዴይ ዳር ሚሻንካ አማኔቲና።

11 ሂስቲኮ ኢንቴ ሃ ቢታ ሚሻን አማኔቶንታ ኢጲኮ ቱማ ሚሻ ሃዳራ ኦይኪቲ ጊዲ ኦኒ ኢንቴስ አማኔ?

12 ኣሳ ሚሻን ኢንቴ አማኔቶንታ ኢጲኮ ኢንቴስ ቡዞ ጊዳና ሚሻ ኦኒ አማኔ?

13 «ናሞኡ ጎዳስ ኢሲቶ አዛዜታና ዳንዳይዛዴይ ኦኒካ ዳና፤ ዋይኮ ኢሳ ዶሲዲ ኢሳ ኢጴስ ዋይኮ ኢሳኮ ሽቂዲ ሃንኮይሳ ሉቁስ፤ ጸሳሲኔ ሚሻስ ኢሲፌ ጋሊ ሃሬታናስ ዳንዳይኬታ» ጊዴስ።

14 ሚሻ ዳርሲ ሲቁዛ ፋርሳዌቲ ሄሳ ኡባ ሲዩዲ ዬሱሳ ቂጲዳ።

15 ዬሱሲካ ኢስታስ፡ «ኢንቴ ኢንቴና ኣሳ ኣቻን ጸሊሴታ፤ ጊዶ ኣቲን ጸሲ ኢንቴ ዋዚና ኤሬስ፤ ኣሳ ኣቻን ቦንቹቲዳዴይ ጸሳ ሲንሳን ቱና» ጊዲ ዮቲዴስ።

ሙሴ ዋጋኔ ኤኮ ጌሎ ጊሻስ

(ማቶ 5:31-32፤ 11:12-13፤ ማር 10:11-12)

16 «ሙሴ ዋጋይኔ ናቤቲ ዮሃኒሲ ያና ጋካናስ ዮቲሾ ጋሞኢዳ። ሄሳ ካሊዲ ቃሴ ጸሳ ካዎቴላ ሚሺራች ቃላይ ሳባኬቲዴስ። ኣሲ ወሪካ ሄ ጌላናስ ዋጲቴስ።

17 ጊዶ ኣቲን ሙሴ ዋጋፔ ኢሲ ቄሪና ኩንዳ ኣታናይሳፌ ሳሎይኔ ሳኦይ ኣቆናይሲ ካዉሾ ጊዳና።

18 «ባ ማቶ ኣንጂ ዬዲዲ ሃራ ማጫ ኤኪዛ ኣሲ ወሪካ ላይማቴስ፤ ባ ኣዚናፔ ኣንጄታ ቢዳር ኤኪዳይሲካ ላይማቴስ።

ዱሬ ኣዴዛኔ ማንቆ አላዛሬ

19 «ቃሴካ ዬሱሲ ኢስታስ፥ ለሎኑ ማይኦ ማይኢዲ ጋላስ ጋላስ ሎኑ ዱሳ ኡፋይሳን ዲዛ ኢሲ ዱሬ ኣሲ ዴስ» ገዴስ።

20 ሄ ኣዴዛ ፔንገን ኩሜሳ ቦላይ ማዲንል ጸላ ገዲዳ ኢሲ ኣላዛሬ ጌቲቲዛ ማንቆ ኣዴ ዲዛይሲ ኢቺ ዴስ።

21 ኢዚካ ሄ ዱሬ ኣዴዛ ኬላን ኣሳይ ካል ሚሺን ማዳፌ ጋዴን ዋጂዛ ሱፓ ማጺ ማናስ ኣሞቴስ፤ ካናቲካ ኢዛ ማዲንላ ላጩቴስ።

22 «ሄ ማንቆ ኣዴዚ ሃይቂን ሳሎ ኪታንቻቲ ኣብራሃሜ ኪኦ ኤኪ ቢዳ፤ ቃሴ ዱሬ ኣዴዚካ ሃይቂዲ ሞጌቲዴስ።

23 ኢዚ ሲኦሉን ዋዬቲሼ ቆቁ ጊዲ ሃሆን ኣብራሃሜ ጸሌዴስ፤ ኣላዛሬካ ባ ኪኦን ኦይኪ ዲሺን ቤዱዴስ።

24 «ዱሬ ኣዴዚ፥ ሓዋ ኣብራሃሜ! ሃይሳን ዋዬቲዛ ታስ ሚሺታርኪ! ገ ኣላዛሬይ ባ ቢራዴ ጸራ ኢርጸ ሃላን ቦቺዲ ታ ኢንጸርስ ኢርጸሳና ማላ ሃ ዬዳርኪ!» ገ ዋሲዴስ።

25 «ገዶ ኣቲን ኣብራሃሜይ፥ ታ ናዞ ኔኒ ቢታ ቦላ ዳሼ ሎኦ ዱስ ዴኢዳይሳ ማላ ኣላዛሬይ ካሴ ዋዬ ቤኢዳይሳ ኔ ቆፓ፤ ገዶ ኣቲን ሃኢ ኢዚ ኡፋዬቲሺን ኔኒ ዋዬታሳ።

26 ሄሲ ዉሪ ሃኒሺን ሃን ዲዛ ኣሲ ሃፔ ሄ ኢንቴኮ ኣጵንታ ማላ ቃሴካ ኢንቴኮን ዲዛይ ሃ ኦኮ ኣጵና ኮይዛዴይ ሃ ኣጵንታ ማላ ኢንቴሲኔ ኦስ ገዶን ገታ ኣፎይ ገጌቲዴስ» ገዴስ።

27-28 «ዱሬ ኣዴዚ ቃሴ፥ ሓቦ! ሄሲ ሄሳ ገዲኮ ኔኒ ኣላዛሬ ዲጌ ታ ኣዋ ሶ ዬዳና ማላ ታ ኔና ዋሳይስ፤ ታስ ኢቻሹ ኢሻቲ ዴቴስ፤ ሃይቲ ሃ ዋዬሶ ዮንታ ማላ ቢዲ ኢስታስ ሎኤል ዮታና ማላ ኣላዛሬ ዬዳርኪ!» ገዴስ።

29 «ኣብራሃሜይ ኢዛስ ዛሪዲ፥ ሙሴይኔ ናቤቲ ሄን ኢስታ ኣቻን ዲዛ ገሻስ ኢስታፌ ሲዬቶ» ገዴስ።

30 «ኢዚካ ዛሪዲ፥ ሓዋ ኣብራሃሜ፥ ሄሳ ማላ ገዴና፤ ሃይቂዳ ኣሳፔ ኢሳዴይ ሃይቆፔ ዴንዲ ቢኮ ኢስቲ ጸሳ ማርቴላን ጌላና» ገዴስ።

31 «ኣብራሃሜይካ ዛሪዲ፥ ሙሴይኔ ናቤቲ ገዛይሳ ሲዮንታ ኢጺኮ ሃይቂዳ ኣሳፔ ኢሳዴይ ዴንዲዳኮካ ኢስቲ ኣማኔቴና» ገዴስ።

17

ኣሳስ ቆጶ ገዳናፔ ናጌቴል
(ማቶ 18:6-7፥21-22፤ ማር 9:42)

1 ዩሱሲ ባና ካሊዛይታ፡ «አሳ ጭጭራ ናጋራን ዩጌዛ ሚሺ ዮንታ አገና፤ ጌዶ አቲን ያና ጭጭራ ጋሶ ጌዲዛደስ አዬ አና!

2 ሄ አዳዚ ሃ ጉላታፔ አሳስ ጭጭ ጌዳናፔ ዋጸ ሹቺ አዛ ቆዴን ቃሹቲን አባ ጌዶ አዚ ዩጌቲዛኮ አዛስ ሎኦ ጌዳና፡፡

3 ሄሳ ጊሻስ አንቴ ሁኤስ ናጌቲቴ፡፡ ሩኔ አሻይ ኔና ቆሂኮ ሃንቄታ፤ አዚ ባ ሞሮ ኤሪዲ ሲሚኮ ማራ፡፡

4 ኢሲ ጋላሳን ላፑንቶ ዛሪ ዛሪ ቆሂዲ ላፑንቶዛ ዛሪ ዛሪ፡ (ማራ) ጌኮ ማራ» ጌዴስ፡፡

5 ሃዋሪቲዛ፡ «ጎዶ! ኑስ አማኖ ጉጆ» ጌዴ፡፡

6 ጎዴይዛ፡ «ጋሼ አይፌ ላጌ አማኖይ አንቴስ ዲኮ ሃይሳ፡ ሩኤላ ቶቃሌታ ባዳ አባን ጌላ ቶኬታ» አንቴ ጌኮ አዚ አንቴስ አዛዜታና» ጌዴስ፡፡

7-8 ቃሴዛ ዩሱሲ፡ «አንቴ ጌደፌ ኢሲ አሳስ ጎሻንቻይ ዋይኮ ደርስ ሄሚዛ አሸካሪይ ዲኮ አዚ ጎሻሶፔ ሲሚሺን፡ ታስ ማና ካዋ ጊጊሳ፤ ታ ማዳ ኡያና ጋካናስ ጌጼታዳ ታስ ኦላ፤ ሄሳፌ ጉዬ ማንዳሳኔ ኡያንዳሳ» ጌስ አቲን ሃኢ ቁማ ማና ሃ አቆ ጊዜ?

9 ሂስቲኮ ሄ አሸካሪ ጎዴይ አዚ አዛ አዛዙ ፖሊዳ ጊሻስ አዛ ጋላቲ ኤሪዜ?

10 ሄሳ ጊሻስ አንቴኒካ አንቴ አዛዜቲዳይሳ ወርሲ ፖሊዳ ዋዴ፡ ሩኒ ጎአይ ባይንዳ ኦሳንቻታ ኑስ ኦላናስ ቤሲዛይሳ ፖሊ ኦሊደስ» ጌቲ፡፡

ዩሱሲ አንቺራቻ ሃርጌፌ ፓሊዳ ታሙ አሳታ

11 ሄሳፌ ጉዬ ዩሱሲ ዩሩሳላሜ ቢሼ ሳማሪያራኔ ጋሊላ አቻራ አዲደስ፡፡

12 ኢሲ ጉታ ጌሊዳ ዋዴ አንቺራቻ ሃርጊዛ ታሙ አሳቲ አዛ ዴሚዳ፡፡ ኢስቲካ ሃሆን ኤቂዲ

13 ባ ቃላ ቶቁ ሂስቲዲ፡ «ዩሱሳ! ጎዶ! ኑስ ሚሹታርኪ!» ጌዴ፡፡

14 አዚካ ኢስታ ቤኢዲ፡ «ቢቲ! አንቴና ቄሴታስ ቤሲቲ» ጌዴስ፤ ኢስቲካ ቡሮ ቢሼ ኦጌ ሶላ ፓጺዳ፡፡

15 ኢስታፌ ኢሶይ ባ ፓጺዳይሳ ቤኢዲ ባ ቃላ ቶቁ ሂስቲዲ ጸሳ ቦንቺሼ ሲሚደስ፡፡

16 አዛዴይካ ዩሱሳ ቶሆ ሶላ ኩንዲዲ ጋላቲዴስ፤ አዚካ ሳማሪያ ቢታ አሳ፡፡

17 ዩሱሲካ አዳዛ፡ «ፓጺዳይቲ ታሙ አስ ዴቲኔ? ሂስቲን ኡዲፋናቲ አዋ ቢዶ?

18 ሃይሳ ደማ ዳሬ አዳዘፔ አቲን ጸሳ ጋላቲዛይ ባ ጉሴ?»
ጌዲ ኦይቺዳስ።

19 አዳዘካ ዛሪዲ «ዳንዳዳ ባ! ኔና ኔ አማኖይ ፓሊዳስ»
ጌዳስ።

ጸሳ ካዎቲላ ዩሳ ጊሻስ
(ማቶ 24:23-28፥37-41)

20 «ጸሳ ካዎቲላ አይዳ ያኔ?» ጌዲ ፋርሳዌቲ ዬሱሳ ኦይቺዳ
ዎዴ ዬሱሲ፥ «ጸሳ ካዎቲላ ቤቲዛ ማላታታን ዩኩ።

21 አሳይ ጸሳ ካዎቲላ ሃን ዳዉስ ዎይኮ ሄን ዳዉስ ጋናስ
ዳንዳይቲና፤ ጸሳ ካዎቲላ አንቲ ጌደን ዳዉስ» ጌዲ ዛሪዳስ።

22 ባና ካሊዛይታስካ፥ «አሳ ና ጋላሳታፔ ኢሲ ጋላሳዮ ቤያናስ
አንቲ አዎታና ዎዴይ ያና፤ ጌደ አቲን አንቲ ቤዬኬታ።

23 አሳይ አንቲስ፥ «ሃን ዳዉስ» ዎይኮ፥ «ሄን ዳዉስ» ጋና ሺን
አንቲ ኢስታ ካሊዲ ቦፒቲ።

24 ጋሪይካ ዎልቃንሊ ዎልቃሚዲ ሃ ጋጽፔ ሄ ጋጽ ጋካናስ
ፖኢሲዛ ማላ አሳ ናይ ዪዛ ጋላስ ኢዛ ማላ ሃናና።

25 ጌደ አቲን ሃይሲ ወሪ ሃናናፔ ኮይሮ አሳ ናይ ዳሮ ሜቶ
ኤካናሲኔ ሃይሳ ሃ ዬሌታን ካዴታናስ ቤሰስ።

26 «ኖሄ ዎዴ ሃኒዳይሳ ማላ አሳ ና ዎዴንካ ሄሳሶ ሃናና።

27 ኖሄይ ማርካቤን ጌላና ጋላስ ጋካናስ አሳይ ሚሺኒኔ
ኡዪሺን፥ ኤኪሺኒኔ ጌሊሺን ዳይሲዛ ሃሊ ዪዲ ወርሲካ
ዳይሲዳስ።

28 «ሎጼ ዎዴካ ኢዛ ማላ ሃኒዳስ፤ አሳይ ሜሲኔ ኡዬስ፤
ባይዜሲኔ ሻሜስ፤ ቶኪዛዝ ቶኬስ፤ ኬሊካ ኬጾስ።

29 ጌደ አቲን ሎጼይ ሶዶሜፔ ኬዚዳ ጋላስ ሹቺኔ ሚሶ
ቆርንታ ዲኔ ታማይ ሳሎፔ ቡኪዲ ኡባ ዳይሲዳስ።

30 «አሳ ናይ ቆንጨዛ ጋላስ ሄሳሶ ሃናና።

31 ሄ ዎዴ ባ ኬላ ቦላ ዲዛዳይ ኦኒካ ኬላ ጌደን ዲዛ ሚሽ
ኤካና ጌዲ ዱጌ ዎዶፎ፤ ሄሳሶካ ጎሻ ሶን ዲዛ አሲ ጉዬ ሶ
ሲሞፎ።

32 ሎጼ ማቾ ቆፒቲ።

33 ባ ዴኦ ጋሞኢሳና ኮይዛይ ወሪ ዳይሳና፤ ባ ሼሞፖ አሊ
ኢሚዛዳይ ጋሞኢሳና።

34 ታ ኢንቴስ ገዛይ ሄ ዎዴ ኦማርስ ናምኡ ኣሲ ኢሲ ሂጸን ኢቻና፤ ኢሶይ ኤኬታና፤ ኢሶይ ኣታና።

35 ናምኡ ማጫሳቲ ኢሲፌ ጋጨሺን ኢሲኔያ ኤኬታና፤ ሃንኮራ ኣታና።

36 ናምኡ ኣሲ ኢሲፌ ጎሻሶን ዳና፤ ኢሶይ ኤኬታና፤ ኢሶይ ኣታና። *

37 «ኢስቲካ ዛሪዲ፥ ሳዶ! ኢስቲ ኣዋ ኤኬታኔ?» ጊዳ፤ ኢዚካ ኣሃይ ዲዛሶን ኣንኮቲ ሺቃና» ጊዳስ።

18

ኣምኤዮኔ ማካላ ዳናዛ

1 ባና ካሊዛይቲ ኣዛሎንታ ኡባ ዎዴ ዎሳናስ ቤሲዛይሳ ኤሪሳናስ ዬሱሲ ሃ ለሚሶዛ ኢስታስ ዮቲዴስ።

2 «ኢሲ ካታማን ጸሳስ ያዮንታ ኣሲኔ ቦንቸንታ ኢሲ ዳናይ ዴስ።

3 ሄ ካታማንካ ኢሲ ኣምኤያ ዳዉስ። ኢዛካ፥ ሓ ባልጋራታስ ሞቶይ ዲዛ ገሻስ ፒርዳርኪ!» ጋሼ ኢዛኮ ሲሜሬታዱስ።

4 «ዳናዚካ ዳሮ ዎዴ ጋካናስ ኢዚስ ፒርዲቤና፤ ጊዶ ኣቲን ጉዬፔ ባ ዎዚናን፥ ጸሳስ ያዮንታ ኣሲካ ቦንቸንታ ኣጊኮ።

5 ሃና ኣምኤያ ታና ዋዪሲዛ ገሻስ ታ ኢዚስ ፒርዳና» ቆፒዴስ፤ ሄሳ ሂስቶንታ ኣጊኮ ኡባ ዎዴ ሲሜሬታዳ ኢዛ ታና ዳቡርሳና» ጊዴስ።

6 ጎዳይካ፥ «ማካላንቻ ዳናይ ጊዳይሳ ሲዬቲ፤

7 ጸሲ ቃማ፥ ጋላሲኔ ኦማርስ ኢዛኮ ዋሲዛ ዶሬቲዳይታስ ፒርዴኔዬ? ታና ኣይ ሜቲዴ! ጊዲ ባ ማዶ ጋምኢሳንዴ?

8 ታ ኢንቴስ ጋይስ፤ ኢዚ ኢስታስ ኤሌ ፒርዳና፤ ጊዶ ኣቲን ኣሳ ናይ ዪዛ ዎዴ ቢታ ቦላ ኣማኖ ዴማንዴሻ?» ጊዴስ።

ኦቶራንቻ ፋርሳዌኔ ኣሸኬ ጊዲዳ ቃራጻ ሺሺዛዴ ለሚሶ

9 ባና ጸሎ ኣሳ ማላ ቆዲዲ ጨቄቲዛይታሲኔ ሃራታ ለቆ ኣይፌን ጸሊዛይታስ ለሚሶራ፤

10 «ናምኡ ኣሳቲ ዎሳናስ ጸሳ ኬፍ ቢዳ፤ ኢሶይ ፋርሳዌ፥ ሂንኮይሲ ቃራጻ ሺሺዛዴ።

* 17:36 ኢሲ ኢሲ ገሻ ማጻፋታን ታይቦ 36 ቦላ ዲዛ ቆፋ ጉጃቲስ፤ ቆፋዚካ ማቶ 24:40 ዲዛይሳ ሚሳቲስ።

11 ፋርሳዌዚካ ኤቂዲ ባ ገሻሰ፡ «ጸሶ! ታኒ ሃራ እሳ ማላ ቦንቂዛዴ፡ ማካሊዛዴ፡ ላይማቲዛዴ ሃራፔካ ሃይሳ ቃራጸ ሺሺዛዴ ማላ ገደንታ ኣጊዳ ገሻሰ ታ ኔና ጋላታይሰ።

12 ሳሚንታን ናምእ ጸማይሰ፤ ታሰ ዲዛ ታማፌ ኢሳ አማይሰ፤ ጊዲ ዋሲዴሰ።

13 «ጊዶ ኣቲን ቃራጸ ሺሺዛ ኣዴዚ ሃሆን ኤቂዲ ፑዴ ሳሎ ቆቁ ጊ ጸላናሰ ኮዪቤና፤ ጊዶ ኣቲን ባ ቲራ ኢጪሺ፡ «ጸሶ! ታና ናጋራንቻዛ ማራርኪ!» ጊዴሰ።

14 «ታ ኢንቴሰ ዮታይሰ፤ ጸሳ ሲንላን ፋርሳዌዚ ጸሎቴል ዴሚቤና፤ ሃይሲ ቃራጸዛይሲ ጊዲኮ ጸሊዲ ባሶ ሲሚዴሰ፤ ባና ቆቂሲዛይ ዉሪ ዘቂ ጋና፤ ባና ዘቂሲዛይ ጊዲኮ ቆቁ ጋና» ጊዴሰ።

15 ዬሱሲ ቦሼሬፋና ማላ አሳይ ጉላ ናይታ ኢዛኮ ኤሂዴሰ። ኢዛ ካሊዛይቲካ ሄሳ ቤኢዲ ሃንቁቲዳ።

16 ጊዶ ኣቲን ዬሱሲ ጉላ ናይታ ባኮ ጸይጊዲ፡ «ጉላ ናይቲ ታኮ ያናይሳ ዲሳፍቲ፤ ጸሳ ካዎቴል ሃይታንታ ማላሳ።

17 ታ ኢንቴሰ ቱሙ ጋይሰ፤ ጸሳ ካዎቴል ጉላ ና ማላ ኤኮንታይ ዉሪ ኢዚን ጌሊና» ጊዴሰ።

ሃ ቢታ ሃርኔ ሳሎ ካዎቴል

(ማቶ 19:16-30፤ ማር 10:17-31)

18 ኣይሁዳታ ሃላቃታፔ ኢሶይ፡ «ኪያ አስታማሬ! ሚርና ዴኦ ላታናሰ ታ ኣይ ኦሶ?» ጊ ኦይቺዴሰ።

19 ዬሱሲካ፡ «ኣዛሰ ታና ኪያ ጋይ? ኢሲ ጸሳፌ ኣቲን ኪያይ ሃራይ ዴና።

20 «ላይማቶፓ፤ ዎቶፓ፤ ካይሶቶፓ፤ ዎርዶ ማርካቶፋ፤ ኔ አዎ ቦንቻ» ጊዛ ኣዛዘታ ኔ ኤራሳ» ጊ ዛሪዴሰ።

21 ኣዴዚካ፡ «ሃይታ ጊዲኮ ጉል ናቴቴላፌ ዶማዳ ናጋዲሰ» ጊዴሰ።

22 ዬሱሲካ ሄሳ ሲዱዲ፡ «ሂሰቲኮ ኔሰ ኢሲ ሚሺ ፓጩሰ፤ ኔሰ ዲዛዝ ዉርሳ ባይዛዳ ማንቆታሰ አማ፤ ሳሎ ማዝጋባን ዴማንዳሳ፤ ኢዛፔ ጉዬ ያዳ ታና ካላ» ጊዴሰ።

23 ጊዶ ኣቲን ኣዴዚ ሄሳ ሲዱዳ ዎዴ ዳር ሃርይ ኢዛሰ ዲዛ ገሻሰ ኬሂ ሚሺቲዴሰ።

24 ዬሱሲካ ኣዴዛ ጸሊዲ፡ «ዳር ሚሺ ዲዛ አሳቲ ጸሳ ካዎቴል ጌላናይሲ ኣይ ማላ ሜቶ!

25 ዱሬይ ጸሳ ካዎቴስ ጌላናይሳፌ ጋሜላይ ናርፔ ሉኮራ አቋናይሲ ማታና» ጌዴስ።

26 ሄሳ ሲዪዳ አሳይ፥ «ሂስቲን ኦኒ አታና ዳንዳይዜ?» ጌዴስ።

27 ዬሱሲካ፥ «አሳ አቻን ዳንዳይቶንታይ ጸሳ አቻን ዳንዳይቲስ» ጌዴስ።

28 ጴጽሮሲካ፥ «ሄኮ ኦኒ ኩስ ዲዛዝ ኡባ አጊዲ ኔና ካሊዶስ» ጌዴስ።

29 ዬሱሲካ ኢስታስ፥ «ታ ኢንቲስ ቱሙ ጋይስ፤ ጸሳ ካዎቴላ ጊሻስ ጊዲ ባ ኬፉ፥ ባ ማቾ፥ ባ ኢሻንታ ዎይኮ ባና ዬሊዳይታ ዎይኮ ባ ናይታ አጊዳዴይ፥

30 ሃኢ ዎዴ ዳሮ ዳኮ ኩሼ ኤኮንታይኔ ዪዛ ዎዴ ቃሴ ሜርና ዴኦ ኤኮንታይ ኦኒካ ዴና» ጌዴስ።

ዬሱሲ ባ ሃይቆ ጊሻሲኔ ዴንላ ጊሻሲ ሄሻንላ ዮቲዴስ
(ማቶ 20:17-19፤ ማር 10:32-34)

31 ዬሱሲካ ባና ካሊዛ ታማኔ ናምኦታ ዱማ ኤፊዲ፥ «ሃኢ ኦኒ ዬሩሳላሜ ኬዛና ጎስ፤ ናቤቲ አሳ ና ጊሻስ ጸፊዳይሲ ዉሪ ፖሌታና።

32 አይዛቤታስ አሊ ኢማና፤ ኢስቲካ ኢዛ ቂቂ ካኦናኔ ዎዪሳና፤ ኢዛ ቦላ ጨታና።

33 ጋራፋና፤ ሄሳፌካ ዛሪዲ ዎቋና፤ ኢዚካ ሄሻንላ ጋላስ ሃይቆፔ ዴንዳና» ጌዴስ።

34 ኢዛ ካሊዛይቲ ጊዲኮ ሄሳ ኡባፌ ኢሲኖካ ኤሪቤቲና፤ ኢዚ ጊዛይሲካ ኢስታስ ጌሊቤና። ኢዚ አዛ ጊሻስ ሃሳይዳኮ ኤሪቤቲና።

35 ዬሱሲ ኢያርኮ ጌቲቲዛሶ ማቲዳ ዎዴ ኢሲ ቆቄ አዴይ ኦጌ ዶናን ኡቲዲ ዎሴስ።

36 ሄ ቆቄ አዴዚካ ዳሮ አሳይ ኦጌራ አቂዛይሳ ሲዪዲ፥ «ሄሲ አዜ?» ጌ ኦይቺዴስ።

37 ኢስቲካ ኢዛስ፥ «ናዚሬቴ ዬሱሲ ሃይሳራ አቆስ» ጌ ዮቲዳ።

38 ኢዚካ፥ «ዳዊቲ ና ዬሱሳ ታስ ቃቆታ!» ጌ ዎሲዴስ።

39 ዬሱሳ፤ ሲንፋቲ ቢዛይቲ፥ «ጮኡ ጋ!» ጌዲ ሃንቂቲዳ። ጊዶ አቲን ኢዚ፥ «ዳዊቲ ናዉ! ታስ ቃቆታ!» ጌዲ ዳርሲ ዎሲዴስ።

40 ዬሱሲካ ኤቂዲ አዴዛ ኢዛኮ ኤሃና ማላ አዛዚዴስ፤ ኢዚካ ኢዛኮ ሺቂዳ ማላ፥

41 «ታ ኔስ አይ ኦላና ማላ ኮያይ?» ጌዲ ኦይቺደስ። ቆቄዚካ፡ «ጎዶ ጸላናስ ኮያይስ» ጌደስ።

42 ዬሱሲካ፡ «ኔና ኔ አማኖይ ፓሊደስ ጸላ» ጌደስ።

43 አዳዚ ሄራካ ጸሊደስ፤ ጸላካ ቦንቺሼ ዬሱሳ ካሊደስ፤ ሄሳ ቤኢዳ ዳሬይ ዉሪ ጸላ ጋላቲደስ።

19

ዬሱሳኔ ዜኪዮሳ

1 ዬሱሲ ኢያርኮ ጌቲቲዛሶራ አጂ ቢሺን፡

2 ዜኪዮሳ ጌቲቲዛ ኢሲ አሲ ሄን ዬሱሲ ቢዛ ኦጌ ቦላ ደስ። ኢዚካ ቃራጸ ቃንጸሲዛይታስ ሃላቃኔ ኬሂ ዱሬ አሳ።

3 ኢዚ ዬሱሳ ጌቲቲዛይሲ አዋይሳኮ ቤያናስ ኮዪሺን ቃንፋ አሳ ጌዲዳ ገሻሲኔ ዳር ዳሬይ ዬሱሳ ካሊዛ ገሻስ ዬሱሳ ቤያናስ ዳንዳይቤና።

4 ዬሱሲ ሄ ኦጌራ አጂሺን ሲንፊ አጂዲ ኦጌ ቦላ ዲዛ ኢሲ ኤፋ ሚሳ ቦላ ኬዚደስ። *

5 ዬሱሲ ኤፋ ጋርስ ጋኪዲ ጶቄ ሂስቲ ጸሊዲ፡ «ዜኪዮሳ! ሃች ታ ኔ ኬፋን ፔአናስ ቤሴስ፤ ኤሌላ ዋጃ» ጌደስ።

6 ኢዚካ ኤሌሊ ዋጂዲ ኡፋይሳን ሞኪ ኤኪደስ።

7 ሄ ዋዴ ሄን ኢዛራ ዲዛ አሳይ ሄሳ ቤኢዲ፡ «ናጋራንቻ ኬፋን አማቶ ማና ጌስ» ጌዲ ዉሪካ ባ ጌዶን ዙዙሜቲዳ።

8 ጌዶ አቲን ዜኪዮሲ ኤቂዲ፡ «ጎዶ! ታኒ ታስ ዲዛ ሚሼ ኡባፌ ባጋ ሻካዳ ማንቆታስ አማና፤ ታኒ አናፔካ ዋርዶራ ቦንቃ ኤኪዳዚ ዲኮ ኦይዲ ኩሼ ጉጃዳ ኢዛደስ አማና» ጌደስ።

9 ዬሱሲካ፡ «ሃ አዳዚ አብራሃሜ ና ጌዲዳ ገሻስ ሃች ሃ ኬፋስ ፓጳቲሊ ዪደስ» ጌደስ።

10 ሃይሳስ ጋሶይካ አሳ ናይ ሃ ዪዳይ ቆይዳይሳ ኮያናሲኔ አሻናሳ።

11 አሳይ ሃይሳ ሲዪሺን ለሚሶራ ሃሳያ ኦይኪደስ፤ ጋሶይካ ኢዚ ዬሩሳላሜ ጋካናስ ማቲዳ ገሻሲኔ አሳታስ ጸላ ካዋቲሊ ቆንጫና ሃኒዛ ሚሳቲዳ ገሻሳ።

12 ሄሳ ገሻስ፡ «ኢሲ ካዋይ ባ ካዋቲላ ሹሜቲላ ኤኪ ያናስ ሃሆ ቢታ ቢደስ።

* 19:4 ኢሲ ኢሲ ባጋ ጋሞላ ቃላን ኤፋ ሚሳ ገዛይሳ ቦባ ጌቲስ። 19:10

ማቶ 18:11 19:11 ማቶ 25:14-30

13 ባ እሽካራታ ገደፌ ታማታ ጸይጊዲ ታሙ ሚናኔ ተ ኢስታስ አሚዲ፥ ታ ሲማዳ ያና ጋካናስ ሃይሳ ሚሻን ዛልኢቴ፥ ገደሰ።

14 «ሄ ደፊ አሳቲ ቃሴ ኢዛ ኢጲዳ ገሻስ፥ ሃይሲ አዳዚ ኑ ቦላ ካዎታና ማላ ኮዮኮ፥ ገዲ እስ ኢዛ ጌዶራ ከታ አላ ዬዲዲ።

15 «ገደ አቲን ሃ ካዎ ናዚ ካዎ ገዲዲ ጉዬ ባ ደፊ ሲሚደስ። ካሴ ቢሼ ታሙ ሚናኔ አሚዳ ታሙ እሽካራቲ ኢዚ አሚዳ ቢራን ዛልኢዲ አይ ኬና ቲርፊሲዳኮ ኤራናስ ኢስታ ጸይጊደሰ።

16 «ኢስታፊ ኮይርዚ ሸቂዲ፥ ሳዶ! ኔ ታስ አሚዳ ታሙ ሚናኔይ ሃራ ታሙ ዬሊደስ፥ ገደሰ።

17 «ጎዳዚካ ኢዛ፥ ሳይ አማኔቲዳ እሽካራ፤ ሎኦ አላዳሳ። ጉላ ሚሻን ኔ አማኔቲዳ ገሻስ ታሙ ካታማታ ኔ ሃራና ማላ ኔስ አማዲስ፥ ገደሰ።

18 «ናሞእንሶዚካ ኢዛኮ ሸቂዲ፥ ሳዶ! ኔ ታስ አሚዳ ሚናኔፔ ሃራ ኢቻሹ ሚናኔይ ዎፋደስ፥ ገደሰ።

19 «ኢዛ ጎዳዚ ኢዛስ ዛሪዲ፥ ሳይ አይሳና ማላ ታሙ ካታማቲ ኔስ አማኔቲዳ፥ ገደሰ።

20-21 «ቃሴካ ሃንኮ ኦሳንቻይ ሸቂዲ፥ ሳዶ! ኔኒ ዎሶንታሶፔ ኤኪዛዴ፤ ዜርንታሶፔ ማጸዛዴኔ ማንጾ ኢታ እስ ገዲዳ ገሻስ ታ ኔስ ባባዳ ጫርቃን ጸጸ ዎሊዳ ኔ ሚናኔዮ ሄይ ኤካ፥ ገደሰ።

22-23 «ኢዛ ጎዳዚ ዛሪዲ ኢዛስ፥ ሃይሶ ኢታ ኦሳንቻዞ! ታ ኔ ቃላን ኔና ዛራ ፒርዳይስ። ታኒ ዎሶንታሶፔ ኤኪዛዴኔ ዜርንታሶፔ ማጸዛዴ ማንጾ ኢታ እስ ገዲዳይሳ ኤራሳሺን ታኒ ታ ሚሻ ዬሎራ ኤካና ማላ ሄ ሚሻን ኦላና አሳታስ አዛስ አማቤኪ?» ገደሰ።

24 «ኢዛ ጎዳዚካ ሄን ኤቂዳ አሳታ፥ ሳይ ኩሼፔ ሚናኔዛ ኤኪዲኔ ታሙ ሚናኔይ ዲዛይሳስ አሚቴ፥ ገደሰ።

25 «ኢስቲካ ዛሪዲ፥ ሳዶ! ኢዛስ ታሙ ሚናኔይ ዳስኮ፥ ገደሰ።

26-27 «ኢዚካ፥ ሳይዛደስ ኡባስ ሃራይ ጉጃታና፤ ባይንዳደስ ካሴ ዲዛይሲ ኢዛፔ ኤኬቲቻና። ገደ አቲን ታኒ ኢስታ ቦላ ካዎቶንታ ማላ ኮዬዳይታ ሃይታ ታ ሞርኬታ ታኮ ሃ ኤሂዲ ታ ሲንላን ሹኪቴ ገ ዛሪደስ» ገደሰ።

† 19:13 ሚናኔ፡ ሚናኔይ ሚሻቲ አይ ላጌ ዳጲዛኮ ኤራናስ ማዲዛ ሚሻ፤ ቃሴካ ሚሻ ገዲዳ ዛልኢስካ ማደስ፤ ኢሲ ሚናኔይ ሄ ዎዳ ኢሳደስ ሄቹ ጋላሳስ ኦሶ ዳሞዛ ሊኬ ገዳና። 19:26-27 ማቶ 13:12፤ ማር 4:25፤ ሉቃ 8:18

28 ሄሳ ሃሳዬ ሲሚዲ ዩሱሲ ዩሩሳላሜ ከዛናሰ ኢስታፊ ሲጎላቲ ቢደሰ።

29-31 ደብራዛይቲ ጌቲቲዛ ዙማ ቦላ ዲዛ ቤቴፋንኔ ቢታኒያ ጌቲቲዛ ካታማታኮ ማቲዳ ዎዴ ባና ካሊዛይታፔ ናምእታ፡ «ሄን እንቲ ሲጎላን ዲዛ ቄሪ ካታማዮ ቢቲ፤ ቢዲ ካታማዮ እንቲ ጌሊሺን ኦኒካ ቶጊ ኤርንታ ኢሲ ቃሼቲ ዲዛ ሃሬ ጉቲ እንቲ ዴማና፤ ኢዛ ቢርሺዲ ሃ ታሰ ኤኪ ዪቲ፤ እንቲና ኦኒካ፡ «አዛሰ ቢርሺቲ?» ጊዲ ኦይቺኮ፡ «ጎዳሰ ኮሼሰ ጌቲ» » ጊ ከቲደሰ።

32 ከጌቲቲዳይቲካ ቢዲ ኢዚ ኢስታሰ ዮቲዳ ማላ ሃሬ ጉቲዛ ዴሚዳ።

33 ኢሰቲ ጉቲዛ ቢርሺን ጉቲዛ ጎዳቲ ቤኢዲ፡ «አዛሰ ቢርሺቲ?» ጊዲ ኦይቺዳ።

34 ኢሰቲካ፡ «ጎዳሰ ኮሼሰ» ጊዳ።

35 ሃሬ ጉቲዛ ዩሱሳኮ ኤሂዲ ባ ማይኦ ኡባ ጉቲዛ ቦላ ዩጊዲ ሃሬ ጉቲዛ ቦላ ዩሱሳ ቶጊሲዳ።

36 ኣሳይ ዉሪካ ባ ኣፋላ ዩሱሲ ቢዛ ኦጌ ቦላ ሚጪደሰ።

37-38 ደብራዛይቲ ዙማ ቦላራ ዲጌ ዎሊዛ ኦጌዛኮ ማቲዳ ዎዴ ቆዳይ ባይንዳ ዴሬይ ባ ቤኢዳ ማላታ ጊሻሰ ዉሪካ ኡፋይሳራ ባ ቃላ ቋቄ ሂሰቲዲ፡ «ጎዳ ሱጎላን ዪዛ ካዎይ ኣንጃቲዳይሳ፤ ሳርይ ሳሎን፡ ቦንቾይ ሳሎፔ ቦላ ሳሎን ጊደ» ጊደሰ።

39 ዴሬፔ ኢሲ ኢሲ ፋርሳዌቲ ዩሱሳ፡ «ኣስታማሬ! ሃ ኔና ካሊዛ ኣሳይ ጊዛይሳ ጎንታ ማላ ሃንቃ» ጊደሰ።

40 ኢዚካ ኢስታሰ ዛሪዲ፡ «ሃይቲ ጮኡ ጊዳኮ ሹቻቲካ ዋሳና» ጊደሰ።

41-43 ዩሱሲ ዩሩሳላሜ ማቲሼ ካታማዮ ቤኢዲ ኢዚሰ ዩኪደሰ። «ኔሰ ሳሮ ጊዲዛዝ ሃኛ ኔ ኤሪዳኮ ኣዜ ዲዛይ? ሃኢ ኔ ኣይፊፔ ቆቲቲዳ ጊሻሰ ኔ ሞርኬቲ ሄራ ሃራ ኔና ጊዶሊዲ ኡንኤላና ዎዴይ ያና።

44 ኔናኔ ኔ ጊቤ ጊደን ኔናራ ዲዛ ኔ ናይታ ኡባ ቢታ ኬሳና፤ ሹቻካ ሹቻ ቦላፊ ላሎንታ ኣጌቲና። ሄሲ ዉሪካ ጸሲ ኔና ኮዩሺን ኔኒ ኤርንታ ኣጊዳ ጊሻሳ» ጊደሰ።

45 ሄሳፊ ካሊዲ ዩሱሲ ጸሳ ኬሌ ጌሊዲ ጸሳ ኬላ ጊደን ዛልኢዛይታ ኬሲደሰ።

46 ቃሴካ፡ «ታ ኬላይ ዎሳ ኬላ ጊዳና ጌቲቲ ጸፊቲደሰ፤ እንቲ ጊዲኮ ፓንጋይ ዲዛ ጎንጎሎ ሂሰቲዳታ» ጊደሰ።

47 ዋንቲን ዋንቲን ጸሳ ከላን ኢዚ ታማርሲሺን ጸፊቲኔ ዳሬ ሃላቃቲ ኢዛ ዋቆናሰ ኮዪዳ።

48 ጊዶ ኣቲን ዳሬይ ወሪካ ኢዛራ ኦይኬቲዲ ኢዚ ታማርሲዛይሳ ካሊዛ ጊሻሰ ኦላናዚ ኢሰታሰ ከርቂ ጊዳሰ።

20

ዮሱሳ ዋልቃ ፓጫና ሺቂዳ ኦይሻ

(ማቶ 21:23-27፤ ማር 11:27-33)

1 ኢሲ ጋላሰ ዮሱሲ ኣሳ ጸሳ ከላን ታማርሲሺኒኔ ሚሺራች ቃላ ሳባኪሺን ቄሴ ሃላቃቲ፥ ጸፊቲኔ ዳሬ ጨማቲ ሺቂቲዲ ኢዛኮ ዪዳ።

2 «ሃይሳ ኔ ኦሊዛይ ኦና ሸኔኔ? ኔሰ ሸኔ ኢሚዳይ ኦኔ?» ጊዲ ኢዛ ኦይቺዳ።

3 ኢዚካ ኢሰታሰ፥ «ታኒካ ኢንቴና ኢሲ ኦይሾ ኦይቻይሰ፤ ኣኔ ታሰ ዛሪቲ።

4 ዮሃኒሳ ጸንቃታይ ሳሎፔዬ? ኣሳፔ?» ጊዳሰ።

5 ኢሰቲካ ባ ጊዶን ኢሶይ ኢሳራ፥ «ኦ፥ ዮሃኒሳ ጸንቃታይ ሳሎፔ» ጊኮ ኢዚ ኦና፥ «ሂሰቲን ኣዛሰ ኣማኒበኬቲ?» ጋና።

6 «ኣሳፔ» ጊኮ ኣሳይ ወሪ ዮሃኒሲ ናቤ ጊዲዳይሳ ኣማኒዛ ጊሻሰ ኦና ሹቻራ ጫዳና» ጊ ዞሬቲዳ።

7 ሄሳ ጊሻሰ፥ «ኢዚ ኣዋፔኮ ኦ ኤሮኮ» ጊዲ ዛሪዳ።

8 ዮሱሲካ ሂሰቲኮ፥ «ታኒካ ኣዛ ዋልቃን ኦሊዛኮ ኢንቴሰ ዮቲኬ» ጊዳሰ።

ዋይኔ ኣታኪልቲ ጎሻንቻታ ሌሚሶ

(ማቶ 21:33-46፤ ማር 12:1-12)

9 ቃሴካ ዮሱሲ ኣሳሰ ሌሚሶራ፥ «ኢሳዳይ ዋይኔ ሚሳ ቶኪዴሰ፤ ጋዴ ጎዪዛይታሰ ከራ ኢሚዲ ሃራ ዳሬ ቢዲ ሄን ጋምኢዴሰ።

10 ካጸዛ ቦኔ ዋዴ ካላፌ ኤኪ ያና ማላ ባ ኣሸካራታፔ ኢሳዴ ጋዴዛ ጎዪዳ ኣሳታኮ ዬዲን ጋዳ ጎዪዛይቲ ከቲቲ ቢዲይሳ ቆጶዲ ማላ ኩሼ ዬዲዳ።

11 ካሌሊዲካ ሃራ ኣሸካራ ዬዲን ጎሻንቻቲ ሃኢካ ኦይኪ ቆጶዲኔ ካወሺዲ ማላ ዬዲዳ።

12 ሃኢካ ካሌሊዲ ሄሻንሶ ኣሸካራ ዬዲን ጎሻንቻቲ ኢዛካ ቆጶሬሊ ማዲንሊዲ ካሬ ኬሲ ዬጊዳ።

13 «ወይን ሚላ ጎዳይ፥ ሃኢ አይ ኦሶ? ኦኔ ኤሪዛይ ታ ኬሃ ሲቁዛ ታ ናዛ ዩዲዳኮ ኢዛ ቦንቻንዴቶሻ?» ጊዴሰ።

14 «ጊዶ ኦቲን ቢታ ጎዱዛይቲ ናዛ ቤኢዳ ማላ ባ ጊዶን፥ ሃይሲ ኢዛ ላታና ናዛ ጊዴን? ሃ ዩቴ፤ ኢዛ ወዲዲ ቢታ ላቶሰ» ጊዲ ዘሪቲዳ።

15 ወይን ሚላ ቶኪዳሶፔ ካሬ ኬሲዲ ናዛ ወዲዳ። ሂሰቲኮ ሃኢ ወይን ሚላ ጎዳይ ሃ አሳታ ወሰታኔ?

16 ዩዲኔ ሄ ጎሻንቻታ ዳይሳና፤ ወይን ሚላ ቶኪዳሶሆዛ ሃራታሰ ኢማና» ጊዴሰ፤ ዴሬይካ ሄሳ ኢዚ ጊዳይሳ ሲዩዲ፥ «ሃይሳ ማላይ ሃኖፖ» ጊዴሰ።

17 ዩሱሲካ፥ «ኢሰታኮ ጸሊዲ፥ ሂሰቲን ሹቻን ኬፉ ኬጸዛ አሳቲ ለቂ አጊዳ ሹቻይ ኬላሰ ዋና ሁኔ ጊዳና ጌቲቲዲ ጸፊቲዳ ለሚሶዛሰ ቢርሼላይ ኦዜ?»

18 ሃ ሹቻ ቦላ ኩንዲዳይ ወሪ ሹቻን ቆጶታና፤ ሹቻይካ ኢዛ ቦላ ወዲዳይ ወሪካ ሊቃና» ጊዴሰ።

ጊራ ቃንጾ ጊሻሰ ሸቂዳ ኦይሻ

19 ጸፊቲኔ ቄሴታ ሃላቃቲ ሄሲ ለሚሶዚ ኢሰታ ቦላ ሃሳዩቲዳይሳ ኤሪዲ ሄሪካ ኢዛ ኦይካናሰ ኮዩዳ ሺን ዴሬዛሰ ባቢዳ።

20 ዩሱሳ ወልቃሪ ሃሪዛይታሰ አሊ ኢማናሰ ኢዛ ዶናፔ ኬዚዛ ባላ ቃላ ዴሚዲ ኦይካናሰ ካሊ ካሊ ናጊዳኔ ጸሎ አሳ ሚሳቲዲ ኢዛ ካሊ ኢዛ ዶናፔ ዮኦ ናጊዛ አሳታ ኢዛኮ ዩዲዳ።

21 ኢዛ ዶናፔ ዮኦ ኮይዛ አሳቲ ዩሱሳ፥ «ኢሰታማሬ! ኔኒ ቱማ ሃሳይዛይሳኔ ቱማ ታማርሲዛይሳ፤ ቃሴካ ጸሳ ኦጌ ኔ ቱሙ ታማርሲዛይሳኔ ኦናካ ሻካ ማዶንታይሳ ኦ ኤርሰ።

22 ጊዶ ኦቲን ቄሳሬሰ ጊራ ጊራናሰ ቤሲዜ? ቤሴኔ?» ጊዲ ኦይቹዳ።

23 ኢዚካ ኢሰታሰ ዲዛ ጌኔ ቆፋ ኤሪዲ፥

24 «ኦኔ ኢሲ ዲናሬ ታና ቤሲቲ፥ ሃይሲ ኢዛ ቦላ ዲዛ ሜጳዚኔ ጸፊቶይሲ ኦናይሴ?» ጊዴሰ። ኢሰቲካ፥ «ቄሳሬይሳ» ጊዳ።

25 ኢዚካ ዛሪዲ ኢሰታሰ፥ «ቄሳሬይሳ ቄሳሬሰ፥ ጸሳይሳ ጸሳሰ ኢሚቲ» ጊዴሰ።

26 ሄሳ ጊሻሰ ኢዚ ሃሳይዳ ቃላፔ ኤኪዲ አሳ ሲንፋን ኢዛ ቃጸናሰ ዳንዳይቤቲና፤ ኢዚ ኢሚዳ ቃላን ማላሌቲዲ ጮኡ ጊዳ።

ሃይቂዳይታ ዴንፋ ጊሻሰ

(ማቶ 22:23-33፤ ማር 12:18-27)

27 ሃይቂዳይታ ዴንሊ ባ ጊዛ ሳዱቃዊታፔ ኢሲ ኢሲ አሳቲ ዬሱሳኮ ዬዲ ኦይሻ ሺሺዳ።

28 «ጎዶ! ሲሳዴይ ማቸ ኤኪዲ ና ዬሎንታ ሃይቂኮ ሄ ሃይቂዳይሳ ማቸዮ ኢዛ ኢሻይ ኤኪዲ ባ ኢሻ ላታና ና ኢዛሰ ዬሎ» ጊዲ ሙሴይ ኑስ ጳፊዴስ።

29 ሂስቲን ላፑን ኢሻቲ ዴቴስ ሺን ኢስታፌ ባይራዚ ማቸዲ ና ዬሎንታ ሃይቂዴስ።

30 ኢዛ ካሎዚካ ኢዛሶ ሃይቂዴስ፤

31 ሄቫንሶዚካ ኢዛ ኤኪዴስ፤ ላፑናቲ ወሪካ ሄ ማጫሳዮ ኤኪዲ ወሪካ ና ዬሎንታ ሃይቂዴ።

32 ወርሴላን ማጫሳያ ሃይቃዴስ።

33 ላፑናቲካ ሃ ማጫሳዮ ኤኪዳሺን ሃ ማጫሳያ ወርሴላን ሃይቂዳይቲ ዴንዲዛ ዋዴ ኢዛ አዋይሳ ማቸ ጊዳኔ?»

34 ዬሱሲ ኢስታስ፡ «ሃ አላሜ ናይቲ ጌሌቴሴኔ ኤኬቴስ።

35 ቡሮ ያና አላሜን ሃይቂዳይታ ዴንላ ዴማናስ ቤሲዛይቲ ጊዲኮ ጌሌቴናኔ ኤኬቴና።

36 ኢስቲ ኪታንቻታ ማላ ጊዳና ጊሻስ ሄሳፌ ጉዬ ሃይቂቴናኔ ሃይቆፔ ዴንላ ናይታ ጊዲዳ ጊሻስ ኢስቲ ጸሳ ናይታ።

37 ሙሴይ ቄሪ ዋራ ጊሻስ ጳፊቲዳ ታሪኬዛን ጎዳ፡ ላብራሃሜ ጸሳ፡ ዩሳቃ ጸሳ ያቆቤ ጸሳ) ጉሳን ሃይቂዳይቲ ዴንዳናይሳ ቤሴስ።

38 ወሪካ ኢዛሰ ዴኦይ ዲዛ ጊሻስ ኢዚ ፓጻታ ጸሳፌ ኣቲን ሃይቂላታ ጸስ ጊዴና» ጊዴስ።

39 ኢሲ ኢሲ ጳፊቲ፡ «ኣስታማሬ! ሎኦ ጋዳሳ» ጊዳ።

40 ሄሳፌ ጉዬ ኣይ ኣሲካ ኢዛ ኦይቻናስ ጸሊቤና።

ጸሳይ ቲይዳይሳ ጊሻስ ሺቂዳ ኦይሻ

(ማቶ 22:41-46፤ ማር 12:35-37)

41 ሄሳፌ ጉዬ ዬሱሲ፡ «ኣሳይ ማሲሄ ዋኒዲ ኢዚ ዳዊቲ ና ጊዜ?

42-43 ጋሶይካ ዳዊቲ ባ ጳፊዳ ዬላ ማጻፋታን፡ ታ ኔ ሞርኬታ ኔ ቶሆ ጋርስ ኣላና ጋካናስ ጎዳይ ታ ጎዳ፡ ኔ ታ ኡሻቻን ኡታን ዋኒዲ ጊዴ?

44 ሂስቲኮ ዳዊቲ ኢዛ፡ ሳዳ) ጊ ጸይጊሼ ዋኒ ኢዛሰ ና ጊዳኔ?» ጊዴስ።

45 ዴሬይ ወሪ ሲዩሺን ባና ካሊዛይታስ፡

46 «ጎሽቲዛ አዲሳ ቃሚሳ ማይኢዲ ዩሽ ዶሲዛይታፔ ጊያይ ዲዛሶን ሳሮኬቱል ኮይዛይታፔኔ አይሁዳ ዋሳ ኬላን ቶቃ ኦይዴኔ ዲጊሳሶን ቦንቸሶ ኮይዛ ጻፊታፔ ናጌቲቴ።

47 ሃይታንቲ አምኤታ ኬል ካሎሲዛይታ፤ አሲ ኢሰታ ቤያና ማላ ዋሳ አዲሴቱስ፤ ሄይታንታ ኢታ ፒርዲይ ናጌስ» ጊዴስ።

21

አምኤይ አሞታ

(ማር 12:41-44)

1 ዩሱሲ ቶቁ ጊ ጸሊሺን ዲሬ አሳቲ ጸሳ ኬልን ሙጽዋታ ኢዛን ሺሺዛይሳ ጊዶን ሙጽዋታ ዩጊሺን ቤዪዴስ።

2 ቃሴካ ኢሲ አምኤ ዲዛራ ናምኤ ሲኪና ጊዲዛ ናምኤ ጸርቂማላ ሄ ሙጽዋታ ኢዛን ሺሺዛይሳን ዩጊሺን ጸሊዲ፤

3 «ታ አንቴስ ቱሙ ጋይስ፤ ሃና አምኤያ ኡባ አሳቴ ቦላራ አዲል አማዲስ።

4 ሃይቲ አሳቲ አሚዲይ ባስ ዲዛ ቲርፓፊ ጊዲሺን ኢዛ ጊዲኮ ባስ ባይንዳ ዋልቃፊ ባስ ዲዛርኔ ባ ዲሳስ ኮሺዛር ወርሳ ዩጋዲስ» ጊዴስ።

ጸሳ ኬል ላሌታናይሳ ዩሱሲ ካሴቲ ዮቲዳ ቃላ

(ማቶ 24:1-2፤ ማር 13:1-2)

5-6 ኢዛ ካሊዛይታፔ ኢሲ ኢሲ አሳቲ ጸሳ ኬላይ ሎኦ ሹቻኒኔ አሳይ አሚዳ አሞታን አይ ማላ ሎኤ ኬጾቲዳኮ ጊዲ ባ ጊዶን ሃሳዬቲሺን ዩሱሲ ሲዪዲ፤ «ሃይሲ አንቴ ቤኢዛይሲ ወሪ ላሌቶንታ ሹቺ ሹቻ ቦላ ኬሌቲዳ ማላ አቶንታ ዋዴይ ያና» ጊዴስ።

7 ኢሰቲካ ኢዛ፤ «አሰታማሬ! ሃይሲ ወሪ አይዴ ሃናኔ? ቃሴ ሃይሲ ሃናናይሳስ ማላታይ አዜ?» ጊዲ ኦይቺዳ።

8 ኢዚካ ኢሰታስ፤ «አንቴ ባሌቶንታ ማላ ናጌቲቴ፤ ዳርቲ ባና፤ ታ ኪርስቶሳኮ! ዋዴይካ ማቲዴስ፤ ጊሼ ታ ሱንፋራ ያና ሺን አንቴ ኢሰታ ካሎፍቴ።

9 ኦላ ጊሻሲኔ ዴሬ ማካላቴላ ጊሻስ ሲዪዛ ዋዴ ዳጋሞፍቴ። ሄሲ ወሪ ካሴቲዲ ሃናናስ ቤሴስ፤ ወርሴል ጋኪዴስ፤ ጊዶ አቲን ሄራካ ሃኔና» ጊዴስ።

10 ቃሴ፤ «ዴሬይ ዴሬ ቦላ፤ ካዋይ ካዋ ቦላ ዴንዳና።

11 ቢታይ ዋልቃማ ቃል ቃጸና፤ ኮሻይኔ ቦሻይ ዲማ ዲማሶን ሃናና፤ ዳር ባቢሲዛዚኔ ሳሎፔ ጌታ ማላታይ ቤታና።

12 «ሄሲ ወሪ ሃናና፤ ካሴቲዲ አሳይ አንቴና ኦይካናኔ ጎዳና፤ አይሁዳ ዋሳ ኬሊኔ ቃሾ ኬላ ጌልላና፤ ካዋታ ሲንሊኔ ዳናታ ሲንላ ሺሻና። ሄሲ ወሪ ታ ሱንላ ገሻሰ አንቴ ቦላ ጋካና።

13 ሄሲ ወሪካ ማርካታናሰ ሎኦ ቃዳ ገዳና።

14 ሄሳ ገሻሰ ኑና ኦይቺዛይታሰ ኑ አይ ዛሪኖ? ገዲ ካሴቲዲ ሂርጎንታ ማላ ሃይሳ ዋዚናን ዋላ።

15 አንቴ ዋርኬታ፤ ኦኒካ አንቴናራ ኤቄታናሲኔ ባሌላናሰ ዳንዳዮንታ ቃላኔ ጨንጫቴላ ታ አንቴሰ አማና።

16 አንቴና ዩሊዳይቲኔ አንቴ አሻቲ፤ አንቴ ዳቦቲኔ አንቴ ላጌቲ ወሪ አንቴና አሊ አማና፤ አንቴፌ ባጋታ ዋዳና።

17 ታ ሱንላ ገሻሰ ኡባ አሳ አቻን አንቴ አጾታና።

18 ገደ አቲን አንቴ ሁኤ ቢናናታ፤ አሲናካ ዳዩኩ።

19 አንቴ ሚኒ ኤቂኮ አንቴ ሼምፖ አሻና።

ዩሱሲ ዩሩሳላሜ ዳዮ ገሻሰ ካሴቲዲ ዮቲዳ ቃላ

(ማቶ 24:15-21፤ ማር 13:14-19)

20 «ኦላ አሳይ ዩሩሳላሜ ገደሊሺን ቤዪኮ ኢዚሰ ዳይዛ ዋዳይ ማቲዳይሳ ኤሪቴ።

21 ሄ ዋዳ ዩሁዳን ዲዛይቲ ፑዴ ዙማ ቦላ ጋንጌቶ፤ ካታማን ዲዛይቲካ ካታማ፤ ኬዚቴ፤ ዴሬ ገደን ዲዛይቲካ ሄ ካታማዮ ጌሎ፤፤።

22 ጳፌቲዳይሲ ወሪ ፖሌታናሰ ሃና ሃሎ ኬሲዛ ዋዴ።

23 ቢታ ቦላ ገታ ሜቶይ ሃናና፤ ሃይሳ ዴሬዛ ቦላ ሃንቆይ ያና፤ ሄሳ ገሻሰ ሄ ዋዴ ቃንላራ ዲዛ ማጫሳታሲኔ ዳንሊዛ አዬታሰ አዬ አና!

24 ባጋ አሳይ ማሻን ሃይቃና፤ ባ ዴሬ፤ ሃራ ዴሬ ዲኤታና፤ ዩሩሳላሜይካ ጸሰ ኤሮንታ ዴሬታ ዋዴይ ፖሌታና ጋካናሰ፤ ጸሰ ኤሮንታ አሳታን ዩዴቲዳሮ ገዳና።

አሳ ናሰ ናምእንሉ ዩሰ

(ማቶ 24:29-31፤ ማር 13:24-27)

25 «አርሼ ቦላ፤ አገና ቦላኔ ጸለንቴ ቦላ ማላታይ ቤታና፤ አባፌኔ አባ ዳምባላ ገሪሳፌ ዴንዲዳይሳን ቢታ ቦላ ዲዛ ዴሬይ ሂርጋናኔ ሜቶታና።

26 ሳሎ ዋልቃማቲ ቃጺዛ ገሻሰ አሳይ ቢታ ቦላ አዜ ሃናኔሻ ጉሳኒኔ ናጎን ጸላ ዳቡራና።

27 ሄ ዋዴ ኣሳ ናይ ዋልቃራ፡ ጊታ ቦንቸራኔ ሻራራ ዩሺን ቤያና።

28 ኢንቴካ ሃይቲ ሃ ታ ጊዳይቲ ፖሌቴል ኦይኪሺን ኢንቴስ ኣቴላ ዋዴይ ማቲዳ ጊሻስ ሲቲ ጊ ኤቂቴ፤ ኢንቴ ኣይፌ ፑዳ ጶቁ ሂሰቲቴ» ጊዴስ።

ጎዳ ዩሳ ማላቲዛ ባላሴ ሚላይ ሌሚሶ

29-30 ካሌሊዲ፡ «ባላሴ ሚሊኔ ሃራ ሚላታ ኡባ ያሊቴ፤ ሄ ሚላቲ ሃይል ኬሲሺን ኢንቴ ቤኢዛ ዋዴ ቦኔይ ማቲዳይሳ ኢንቴ ኤሪታ።

31 ሄሳሶካ ሃይታንቲ ጌቴቲዳይቲ ፖሌቲሺን ኢንቴ ቤኢዛ ዋዴ ጸሓ ካዋቴሊ ኢንቴኮ ማቲዳይሳ ኤሪቴ።

32 «ታ ኢንቴስ ቱሙ ጋይስ፤ ሃይሲ ዉሪ ፖሌታና ጋካናስ ሃ ዩሌታይ ኣዴና።

33 ሳሎይኔ ሳኣይ ኣጻና ሺን ታ ቃላይ ኣዴና።

34 «ሂስቲኮ ዋጋይ ባይንዳ ዱሳን፡ ዳር ኡሻኒኔ ዱሳስ ሂርጋን ኢንቴ ዋዚናይ ዳቡሮፖ፤ ሄሳ ኦሶንታ ኢጲኮ ሄ ጋላሳይ ኢንቴ ቆፖንታ ናርጳ ማላ ኢንቴ ቦላ ጋኮንታ ማላ ናጌቴቴ።

35 ሃይሲ ቢታ ቦላን ዱዛ ኣሳ ኡባ ቦላ ጋካና።

36 ሄሳ ጊሻስ ቡሮ ያናይሳፌ ኢንቴ ኬሲ ኤካና ማላኔ ኣሳ ና ሲንላን ኤቃናስ ዳንዳያና ማላ ኡባ ጋላስ ሚኒዲ ዋሲቴ» ጊዴስ።

37 ዩሱሲ ጋላስ ጋላስ ጸሓ ኬላን ታማርሲ ታማርሲዲ ኦማርስ ኦማርስ ዳብራዛይቲ ጌቴቲዛ ዙማ ቦላ ኬዚ ኬዚ ኣቕስ።

38 ኣሳይ ዉሪካ ኢዛፔ ሲያናስ ማላዶ ዋንታራ ዩሱሳኮ ጸሓ ኬሊ ዩስ።

22

ዩሱሳ ቦላ ማቂቴስ

(ማቶ 26:1-5፤ 14:16፤ ማር 14:1-2፤ ዮሃ 11:45-53)

1 ሄ ዋዴ ፓዚጋ ጌቴቲዛ ኡኬላራ ቦንቹቲዛ ባኣሌይ ማቲ ኡቲዴስ።

2 ቄሴታ ሃላቃቲኔ ጳፌቲ ሃንኮ ዳሬ ኣሳስ ባቢዛ ጊሻስ ዩሱሳ ዳይሳና ኦጌ ኮዪዳ።

ዬሱሳ አሊ ኢማናሰ ዩሁዳ ዙሬቴል

(ማቶ 26:14-16፤ ማር 14:10-11)

³ ዬሱሳ ካሊዛ ታማኔ ናሞኣታፔ አሰቆርንቶ ዳሬ አሰ ዩሁዳ ጌቴቲዛይሳን ጸላኤይ ጌሊዴሰ።

⁴ ዩሁዳይካ ቄሴታ ሃላቃታኮኔ ጸሳ ኬላ አላፌታኮ ቢዲ ኢሰታሰ ዬሱሳ ዋሰቲ አሊ ኢማናኮ ኢሰታራ ዙሬቴዴሰ።

⁵ ኢሰቲካ ሄሳን ኡፋዬቲዲ ሚሼ ኢማናሰ ኢዛራ ገረዳ።

⁶⁻⁷ ዩሁዳይካ ኢሰታ ቆፋ ዶሲዴሰ፤ ዬሱሳ ኢሰታሰ አሲ ቤኦንታ አሊ ኢማናሰ ኢንጄ ዋዴ ናጊሺን ፓዚጋ ዶርሳ ሹኪዲ ኡኬላራ ቦንቺዛ ባኣሌ ጋላሲ ጋኪዴሰ።

ዬሱሲ ባና ካሊዛይታራ ፓዚጋ ካዋ ሙሰ

(ማቶ 26:17-25፤ ማር 14:12-21፤ ዮሃ 13:21-30)

⁸ ዬሱሲካ ባና ካሊዛይታ፡ «ፓዚጋ ካዋ ማናሰ ቢዲ ኑሰ ገግሲቴ» ጌዲ ጴጽሮሳኔ ዮሃኒሳ ከቲዴሰ።

⁹ ኢሰቲካ፡ «ኑ ኣዋን ገረሳና ማላ ኮያይ?» ጌዳ።

¹⁰ ኢዚካ ዛሪዲ፡ «ኢንቴ ጌዴ ዩሩሳላሚ ካታማ ጌሊሺን ሃላ ኦቶ ቶኪዳ አሲ ኢንቴና ዴማና፤ ኢንቴካ ኢዚ ቢዲ ጌሊዛ ኬፍ ጋካናሰ ኢዛ ካለቴ።

¹¹ ኬላዴሰ፡ «ኣሰታማሬይ ታና ካሊዛይታራ ፓዚጋ ካዋ ማናሰ አማላ ኬሊ ኣዋን ዲዜ?» ጌሰ ጌቴ።

¹² ኢዚካ አማላሰ ገጌቲዳ ኣሆሶ ኢንቴና ቤሳና፤ ኢዚ ቤሲዛሶን ገግሲቴ» ጌዴሰ።

¹³ ኢሰቲካ ቢዲ ዬሱሲ ጌዳ ማላ ኬላ ዴሚዲ ፓዚጋ ሄን ገግሲዳ።

ኅዳ ካዋ ኤኮ ዋጋ

(ማቶ 26:26-30፤ ማር 14:22-26፤ 1ቆር 11:23-25)

¹⁴⁻¹⁵ ዋዴይ ጋኪዳ ማላ ዬሱሲ ሃዋሬታራ ቁማ ማዳን ኡቲዲ፡ «ታኒ ዋዬ ቤያናፔ ካሴታዳ ሃይሳ ፓዚጋ ኢንቴናራ ኢሲፌ ማናሰ ኬሃ ኣሞታዲሰ።

¹⁶ ታ ኢንቴሰ ቱሙ ጋይሰ፤ ጸሳ ካዋቴላን ሃይሳ ቢርሼሊ ፖሌታና ጋካናሰ ሃይሳ ፓዚጋ ናሞኣንሶ ታ ኢንቴናራ ሚኬ» ጌዴሰ።

¹⁷ ዋይኔፔ ኦሴቲዳ ኡሻ ጴኣራ ኤኪዲ ጸሳ ጋላቲ ሲሚዲ፡ «ሄኢቴ፤ ዉሪካ ኢዛፔ ኡዬቴ» ጌዲ ኢሰታሰ አሚዴሰ።

¹⁸ «ታ ኢንቴሰ ቱሙ ጋይሰ፤ ሃይሳፌ ጉዬ ጸሳ ካዋቴሊ ያና ጋካናሰ ናሞኣንሶ ሃ ዋይኔ ኡሻፌ ኡዬኬ» ጌዴሰ።

19 ኡኩላ ኡኪዲ ጸሳ ጋላቲዳስ፤ ኢዛፔ ኢስታስ ሚንሊ ኢሚዲ፡ «ሃይሲ ኢንቲ ጊሻስ ኢሜታና ታ ኣሾ ሌሚሶ ጊዲዛ ጊሻስ ሃይሳ ኡባ ዋዴ ታና ቆፓናስ ኦሊቲ» ጊዳስ።

20 ኢዛሶካ ካዎፔ ጉዬ ኡሻ ጸኣ ዴንሊዲ፡ «ሃይሲ ኡሻይ ኢንቲ ጊሻስ ታ ሱላን ሃናና ኦራላ ጫቆ ዋጋ።

21 «ጊዶ ኣቲን ታና ኣሊ ኢማናዴ ኩሼይ ታ ኩሼራ ኢሲፌ ማዳን ዳስ።

22 ኣሳ ናይ ካሴቲዲ ኢዛ ጊሻስ ሃናናይሲ ዉሪ ኡቲዳ ማላ ኢዚ ባና፤ ጊዶ ኣቲን ኢዛ ኣሊ ኢሚዛዳስ ኣዬ ኣና!» ጊዳስ።

23 ኢስቲካ ሄሳ ኦላናይ ኦኔ? ጊዲ ባ ጊዶን ኢሶይ ኢሳ ኦይሼፊሊዲ።

24 ቃሴካ፡ «ኦኒ ኦናፔ ኣጂዛኮ» ጊዲ ባ ጊዶን ኢሶይ ኢሳራ ፓላሚቲዳ።

25 ዬሱሲካ ኢስታ፡ «ዴሬ ሃሪዛ ካዎቲ ባ ዴሬ ኣሳ ዋልቃራ ሃሪቴሲኔ ኢስቲካ ሎኦ ካዎታ ጌቲቲዲ ጴይጌቲቴስ።

26 ኢንቲ ጊዲኮ ሄሳሶ ሃኖፒቲ፤ ኢንቲፊ ጌታ ጊዲዳዴይ ዋይኮ ታ ኦፔካ ኣቆይስ ጊዛ ኣሲ ኡባፊ ቄሪ ና ማላ ጊዶ፤ ሃሪዛዴይ ሃሪቲዛዴ ማላ ጊዶ።

27 ቁማ ኤቂዲ ሚዚዳዴፊኔ ኡቲዲ ሚዛዴፊ ኦኒ ኣጂዜ? ኡቲዲ ሚዛዴ ጊዴኔ? ታኒ ቃሴ ኢንቲ ጊዶን ኣሸካራ ማላ ዳይስ።

28 «ኢንቲ ጊዲኮ ታፔ ሻኬቶንታ ታ ዋዪሺን ታ ማታን ኤቂዳይታ።

29 ታ ኣዋይ ታና ካዎሊዳይሳ ማላ ታኒካ ታ ካዎቲላን ኢንቲና ካዎላና።

30 ሄሲካ ታ ካዎቲላን ታ ማዳፊ ኢንቲ ማና ማላኔ ኡያና ማላ፤ ቃሴካ ታ ካዎቲላ ኣልጋን ኡቲዲ ታማኔ ናሞኡ ኢሰራኤሌ ናይታ ቦላ ፒርዳናሳ» ጊዳስ።

ጴጥሮስ ኢዛ ካዳናይሳ ዬሱሲ ካሴቲዲ ዮቲዳስ
(ማቶ 26:31-35፤ ማር 14:27-31፤ ዮሃ 13:36-38)

31 ቃሴካ ዬሱሲ ሲሞና ጴይጊዲ፡ «ሲሞና! ጳላኤይ ኢንቲና ጊሰቲ ማላ ሱራጋናስ ዋሲዳስ።

32 ጌዶ አቲን ታኒ ኔፔ አማኖይ ጳዮንታ ማላ ኔ ጊሻስ ጸሓዊ ወሳኒ፤ ኔካ ሲሚዳ ዋዴ ኔ አሻታ ሚንጮላ» ጌዴስ።

33 ሲሞኒካ ዛሪዳ፡ «ጎዶ! ታ ኔናራ ቃሼታናሲኔ ሃይቃናስ ጌጋ ኡታዲስ» ጌዴስ።

34 ዬሱሲካ ዛሪዳ፡ «ጴጽሮሳ! ሃኙ ኩቶይ ኢሲቶ ዋሳናስ፡ ታ ኢዛ ኤሪኬ» ጋዳ ሄዡቶ ኔ ታና ካዳና» ጌዴስ።

35 ቃሴካ ዬሱሲ ኢስታ፡ «ታ ኢንቴና ካሴ ጫማይ፡ ኮሮጃይኔ ቃራጸቴይ ባይንዳ ከቲዳ ዋዴ ኢንቴስ ኣዚ ፓጪዴ?» ጌዴስ። «ኣይኮይካ ፓጪቤና» ጌዴስ።

36 ኢዚካ ዛሪዳ፡ «ሃኢ ጌዲኮ ኮሮጃይካ፡ ቃራጸቴይካ ዲዛዴይ ኣይኮ፤ ጌላ ማሻይ ባይንዳዴይ ባ ማይኦ ባይዚዲ ሻሞ።

37 ታ ኢንቴስ ቱማ ጋይስ፤ «ማካላታራ ኢዚ ኢሲፌ ታይቤቲዴስ» ጌቴቲ ካሴ ጸፊቲዳ ቃላይ ታ ቦላ ፖሌታና ቤሴስ፤ ታ ጊሻስ ጸፊቲዳይሳስ ፖሎይ ቱማፔ ጋኪዴስ» ጌዴስ።

38 ኢዛ ካሊዛይቲ ቃሴ፡ «ጎዶ! ሄኮ ናሞኡ ጌላ ማሻቲ ሃይሳን ዴቴስ» ጌዴስ። ኢዚካ ኢዛ ጊሻስ፡ «ሃይሲ ጌዳና» ጌዴስ።

39 ካሴ ኢዛስ ሎሴ ጌዲዳ ማላ ፑዴ ዳብራዛይቲ ጌቴቲዛ ዙማ ቦላ ኬዚ ቢዴስ። ኢዛ ካሊዛይቲካ ኢዛ ካሊ ቢዴ።

40 ሄ ጋኪዳ ማላ፡ «ኢንቴ ፓጪኤን ጌሎንታ ማላ ዋሲቲ» ጌዴስ።

41 ዬሱሲ ባና ካሊዛይታፔ ኣሲ ሹኙ ኦሊዲ ጋላናሶ ማላ ሃኪ ቢዲ ጉልባቲ ዋሲዴስ።

42 «ታ ኣዋዉ! ኔ ሼኔ ጌዲኮ ሃኖ ማቶዮ ታፔ ዲጋ፤ ጌዶ አቲን ኔ ሼኔይ ሃኖፔ አቲን ታ ሼኔይ ሃኖፖ» ጌዲ ዋሲዴስ።

43 ሳሎፔ ኪታንቻይ ቆንጪዲ ዬሱሳ ሚንጮሊዴስ።

44 ኢዚካ ኬሄ ጸጌቲዲ ዋሲሺን ኢዛ ኣሳቴላፌ ጫዋይ ሱላ ማላ ጉኪዴስ።

45 ዋሳፔ ዴንዲዲ ባና ካሊዛይታኮ ቢዴስ። ኢስቲካ ኢዛስ ሚሼቲዲ ቆፒሺን ጳስኮይ ኤፊዳሼ ዬሱሲ ኢስታኮ ዩዲ።

46 «ኣይስ ጳስኬቲ? ኢንቴ ፓጪኤን ጌሎንታ ማላ ሃኢ ዴንዲዲ ዋሲቲ» ጌዴስ።

ዬሱሲ ኣጂ ኢሜቴሊኔ ኦይኬቴሳ

(ማቶ 26:47-56፤ ማር 14:43-50፤ ዮሃ 18:3-11)

47 ኢዚ ቡሮ ሃሳያን ዲሺን ዩሱሳ ካሊዛይታፔ ኢሶይ ዩሁዳ ጌቲቲዛይሲ ባናራ ዳሮ አሳ ካሌሊ ኤኪ ዩዲ ዩሱሳ ዩራናስ ኢዛኮ ሸቂዴስ።

48 ጌዶ አቲን ዩሱሲ ኢዛ፥ «ዩሁዳ! ታና አሳ ና ዩሮን አሳ ኢማይ?» ጌዴስ።

49 ዩሱሳ ዩዩ አጂ ዲዛ አሳይ ሃኖዛ ሎኤሊ ዬሊዲ፥ «ጎዶ! ሃይታንታ ማሻራ ቡሊኖ?» ጌዴ።

50 ኢስታፌ ኢሶይ ቄሴታ አላፌ አሸካራዛ ኡሻቻ ሃይላ ማሻራ ቃንጺዴስ።

51 ዩሱሲ ኢስታ፥ «ኢንቴ ሃኢ ታስ አጌቲ!» ጌዲ አሸካራዛ ሃይላ ቦቺዲ ፓሊዴስ።

52 ቃሴካ ኢዛ ኦይካና ዩዳ ቄሴታ ሃላቃታ ጸሳ ኬላ አላፌታኔ ጨማታ፥ «ፓንጋ ኦይኪዛ አሳ ማላ ጌላ ማሻኔ ዱርቃ ኤኪዲ ዩዴቲ?»

53 ጋላስ ጋላስ ታ ኢንቴናራ ጸሳ ኬላን ዲሺን ታ ቦላ ኩሼ ዋሊቤኬታ፤ ሃይሲ ጳማይ ካዋቲዳ ኢንቴ ዋዴ» ጌዴስ።

54 ሄሳፌ ጉዬ ዩሱሳ ኦይኪ ኤኪዲ ቄሴታ ሃላቃሶ ጌሊዳ፤ ጴጽሮሲካ ዩሱሳ ሃሆራ ካሊዴስ።

55 አሳይ ቄሴታ ሃላቃ ጊቤ ጌዶን ታማ ኤሊዲ ሆኢሼ ኢሲ ቦላ ኡቲዳሼ ጴጽሮሲካ ኢስታራ ኢሲፌ ኡቲዴስ።

56 ኢሲ ጋራዴያ ጴጽሮሲ ታማ ሆኢዛይታራ ኡቲዳይሳ ቤያዳኔ ቲሺ ሂስታ ጸላዳ፥ «ሃይሲ አዴዚካ ዩሱሳራ ዴስ!» ጋዴስ።

57 ጴጽሮሲካ፥ «ሃኔ ማጫሳዬ! ታ ኢዛ ኤሪኬ» ጌዲ ካዲዴስ።

58 ጉላ ጋምኢሺን ሃራ ኢሳዴይ ኢዛ ቤኢዲ፥ «ኔካ ኢዛራ ዲዛይታፔ ኢሳ ጌዲኪ?» ጌዴስ። ጴጽሮሲካ፥ «ሃይሶ ታኒ ኢስታራ ዲኬ!» ጌዴስ።

59 ኢሲ ሳቲ ማላ ጋምኢሺን ሃራ አሲ ቃሴካ፥ «ጋሊላ አስ ጌዲዛ ገሻስ ሲጼይ ባይንዳ ሃይሲ ኢዛራ ዴስ» ጌዴስ።

60 ጴጽሮሲካ ቃሴ፥ «ሃይሶ ኔ ጌዛዴ ታ ኤሪኬ!» ጌዴስ። ሂኖ ጌ ኬሶንታ ዲሺን ኩቶይ ዋሲዴስ።

61 ጎዳይካ ጴጽሮሳኮ ዩሼ ጸሊን ጴጽሮሲ፥ «ሃቶ ኩቶይ ዋሳናስ ኔ ታና ሄሹቶ ካዳና» ጌዲ ጎዳይ ካሴ ዮቶ ቃላይ ኢዛ ዋዚናን ካርፒ ጌዴስ።

62 ጴጽሮሲካ ካሬ ኬዚዲ ሂቂሚ ዩኪዴስ።

63 ዩሱሳ ቃቺዲ ናጊዛ አሳቲካ ኢዛ ቦላ ቂጂ ቂጂ ካኢሼ ሾጩሬሊዳ።

64 ኢዛ ኣይፌ ጎዚዲ፥ «ኔ ናቤ ገዲኮ ኔና ሾጪዲይ ኦናኮ ኣኔ ኤራ!» ገዲ ኦይቺዳ።

65 ሃራ ዳር ጫሻ ቃላራ ካዉሺዳ።

ዩሱሳ ኣይሁዳታ ፒርዳ ዱላታ ሲንሐ ኤፊዳ

(ማቶ 26:59-66፤ ማር 14:55-64፤ ዮሃ 18:19-24)

66 ጋዴይ ዋንቲን ዳሬ ጪማቲ፥ ቄሴታ ሃላቃቲኔ ሙሴ ዋጋ ታማርሲዛይቲ ዱላታ ሺቂዲ ዩሱሳ ዱላታኮ ሺሺዳ።

67 ኢስቲካ ዩሱሳ፥ «ኔ ከርስቶሳ? ኣኔ ኦስ ዮታ» ገዳ። ዩሱሱካ፥ «ታ ኢንቴስ ዮቲዳኮካ ታና ኣማኔኬታ።

68 ታ ኢንቴና ኦይቺዳኮ ታስ ዛሬኬታ።

69 ገዶ ኣቲን ሃኢፔ ዶሚዲ ኣሳ ናይ ዋልቃማ ጸሳ ኡሻቻን ኡታና» ገዴስ።

70 ሄ ዋዴ ወሪካ፥ «ሂስቲን ኔ ጸሳ ና?»* ገዲ ኦይቺዳ። ኢዚካ፥ «ታ ጸሳ ና ገዲዳይሳ ኢንቴካ ጌታ» ገዴስ።

71 ኢስቲካ፥ «ሄኮ ኢዚ ባ ዶናራ ማርካቲሺን ኦ ሃይላራ ሲዩዶስ፤ ሃይሳፌ ሃራ ማርካ ኣዛስ ኮሺዜ?» ገዳ።

23

ጲላጶሳ ሲንሐ ዩሱሳ ሺቆ

(ማቶ 27:1-2፤11-14፤ ማር 15:1-5፤ ዮሃ 18:28-38)

1 ሄን ሺቂዳ ኣሳይ ዉሪ ዴንዲዲ ዩሱሳ ጲላጶሳኮ ኤኪ ቢዴስ።

2 «ሃይሲ ኣዴዚ ኦ ኣሳይ ቄሳሬስ ገራ ገርንታ ማላ ባሌሊሼኔ ባና፥ ታኒ ከርስቶሲ ካዋ፥ ገዲ ባሌሊሺን ዴሚዶስ» ገዲ ሞቲዳ።

3 ጲላጶሲካ ዩሱሳ፥ «ኒኒ ኣይሁዳታ ካዋ?» ገዲ ኦይቺዴስ። ዩሱሱካ ዛሬዲ፥ «ኔ ገዳ ማላ» ገዴስ።

4 ጲላጶሲካ ቄሴታ ሃላቃታሲኔ ሺቂዳ ኣሳስ፥ «ሃይሳ ኣዴዛ ቦላ ኢዛ ሞቲሲዛ ኢታ ዮኦ ዴማቤኬ» ገዴስ።

5 ኢስቲ ዛሬዲ፥ «ሃይሲ ኣዴዚ ጋሊላፔ ሃይሳ ጋካናስ ኩሜላ ዩሁዳ ዋዩሶ ቦላ ዴስ» ገዲ ሚንሊ ዮቲዳ።

ሃርዶሳ ሲንሐ ዩሱሳ ሺቆ

6 ጲላጶሲ ኣሳይ ገዛይሳ ሲዩዲ፥ «ዩሱሲ ጋሊላ ኣሳኮኔ» ገዲ ሎኤሊ ኤራናስ ኦይቺዴስ።

* 22:70 ጸሳ ና? ገዛ ኦይሻይ ኢሲ ኢሲ ባጋ ጋሞላ ቃላን ጸሳ ናይ? ጌቲቲ ኦይሹቲስ።

7 ዩሱሲ ሄሮዶስ ካዎቱላ ጊደን ዲዛይሳ ሻኪ ኤሪዲ ሄ ዎዴ ሄሮዶሲ ዩራሳላሚን ዲዛ ገሻሰ ኢዛኮ ዩሱሳ ዩዲዴሰ።

8 ሄሮዶሲ ካሴ ዩሱሳ ቤያናሰ ዳሮ ኮዪሼ ዲዛ ገሻሰ ዩሱሳ ቤኢዲ ኬሂ ኡፋዪዴሰ፤ ኢዛ ገሻሰ ካሴ ሲዪዲ ኢዚ ኦሊሺን ቤያናሰ ኮዪዲ ኡፋዬቲዴሰ።

9 ዳሮ ኦይሻታካ ኢዛ ኦይሼሬሊዴሰ፤ ጊዶ ኣቲን ዩሱሲ ኢዛ ኦይሻ ዛሪቤና።

10 ቄሴ ሃላቃቲኔ ጸፊቲ ሄን ኢዛ ማታን ኤቂዲ ኬሂ ዎርዶ ሞቶ ሞቲዳ።

11 ሄሮዶሲ ካ ዎታዳራታራ ኢሲፌ ኢዛ ካፏዳ፤ ካዎ ማይኦ ማይዚዲ ጲላጶሳኮ ዛሪ ዩዲዴሰ።

12 ሄሮዶሲ ኢላጶሲ ካሴ ካ ጊደን ኢሶይ ኢሳራ ኦሻ ሺን ሄ ጋላሰ ገጊዳ።

ዩሱሳ ቦላ ፒርዴቲዳ ሃይቆ ፒርዳ

(ማቶ 27:15-26፤ ማር 15:6-15፤ ዮሃ 18:39-40፤ 19:1-

16)

13 ጲላጶሲ ቄሴታ ሃላቃታራ፥ ዴሬ ዳናታራኔ ዴሬ ኣሳ ሺሺዲ፥

14 «ሃይሲ ኣዴዚ ኣሳይ ዉሪ ማካላና ማላ ዴንፎሌሰ ገዲ ኢንቲ ታኮ ኤሂን ታ ቆራዳ ኢዛ ኦይሊዛ ኢሲ ኢታ ሚሺካ ዴማቤኬ።

15 ቃሴካ ሄሮዶሲ ኢሲ ኢታ ሚሺካ ኢዛ ቦላ ዴሞንታ ኣገዳ ገሻሰ ሃ ኦኮ ዛሪ ዩዲዴሰ። ሃኢ ኢንቲ ቤኢዛ ማላ ኢዛ ሃይቆሰ ጋሊዛ ኢሲ ኢታ ሚሺካ ኦሊቤና።

16 ሄሳ ገሻሰ ቃጶያዳ ታ ኢዛ ዩዳና» ገዴሰ።

17 ኢዚ ሄሳ ገዳይ ኢሰታ ባኣሌ ጋላሰ ቃሼቲዳ ኣሳፔ ኢሳዴ ቢርሺዛ ዎጋይ ዲዛ ገሻሳ። *

18 ዴሬይ ዉሪካ ኢሲ ቦላ፥ «ባርባኔ ቢርሻዳ ሃይሳ ኣዴዛ ዲጋ!» ገዲ ዋሲዴሰ።

19 ባርባኔይ ካታማ ገደን ኣሳ ማካላ ዮኦን ዴንፎሊዲ ኣሰ ዎፏ ቃሼቲዳ ኣሳ።

20 ጲላጶሲካ ዩሱሳ ቢርሻናሰ ኮዪዳ ገሻሰ ቃሴካ ዛሪዲ ኦይቺዴሰ።

21 ኣሳይ ዛሪዲ ኢዛ፥ «ካቃ! ካቃ!» ገዲ ዋሲዴሰ።

* 23:17 ኢሲ ኢሲ ጌሻ ማጻፋቲ ታይቦ 17 ቦላ ዲዛ ቆፋ ጉጃቲስ፤ ቆፋዚካ ማርቆሳን ሺምፖ 15:6 ዲዛይሳ ሚሳቲስ።

22 ጲላጶሲ ሄሻንሶካ፡ «አዛሰ ካቆ? ሃይሲ አዴዚ አይ ኢታ ኦሊዴ? ኢዛ ሃይቆሰ ጋሊዛ ኢታ ኦሶ ታኒ ኢዛ ቦላ ቤያቤኬ፤ ሄሳ ጊሻሰ ቃጸያዳ ታ ኢዛ ቢርሻ ዬዳና» ጊዴሰ።

23 አሳይካ ቃላ ጶቁ ሂሰቲዲ ዬሱሲ ካቂታና ማላ ጲላጶሳ ከሄደ ዋሲሼ ዋሲዴሰ።

24 ሄሳ ጊሻሰ ጲላጶሲ ኢሰታ ኦይሾይ ፖሌታና ማላ አዛዚዴሰ።

25 አሳ ማካሊሲዲ ሼምፖ ዋዲዳ ጊሻሰ ቃሼቲዳይሳ ቢርሻና ማላ ኢሰቲ ዋሲዳዴ ቢርሺዲ ቃሴካ ዬሱሳ ኢሰቲ ዶሲዳ ማላ ኦሴቶ ጊዲ ዴራሰ አሊ ኢሚዴሰ።

ዬሱሳ ካቂቴሰ

(ማቶ 27:31-44፤ ማር 15:21-32፤ ዮሃ 19:17-27)

26 ኢሰቲካ ዬሱሳ ኦይኪ ኤኪ ቢሺን ቃሬና ጌቲቲዛ ካታማፔ ኢሲ ሲሞና ጌቲቲዛ አዴይ ሃሆፔ ዬዛይሳ ዴሚዳ፤ ዬሱሲ ካቂታና ማሰቃሌ ኮጫ ኢዚ ቶኪዲ ዬሱሳ ካላና ማላ ዋልቃሊዳ።

27 ዳሮ ዴሬይኔ ባ ቲራ ኢጪ ኢጪ ዬኪዛ ማጫሳቲ፡

28 ዬሱሳ፤ «ኢንቴ ዬራሳላሜ ማጫሳይ ኢንቴሲኔ ኢንቴ ናይታሰ ዬኪቴ ኦቲን ታሰ ዬኮፍቴ።

29 «ሲንሳፌ ኢንቴ ሄኮ ማይኔ ጊዲዳ ማጫሳቲ፡ ዬሎንታ ኡሎቴኔ ናይ ጳሞንታ ጳንሳቲ ኢንጃቲዳይታ!» ጋና ዋዴይ ሲንሳራ ዬሰ።

30 ሄ ዋዴ አሳይ፡ «ዙማቶ! ኑ ቦላ ዋዲቴ፤ ዙምቡላቲካ ኑና ቆቲቴ!» ጋና።

31 ሂሰቲን ቃዬ ሚላ ቦላ ሃይሳሶ ኦሊዳይቲ ሜላ ሚላ ቦላ ዋሰታኔሻ?» ጊዴሰ።

32 ኢዛራ ኢሲፌ ሃይቃና ማላ ሃራ ናምኡ ኢታ ኦሊዳ አሳታ ኢዛራ ኤፊዳ።

33 ቃራኒዮ ጌቲቲዛሶ ጋሊዲ ካቂዳ፤ ኢታ ኦሊዳይታ፤ ኢሳ ኡሻቻ ባጋራ፤ ኢሳ ሃዲርሳ ባጋራ ካቂዳ።

34 ዬሱሲካ፡ «ታ አዋጢ! ሃይቲ ባ ኦሊዳይሳ ኤሪዲ ኦሶንታ ጊሻሰ ኢሰታሰ ኣቶ ጋ!» ጊዴሰ፤ ኢሰቲካ ኢዛ ማይኦዛ ሳማ ዬጊዲ ባ ጊዶን ጊሼቲ ኤኪዳ።

35 ሄሲ ሃኒሺን አሳይ ወሪ ኤቂ ጸሊዳስ፤ ዳናቲካ፡ «ኢዚ ሃራ አሳ አሺዳስ ሺን ጸሳፌ ዶሬቲዳ ኪርስቶስ ኢዛ ጊዲኮ ኣኔ ሃኢ ባና አሾ» ጊዲ ቂዲዳ።

36 ዎታዳራቲካ ሸቂዲ ዎይኔ፤ አጌቲዳ ጫላ ኡሹ ኡሺዲ ኢዛ ቂዲዳ።

37 «ኔኒ ኣይሁዳ ካዎ ጊዲኪ? ኣኔ ሃኢ ኔና አሻ» ጊዳ።

38 ኢዛ ሁኡ፤ ሶላ ባጋራ ማሰቃሌ ኮጫ ሶላ፡ «ሃይሲ ኣይሁዳታ ካዎ» ጊዛ ቃላ ጸፊ ቃዲዳ።

ናምኡ ፓንጋታራ ዩሱሳ ካቄቴስ

(ማቶ 27:38-44፤ ማር 15:27-32)

39 ኢታ ኦሊዲ ካቄቲዳ አሳታ፤ ኢሶይ ጫሻ ቃላ ዩሱሳ ሶላ ቆቆፊዳስ። «ኔ ኪርስቶሳ ጊዲኪ? ኣኔ ኔናካ ኦናካ አሻ» ጊዳስ።

40 ኢታ ኦሊዳይታ፤ ኢሶይ፡ «ኔኒ ኔስ ቤሲዛ ፒርዳ ኤካሼ ጸሳስ ባቢኪ?»

41 ኦኒ ኦ ኦሊዳ ኢታ ኦሶስ ቤሲዛይሳ ኤኮስ፤ ሃይሲ ኣዴዚ ጊዲኮ ኢሲ ኢታካ ኦሊቤና» ጊዳስ።

42 ዩሱሳ፡ «ኔኒ ኔ ካዎቴላራ ዪዛ ዎዴ ታና ቆፓ!» ጊዳስ።

43 ዩሱሲካ ዛሪዲ፡ «ታ ኔስ ቱሙ ጋይስ፤ ሃች ኔ ታናራ ጋናቴን ዳና» ጊዳስ።

ዩሱሳ ሃይቆ

(ማቶ 27:45-56፤ ማር 15:33-41፤ ዮሃ 19:28-30)

44 ሄ ዎዴ ጋዴይ ሴታ ጋላስ ጊዲሺን ቢዲ ኡዱፋን ሳቲ ጋካናስ ኩሜላ ቢታ ሶላ ቋማይ ቋሚዳስ።

45 ኣርሼ ፖኦይ ዲጌቲዳስ። ጸሳ ኬላ ማጋላሻይካ ዳኬቲዲ ናምኡ ኬዚዳስ።

46 ዩሱሲካ ኬሂ ዋሲዲ፡ «ታ ኣዋዉ! ታኒ ታ ሼምፖ ኔ ኩሼን አማይስ» ጊዳ ማላ ሼምፖ ኬዚዳስ።

47 ማቶ ሃላቃይ ሄሳ ቤኢዲ፡ «ሃይሲ ኣዴዚ ቱማ፤ ጸሎ ኣሳኮሺን» ጊዲ ጸሳ ጋላቲዳስ።

48 ሄሳ ቤያናስ ሄን ሸቂዲ ዴሬይ ወሪ ሄ ሃኒዳይሳ ቤኢዲ ቲራ ኢጪ ኢጪዲ ሲሚዳስ።

49 ጊዶ አቲን ዩሱሳ ካሴ ሎኤሊ ኤሪዛይቲ ወሪ ቃሴካ ጋሊላፔራ ኢዛ ካሊዛ ማጫሳቲ ሄሳ ጸሊሼ ሃኪ ኤቂዳ።

ዬሱስ ሞጌቱል

(ማፍ 27:57-61፤ ማር 15:42-47፤ ዮሃ 19:38-42)

⁵⁰ አይሁዳታ ዱላታ አሳፔ ኢሶይ ኢዚካ ዮሴፌ ጌቴቲዛይሲ ዳሮ ኪያኔ ጸሎ አሳ።

⁵¹ ኢዚካ ካሴ አሳይ ዬሱስ ሶላ ዱላቲሺን ሄ ዱላታን ዴና፤ ኢዚካ አርማቲያሴ ጌቴቲዛ አይሁዳታ ካታማ አሳ ሺን ጾሳ ካዎቲሉ ያናይሳ ናጊሼ ጋምኢዴስ።

⁵² ኢዚካ ጸላጸሳኮ ቢዲ ዬሱስ አሃ ባስ ኢማና ማላ ጸላጸሳ ዎሲዴስ።

⁵³ ጸላጸሲ ኢዛስ ኤሮ ጊን ዮሴፌይ አሃ ማስቃሌ ኮጫፔ ዎሊዳ ማላ ጸጺዲ ሹቻፌ ዎጩቲዳ ካሴ ሃራ አሲ ሞጌቶንታ ዱፎን ኤፊዲ ዎሊዴስ።

⁵⁴ ሄ ጋላሳይ አሳይ ሳምባታስ ጊጌቲዛ ጋላስ ጊዲዳ ጊሻስ ሳምባታይ ጌላና ሃኔስ።

⁵⁵ ጋለላፔ ዴንዲዲ ዬሱሳራ ዪዳ ማጫሳቲካ ዮሴፌ ካሊ ቢዲ ዱፎዛ ቤኢዳ። ዬሱስ አሃ ዎስቲ ዎሊዳኮ ቤኢዳ።

⁵⁶ ሄፔ ሲሚዲ ሺቶኔ ቲዪዛ ሚሽ ጊግሲዳ። ዎጋይ ጊዛ ማላ ሳምባታ ጋላስ ሽምፒዳ።

24

ሃይቆፔ ዬሱስ ዴንል

(ማፍ 28:1-10፤ ማር 16:1-8፤ ዮሃ 20:1-10)

¹ ዎጋ ዎንታ ማላዶራ ማጫሳቲ ባ ጊግሲዳ ሺቶዛ ኤኪዲ ዬሱስ ዎሊዳ ዱፎዛኮ ቢዳ።

² ሹቻይካ ዱፎዛ ዶናፔ ጌንዴሪዲ ዲዛይሳ ቤኢዳ።

³ ጊዶ አቲን ጊዶ ጌሊዲ ዬሱስ አሃ ዴሞንታ አጊዳ ጊሻስ።

⁴ ኢስታስ ሃንዛዚ ጳዪን ኢስቲ ቶሉ ጊዳሼ ቆፖንታ ጸልቄቲዛ ማይኦ ማይኢዳ ናምኡ አሳቲ ኢስታ አቻን ኤቁዳ።

⁵ ማጫሳቲካ ከሄ ባቢዲ ዱጌ ቢታ ጴሊሺን፤ «ሄ አሳቲ ፓጺዲ ዴንዲዳይሳ ሃይቆፋታ ጊዶን አይስ ኮዬቲ?

⁶ ኢዚ ዴንዲዴስ! ሃን ባ። ቃሴካ ኢዚ ጋለላን ዲሼ ኢንቴስ ካሴ አይ ጊዳኮ እኔ ቆፒቲ።

⁷ አሳ ናይ ናጋራንቻታ ኩሼን አጲ ኢሜታናሲኔ ካቂታናስ፤ ሃይቆፔካ ሄሻንል ጋላስ ዴንዳናስ ቤሴስ» ጊዲ ዮቲ ዎሊዴስ።

8 ማጫሳቲካ ሄ ዋዴ ካሴ ኢዚ ጊዳ ቃላ ኣኬኪዱ።

9 ማጫሳቲ ዱፎሶፔ ሲሚዲ ሄሳ ኡባ ዩሱሳ ካሊዛ ታማኔ ኢሲኔታሲኔ ሃራታሰ ዮቲዳ።

10 ሄሳካ ሃዋሬታሰ ዮቲዳይ ማግዳሌ ጊዛሶፔ ዩዳ ማራሞኔ ዮሃኖ ጌቲቲዛሪራ ያቆቤ ማራሞኔ ኢሰታራ ኢሲፌ ዲዛ ሃራ ማጫሳታ።

11 ጊዳ ኣቲን ኢሰታሰ ማጫሳቲ ዮቲዳይሲ ኣጉሞ ሚሳቲን ኣማኒቤቴና።

12 ጊዳ ኣቲን ጴጽሮሲ ዋላን ዩሱሳ ዱፎሶ ጋኪ ሆኪዲ ዱፎዛ ጊዳ ጴሊሺን ኢዛ ኣሃዛ ጳጲዳ ማይኦይ ጳላ ዲዛይሳ ቤኢዲ ኬሂ ማላሌቲሼ ባሶ ሲሚዴሰ።

ባና ካሊዛ ናሞኣታሰ ዩሱሳ ቆንጮኦ

(ማር 16:12-13)

13 ሄ ጋላሰ ኢዛ ካሊዛይታፔ ናሞኣቲ ዩሩሳላሜፔ ታማኔ ኢሲ ኪሎ ሜቲሬ ሃኪዛ ኤማሆሴ ጌቲቲዛ ካታማ ቤቴሰ።

14 ቢሼ ኢሰቲ ሄ ዋዴ ሃኒዳ ዩሱሳ ሃይቆ ገሻሰ ባ ጊደን ሃሳዩቴቲሰ።

15 ኢሰቲ ሃሳዩቲሺን ዩሱሲ ኢሰታኮ ሽቂዲ ኢሰታራ ኢሲፌ ቢሺን።

16 ኢሰቲ ኢዛ ኤሮንታ ማላ ኢሰታ ኣይፌይ ኦይኬቲዴሰ።

17 ዩሱሲ ኢሰታ፡ «ሃይሲ ኦጌ ሄሜቲሼ ኢንቴ ኢንቴ ጊደን ሃሳዩቲዛይሲ ኣዜ?» ጊዴሰ። ኢሰቲካ ዳጋማራ ሞጼቲሼ ሲቲ ጊ ኤቃ ጊዳ።

18 ኢሰታ ጊደፌ ኢሶይ ቃሊዮጳ ጌቲቲዛይሲ ዛሪዲ፡ «ሃ ማታ ጋላሳታን ዩሩሳላሜን ሃኒዳይሳ ኤሮንታ ኢማላ ኣሲ ኔና ጳላ?» ጊዴሰ።

19 ኢዚካ ኢሰታሰ ዛሪዲ፡ «ኣዚ ሃኒዴ?» ጊን ኢሰቲ ቃሴ ዛሪዲ፡ «ጳሳ ሲንፋኒኔ ኣሳ ኡባ ሲንፋን ኦሶኒኔ ቃላን ሚኖ ናቤ ጊዲዳ ናዚሬቴ ዩሱሳ ገሻሳ» ጊዳ።

20 ኢዛካ ቄሴታ ሃላቃቲኔ ዳናቲ ሃይቆ ፒርዳሰ ኣፉ ኢሚዳኔ ካቂዳ።

21 ኮኒ ጊዲኮ፡ « (ኢሰራኤሌ ዋዛናይ ኢዛ) ጊዲ ኡፋዩቲዶሲሺን ሃራፔካ ሄሲ ሃኒን ቃሴ ሃቕ ሄቫንሶ ጋላሳ።

22 ቃሴ ኦ ጊደፌ ኢሲ ኢሲ ማጫሳቲ ኦና ኬሂ ማላሊሲዳ፤ ኢሰቲካ ማላዶ ዋንታራ ጌዴ ኢዛ ዱፎሶ ቢዲ፤

23 ኢዛ ኣሃይ ቤቶንታ ኢጸን ዩዲ ኢዚ ፓጳ ዲዛይሳ ኢሰታሰ ዮቲን ኪታንቻታ ቤኢዳይሳ ኦሰ ዮቲዳ።

24 ኑፔካ ኢሲ ኢሲ አሳቲ ኢዛ ዱፎኮ ቢዲ ማጫሳቲ ጊዳ ማላ ቤኢዳ ኣቲን ዩሱሳ ዳሚቤቴና» ጊዳ።

25 ኢዚካ ኢስታስ፡ «ኢንቴኖ ዋዚናን ዋጽንታይቶ! ኢንቴ ዋዚናይ ካሴ ናቤቲ ዮቲዳይሳ አማናናፔ ታኪዳይቶ!

26 ጸሳፌ ኪቴቲዳይሲ ሃ ሜቶዛ ኤካናሲኔ ጌዳ ባ ቦንቾሶ ጌላናሰ ቤሴኔ?» ጊዳስ።

27 ሙሴፔኔ ናቤታፔ ዶሚዲ ጌሻ ማጸፋታን ኢዛ ጊሻስ ጸፊቲዳይሳ ኢስታስ ሎኤሊ ዮቲዳስ።

28 ኢስቲ ባ ቢዛሶ ማቲዳ ዋዴ ዩሱሲ አቂ ቢዛ ሚሳቲዳስ።

29 ኢስቲካ ቃሴ፡ «ጋዴይ ቃሚዛ ጊሻስ ኑናራ አቃ» ጊዲ ኢዛ ኬሂ ዋሲን ኢስታራ አቃናሰ ጌሊዳስ።

30 ኢስታራ ኢሲፌ ማዳን ኡቲዲ ኡኬላ ባ ኩሼን ኦይኪዲ ኢስታስ ሜንላ ሜንላ ኢሚዳስ።

31 ሄ ዋዴ ኢስታ አይፌይ ዶዬቲን ኢዛ ጊዲዳይሳ ኤሪዳ፤ ኢዚካ ኢስታ አይፌፔ ጌሚዳስ።

32 ኢስቲካ፡ «ኑ ዪሼ ኦጌ ቦላ ዲሺን ኑና ሃሳይሲዲ ጌሻ ማጸፋታካ ቆንጨሲዲ ኑስ ጌላናሼ ዮቲን ኑ ዋዚናይ ታማ ማላ ጸጌቲቤኔ?» ጊዲ ኢሶይ ኢሳራ ሃሳዬቲዳ።

33 ሄራካ ዴንዲዲ ዬሩሳላሜ ሲሚ ቢዳ፤ ታማኔ ኢሲኔቲኔ ኢስታራ ኢሲፌ ዲዛይቲካ ኢሲ ቦላ ሸቂ ዲዛይታ ዳሚዳ።

34 ኢስቲካ ባ ጊዶን ኢሶይ ኢሳስ፡ «ሳዳይ ቱሙ ዴንዲዳስ! ሲሞናስካ ቤቲዳስ» ጊዳ።

35 ኢዛ ካሊዛይታፔ ናሞአቲ ኦጌ ቦላ ሃኒዳይሳኔ ዩሱሲ ኡኬላ ሜንላ ሜንላ ኢሚዳ ዋዴ ኢስቲ ዋሰቲ ኤሪዳኮ ኢስታስ ዮቲዳ።

ዩሱሲ ባና ካሊዛይታስ ቆንጨኡ

(ማቶ 28:16-20፤ ማር 16:14-18፤ ዮሃ 20:19-23፤ ሃዋ 1:6-8)

36 ሄሳ ጊሻስ ኢስቲ ባ ጊዶን ሃሳዬቲሺን ዩሱሲ ኢስታ ጊዶን ኤቂዲ፡ «ሳርይ ኢንቴሰ ጊዶ!» ጊዳስ።

37 ጊዶ ኣቲን ኢስቲ ዋይቲሌ ቤኢዳ ሚሳቲን ኬሂ ዳጋሚዳ።

38 ኢዚካ ኢስታስ፡ «አዛስ ዳሮ ቆፔቲ? አዛስ ኢንቴ ዋዚናራ ሲዴቲ?»

39 ታ ኩሼታኔ ታ ቶሆታ ሃ ጸሊቲ፤ ታናኮ፤ ቃሴካ ታና ኦይኪ ቤኢቲ፤ ታና ኢንቴ ቤኢዛይሳ ማላ ዋይቲሌስ አሾይኔ ሜቁሊ ዴና» ጊዳስ።

40 ሄሳ ጊ ሲሚዲ ባ ቶሆታኔ ባ ኩሼታ ኢስታ ቤሲዳስ።

41 ኢስቲካ ኡፋይሳ ዳሮፔኔ ማላሌቴላፌ ዴንዲዳይሳን ቡሮ አማሮንታ ዲሺን ዩሱሲ፥ «ሄሳን አይኮ ሚዛዚ ዲዜ?» ጌዲ ኢስታ ኦይቺዴስ።

42 ኢስቲካ ሞሌ ጸጸ ኢሲ ባርስ ኢዛስ አሚዳ።

43 ኢዚካ ኤኪዲ ኢስታ ሲንላን ሚዴስ።

44 ኢዚካ፥ «ኢንቴናራ ታ ዲዛ ዎዴ፥ ሐውሴ ዎጋን ናቤታኒኔ ዬላ ማጻፋታን ታ ገሻስ ጸፊቲዳይሲ ዉሪካ ፖሌታናስ ቤሴስ» ጌዴስ።

45 ሄ ዎዴ ገሻ ማጻፋታ ኢስቲ ኤራና ማላ ዎዚና ኢስታስ ደይዴስ።

46 ኢስታስካ፥ «ኪርስቶሲ ዎዬ ቤያና፤ ሄሻንሉ ጋላስ ሃይቆፔ ዴንዳና ጌቲቲ ጸፊቲዴስ።

47 ዬሩሳላሜፔ ደሚዲ ኡባ ዴሬስ ናጋራፔ ሲሞይኔ ማሮቴሌ ኢዛ ሱንላን ኮቲታና።

48 ኢንቴካ ሃይሳስ ማርካታ።

49 ታኒካ ታ አዋይ አሚዳ ኡፋይሳ ኢንቴስ ዬዳና፤ ኢንቴ ቃሴ ዎልቃ ቦላፌ ማይኣና ጋካናስ ዬሩሳላሜ ካታማን ታኪቴ» ጌዴስ።

ፑዴ ሳሎ ዩሱሳ ቡስ

(ማር 16:19-20፤ ሃዋ 1:9-11)

50 ሄሳፌ ጉዬ ኢስታ ኤኪዲ ቢታኒያ ጌቲቲዛሶ ኬዚዴስ። ባ ኩሼታካ ዴንፊዲ ኢስታ አንጂዴስ።

51 ኢስታ አንጂሼ ኢስታፌ ሻኬቲዲ ፑዴ ሳሎ ቢዴስ።

52 ኢስቲካ ኢዛስ ሆኪ ጎይኒዳ፤ ኬሂ ኡፋዬቲሼ ዬሩሳላሜ ሲሚዳ።

53 ኡባ ዎዴ ጸሳ ኬላን ጸሳ ጋላቲሼ ጋሞኢዳ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b